

2025
ABRIL – HUNYO

Vol. 101, No. 2
Pang Sabado nga mga Pagtulon-an sa Biblia
Dibisyon sa Mga Hamtong



IKADUHA NGA BAHIN

Ang Ebanghelyo **Sumala kang Juan**

Ang Maayong Magbalantay sa kalumo nagagiya ug
nagapanalipod sa panon ilalum sa Iyang pag-amoma.

1. Si Jesus, ang Tinapay sa kinabuhi	5
2. Ang Krisis sa Galilea	10
3. Si Jesus diha sa Fiesta sa Mga Tabernaculo.....	15
4. Walay Usa nga Nagsulti sama Niining Tawhana.....	20
5. "Dili Usab Ako Maghukom Kanimó"	26
6. Si Jesus, ang Kahayag sa Kalibutan	31
7. Ang Kahayag Gisalikway – o Gipasanag?.....	36
8. Si Jesus ug si Abraham	41
9. Si Jesus ug ang Tawo nga Buta	46
10. Magaatubang sa Espirituhanon nga Pagkabuta	52
11. Si Jesus, ang Maayong Magbalantay.....	57
12. Si Jesus ug si Lazaru	62
13. Ang Pagkabanhaw ug ang Kinabuhi.....	67

Ang Pang Sabado nga mga pagtulon-an sa Biblia, usa ka inadlaw nga programa sa pagtoon, gibasi lamang diha sa Biblia ug sa Espiritu sa Tagna nga walay gidugang nga mga komentaryo. Ang mga kinutlo gipamubo kutob sa mahimo aron sa paghatag ug hamubo, direkta nga mga panabut. Mga braket [] gibutang diha sa pipila ka mga kaso aron sa paghatag ug ka klaro, husto nga konteksto, ug hapsay nga pagbasa. Dugang nga pagtoon diha sa tinubdan nga mga materyales girekomendar gayud.

Illustrations: Adobe Stock on p. 25, 72; Map Resources on pp. 4, 51, 72; Sermonview on the front cover.

Copyright © 2025 by the Seventh Day Adventist Reform Movement General Conference, Sabbath School Department, 5240 Hollins Road, Roanoke, Virginia 24019, USA.
Telephone: 1-540-362-1800 • Web: www.sdarm.org • E-mail: info@sdarm.org

Sabbath Bible Lessons (USPS 005-118), Vol. 101, No. 2, April–June 2025. Published quarterly by the Seventh Day Adventist Reform Movement General Conference, Sabbath School Department. Printed, and distributed by Reformation Herald Publishing Association, 5240 Hollins Road, Roanoke, Virginia 24019-5048, U.S.A. Periodical postage paid at Roanoke, Virginia 24022-9993.

U.S.A. and Canada
Contact: Telephone 1-540-366-9400 • Website: www.reformationherald.com • E-mail: info@reformationherald.org

Annual subscriptions in U.S.A.: U.S. \$22.00. Large print \$33.00. International \$21.00 plus shipping. Large print international \$31.00 plus shipping. Single copies \$6.00. Large print \$9.00. Please send subscription requests and payments (in U.S. currency only) to the address below. Prices subject to change without notice.

POSTMASTER, please send address changes to: Sabbath Bible Lessons, P. O. Box 7240, Roanoke, VA 24019-0240.

Australia

Contact: Telephone 61-2-9627-7553 • Fax 61-2-9627-7554 • Website: www.sdarm.org.au • E-mail: info@sdarm.org.au

Annual subscriptions in Australia: AU \$34.00 (individual copies \$8.50). Other countries, AU \$34.00 plus shipping. Please send subscription requests and payments (in Australian currency) to the address below. Sabbath Bible Lessons, P.O. Box 132, Riverstone NSW 2765, Australia.

South Africa

Contact: Telephone & Fax 27-011-336-7064 • Website: www.sdarm.sa.org.za • E-mail: admin@sdarm.sa.org.za

Annual subscriptions in South Africa: R120-00 (single copies R35-00). Please send subscription requests and payments to the address below.

POSTMASTER, please send address changes to: Sabbath Bible Lessons, P. O. Box 7950, Johannesburg 2000, South Africa.

Pasiuna

Ang pagsulat sa ebanghelyo sumala ni Juan gipetsahan nga ulahi kay sa laing tulo ka mga ebanghelyo (gitawag nga Synoptic Gospels), apan sulod gihapon sa una nga siglo. Diha sa Ika-19 nga siglo, ang mga kritiko sa Biblia misulay sa paglimod nga kini gisulat una pa sa A.D. 150, nga pinaagi niana nagsulay sa paglalis sa kamatuoran nga si apostol Juan mao ang tagsulat. Ang mga kritiko usab nagsumbong nga kini nagpakita sa Gnostic nga pilosopiya ug busa dili kini masulat sa wala pa ang Gnostisismo nahimong usa ka seryoso nga hulga sa pagtuo. (Ang Gnostisismo maoy usa ka pilosopikal ug relihiyosong sistema sa unang sekta nga miangkon nga ang kahibalo maoy yawe sa kaluwasan kay sa pagtuo.) Ang ingon nga gituis nga sumbong dugay nang gisupak.

Sa kasukwahi, ang gawas nga ebidensya nagpamatuod sa pagkaanaa sa ikaupat nga ebanghelyo ug ang hataas nga pagtamod diin kini gihimo na sa sayo pa sa A.D. 115. Usa niana nga ebidensya miabut pinaagi sa pagkadiskobre sa usa ka gamay nga tipik sa papiro, nga adunay pipila ka mga bersekulo ni Juan (kapitulo 16, mga bersekulo 31–33, 37, 38), nailhan nga Rylands Papyrus ug sagad gitawag nga P52, nga gipetsahan sa paleographically C. A.D. 125. Kini nga tipik, nakaplagan sa Ehipto sa sinugdanan sa ika-2 nga siglo, giisip nga mahikap nga ebidensya sa sayo ug kaylap nga pagsabwag sa ikaupat nga ebanghelyo. Ang bantog nga iskolar sa Bag-ong Tugon nga si Adolph Deissmann nagpamatuod:

“Usa ka daghan sa mga pangagpas mahitungod sa ulahing sinugdanan sa Ebanghelyo sumala kang Juan daling malaya sama sa init nga mga tanom sa balay. Naa mi sa Rylands papyrus usa ka piho nga dokumentaryo nga pamatuod nga ang Ebanghelyo sumala ni Juan wala lamang naglungtad sa unang katunga sa ika-2 nga siglo, apan ang mga kopya niini nakaabot na sa Ehipto. Busa ang gigikanan sa Ebanghelyo kinahanglang ibalik sa mas sayo pa mga panahon.” — Deutsche Allgemeine Zeitung, Dec. 3, 1935.

Dili lamang ang pagsulat ni Juan nagsilbi ug espesipikong katuyoan taliwala sa unang mga Cristohanon; kini nagdala ug espirituhanong paggiya, tabang, ug pagdasig ngadto sa mga ubos ni Cristo, ubos sa labing nagkalainlain nga mga kahimtang, hangtud sa kapanahonan.

Ang Ginoo “adunay kahayag nga bag-o alang kanato, apan kini maoy bililhon nga karaan nga kahayag nga alang kanato modan-ag gikan sa Pulong sa kamatuoran. Kita aduna lamang nagakidlap sa mga silaw sa sidlak sa kahayag nga moabot pa kanato. Wala namo gipahimuslan ang kahayag nga gihatag na sa Ginoo kanato, ug sa ingon napakyas kita sa pagdawit sa nagdugang nga kahayag; wala kita maglakaw diha sa kahayag nga gipadan-ag na kanato.


“Kita nagtawag sa atong kaugalingon nga mga tawo nga nagtuman sa sugo, apan kita wala makasabut sa hilabihan nga gilapdon sa halayo nga mga baruganan sa balaod sa Dios; dili nato masabtan ang sagradong kinaiya niini. Daghan ang nag-angkon nga mga magtutudlo sa kamatuoran, walay tinuod nga pagsabot sa ilang gibuhay sa pagtudlo sa balaod sa Dios, tungod kay sila walay buhi nga kahibalo sa Ginoong Jesus Cristo.”—Selected Messages, bk. 1, pp. 401, 402.

Hinaut ang padayon nga pagtuon niini nga Ebanghelyo makatabang kanato nga mas makaila kang Jesus!

Ang Departamento sa Sabbath School sa Konfenecia Heneral

Halad sa Unang Sabado

SABADO, ABRIL 5, 2025



Alang sa pagtukod pag-usab sa simbahan sa Prokhorovka, Russia

Ang Russia, sumala sa lugar, mao ang pinakadako nga nasud sa kalibutan, nga adunay 6,612,073.2 milya kwadrado (17,125,191 km²) nga may populasyon nga 147,000,000. Mga tawo gikan sa kapin sa 180 ka nasyonalidad nagpuyo niining halapad nga teritoryo, ug sa ilang katungod, sila nag-angkon sa lain-laing mga relihiyosong pagtuo. Ang labing inila mao ang Ruso nga Ortodokso (41.1%), gisundan sa ubang mga Cristohanong tinuohan (6.3%), Islam (6.5%), Neopagans ug Tengrists (1.2%), Budhismo (1.2%), wala magbansay nga mga magtutuo (25.2%), mga ateyista (13%), uban ang nahabilin wala mag-angkon ug relihiyon.

Sukad sa sinugdanan sa SDARM, ang mensahe sa walay katapusan ang ebanghelyo miuswag dinhi ubos sa lisud kaayo nga mga kahimtang. Daghang magtutuo kinahanglang mag-antus sa grabeng paglutos—ug ang uban misaksi alang sa gilansang sa krus ug nabanhaw nga Manluluwas sa bili sa ilang kinabuhi.

Sa katapusan sa katuigan sa 1990, usa ka magbubuhat uban sa iyang asawa mibalhin sa sentrong rehiyon sa Russia alang sa katuyoan sa paghimo sa misyonaryo nga buluhaton. Ingon sa usa ka resulta sa ilang mga paningkamot ug mga pag-ampo, usa ka grupo sa mga magtutuo ang naorganisar. Apan sila walay lugar para sa mga katiguman ug pagsimba. Sa katapusan, sa 2006 nakakita sila ug gamay nga balay sa usa ka luna sa Prokhorovka, usa ka ciudad administratibo nga sentro sa Prokhorovsky Distrito sa Belgorod Oblast — usa ka lugar sa agrikultura nga nagpatunghag mga lugas, sugar beets, sunflower, ug prutas ubay sa Suba sa Psol sa habagatan-sidlakan sa ciudad sa Kursk, pinuy-anan sa halapad nga mga deposito sa puthaw.

Klaro natong nakita ang kamot sa Dios nga milihok sa dihang milagrosong gitangtang Niya ang daghang mga babag ug gipanalanganan ang pagpalit niini nga balay. Ang bulohaton niini nga rehiyon nagpadayon sa pagtubo, ug kini wala magdugay sa balay nahimong gamay ra kaayo nga makapalingkod sa tanang magsisimba sa Dios. Pipila ka tuig ang milabay, kami nakadawat ug permiso gikan sa mga awtoridad ug nagsugod sa pagtukod ug balay sa pagsimba. Ang mga kaigsoonan mihatag ug mga donasyon ug nagtrabaho ug maayo, apan sa pagtapos niini nga proyekto kinahanglan namo ang manggihatagon nga tabang sa mga tawo sa tibuok kalibutan nga nahigugma sa Ginoo. Ang pagkompleto niini nga proyekto maghatag ug kahigayonan sa pagpalambo sa dugang nga buluhaton sa ebanghelyo sa silingang mga rehiyon, isip usa ka kahayag sa pagsabwag sa katapusang mensahe sa kaluwasan. Hinaut nga ang Ginoo magpanalangin sa matag usa kansang kasingkasing andam sa pagtabang sa kalampusan sa presente nga kamatuoran niini nga rehiyon sa kalibutan!

Ang inyong mga igsoon gikan sa simbahan sa Prokhorovka ug sa Russian Union

Si Jesus, ang Tinapay sa Kinabuhi

SAG-ULOHON NGA BERSEKULO: “Ug si Jesus miingon ngadto kanila, Ako mao ang tinapay sa kinabuhi: siya nga moanhi kanako dili gayud pagagutomon; ug siya motoo kanako dili na gayud pagauhawon” (Juan 6:35).

Gisugyot nga Basahon: *Thoughts From the Mount of Blessing*, pp. 18–21.

“Atong gikaon ang unod ni Cristo . . . sa dihang pinaagi sa pagtuo kita mogunit diha Kaniya ingon nga atong Manluluwas.”—*The SDA Bible Commentary* [E. G. White Comments], vol. 5, p. 1135.

1. AMBISYOSO NGA KAINITON

Domingo, Marso 30

- a. Human sa milagro sa mga tinapay, unsang konbiksyon ang nabatonan sa daghan nga katawhan? Juan 6:14. Unsa man ang ilang gitinguha nga buhaton? Juan 6:15 (unang bahin).

“Sa tibuok adlaw ang konbiksyon milig-on. Kanang pinakalabaw nga buhat mao ang pasalig nga ang dugay nang gipaabot nga Manluluwas anaa na sa ilang taliwala. Ang paglaum sa katawhan misaka nga taas ug mas taas pa. Kini Siya mao ang maghimo sa Judea nga usa ka yutan-ong paraiso, usa ka yuta nga magpaagay sa gatas ug dugos. Siya makatagbaw sa matag tinguha. Siya makahimo sa pagbungkag sa gahum sa gidumtan nga mga Romano. Siya makaluwas sa Juda ug Jerusalem. Siya makaayo sa mga sundalo nga nasamdan sa gubat. Makahimo Siya sa paghatag ug pagkaon sa tibuok kasundalohan. Iyang madaug ang mga nasud, ug ihatag sa Israel ang dugay na nga gipangita nga dominyo.

“Sa ilang kahinam ang katawhan andam dayon sa pagkorona Kaniya ingon nga hari. Ilang nakita nga Siya wala maningkamot sa pagdani sa pagtagad o pagsiguro sa kadungganang ngadto sa Iyang kaugalingon. Dinhi niini Siya lahi ra kaayo ngadto sa mga sacerdote ug mga punoan, ug sila nahadlok nga dili gayud Niya ipugos ang Iyang pag-angkon sa trono ni David. Nagtinabangay sila, sila nagkasabut sa pagkuha Kaniya pinaagi sa pagpugos, ug imantala Siya nga hari sa Israel. Ang mga tinun-an nakighiusa sa panon sa katawhan sa pagpahayag sa trono ni David nga may katungod nga kabilin sa ilang Agalon. Ang kaligdong ni Cristo, miingon sila, maoy hinungdan Kaniya sa pagdumili sa maong dungog. Ipabayaw sa katawhan ang ilang Manluluwas. Pasagdi ang arogante nga mga sacerdote ug mga magmamando mapugos sa pagpasidungog Kaniya nga mianhi nga sinuloban sa kagahum sa Dios.”—*The Desire of Ages*, pp. 377, 378.

- a. Unsay gihimo ni Jesus aron sa pagpugong sa panon ug sa mga tinun-an sa pagtuman sa ilang mga plano sa pagpahalona Kaniya diha sa usa ka yutan-an nga trono? Juan 6:15.

“[Ang mga tinun-an ug ang panon] mainiton nga naghan-ay sa pagtuman sa ilang katuyoan; apan si Jesus nakakita unsa ang nagalakaw, ug nakasabut, ingon nga sila dili, unsa ang mahimong resulta sa maong kalihokan. Bisan karon ang mga sacerdote ug mga punoan nagatinguha sa Iyang kinabuhi. Ilang gipasanginlan Siya nga nagpahilayo sa mga tawo gikan kanila. Ang kabangis ug insureksyon mosunod sa paningkamot sa pagbutang Kaniya sa trono, ug ang buhat sa espirituhanon nga gingharian mababagan. Sa walay paglangan kinahanglan ang kalihokan masugpo. Nagtawag sa Iyang mga tinun-an, si Jesus misugo kanila sa pagkuha sa sakayan ug mobalik dayon ngadto sa Capernaum, nga mobiya Kaniya aron papaulion ang mga tawo.

“Wala pa masukad adunay usa ka sugo gikan ni Cristo nga daw imposible nga matuman. Ang mga tinun-an dugay na nga naglaum alang sa usa ka inila nga kalihokan sa pagbutang kang Jesus diha sa trono; dili nila maagwanta ang hunahuna nga kinahanglan kining tanan nga kasibot mahimong mapakyas. Ang mga panon sa katawohan nga nanagtigum sa pagsaulog sa pasko masibuton kaayo nga makita ang bag-ong propeta. Ngadto sa Iyang mga sumosunod kini daw bulawanon nga kahigayonan sa pagtukod sa ilang hinigugma nga Agalon diha sa trono sa Israel. Diha sa kahayag niining bag-ong ambisyon lisud alang kanila nga mobiya nga sila ra, ug magbiya kang Jesus nga mag-inusara nianang awaaw nga baybayon. Sila nagprotesta batok sa maong han-ay; apan si Jesus karon misulti uban sa usa ka awtoridad nga wala pa gayud Niya sukad mahatag ngadto kanila. Nahibalo sila nga ang dugang nga pagsupak sa ilang bahin mahitabo mahimong walay kapuslanan, ug diha sa kahilum sila mipaingon sa dagat.”—*The Desire of Ages*, p. 378.

- b. Sa adlaw human ang milagro, unsa ang gibuhát sa panon? Juan 6:22–25.

“Ang milagro sa mga tinapay nabalita bisan diin, ug sayo kaayo sunod nga buntag ang mga tawo midugok sa Betsaida aron sa pagtan-aw kang Jesus. Sila nangabot diha sa dakong gidaghanon, diha sa yuta ug dagat. Kadtong mibiya Kaniya sa miaging gabii mibalik, nga nagdahom sa pagkaplag Kaniya didto; tungod kay walay sakayan nga magdala Kaniya ngadto sa pikas nga daplin. Apan ang ilang pagpangita napakyas, ug daghan ang mipadulong ngadto sa Capernaum, nga nangita gihapon Kaniya.

“Sa kasamtangan Siya miabot sa Genesaret, human sa usa ka adlaw nga Siya wala didto. Sa dihang nahibaloan nga Siya midunggo, ang mga tawo ‘nagdagan latas niana sa tibuok rehiyon sa palibot, ug misugod sa pagdala sa mga higdaanan niadtong mga masakiton, diin sila nakadungog nga Siya atua didto.’ Marcos 6:55.”—*Ibid.*, pp. 383, 384.

- a. Unsang pranka apan mahunahunaon nga mensahe ang gihatag ni Jesus ngadto sa mga panon? Juan 6:26, 27.

“Wala gitagbaw ni Jesus ang ilang pagkamausisahon. Siya sa kasubo miingon, ‘Kamo nangita Kanako, dili tungod kay kamo nakakita sa mga milagro, apan tungod kay kamo nakakaon sa mga tinapay, ug nangabusog.’ Sila wala nangita Kaniya dili gumikan sa bisan unsa nga takus nga motibo; kon dili ingon nga sila nakakaon sa mga tinapay, sila naglaum nga makadawat gihapon ug temporaryo nga kaayohan pinaagi sa pagdugtong sa ilang kaugalingon ngadto Kaniya. Ang Manluluwas misugo kanila, ‘Ayaw paghago alang sa kalan-on nga madunot ra, kondili alang nianang kalan-on nga molungtad hangtud sa kinabuhing dayon.’ Ayaw pagpangita nianang materyal lamang nga kaayohan. Himoa nga dili kini ang panguna nga paningkamot sa pagtagana alang sa kinabuhi nga karon, apan pangitaa ang espirituhanon nga pagkaon, bisan kanang kaalam nga molungtad ngadto sa walay katapusang kinabuhi.”—*The Desire of Ages*, p. 384.

- b. Unsang pangutana ang gipangutana sa mga Judeo mahitungod sa mga buhat sa Dios? Juan 6:28. Isaysay ang tubag nga gihatag sa Ginoo. Juan 6:29.

“Sa makadiyut ang interes sa mga tigpaminaw napukaw. Sila mipahayag, ‘Unsa may among buhaton, aron kami makabuhat sa mga buhat sa Dios?’ Sila naghimo ug daghan ug mabug-at nga mga buhat aron sa pagrekomendar sa ilang kaugalingon ngadto sa Dios; ug sila andam sa pagpaminaw sa bisan unsa nga bag-ong pagsaulog diin sila makahimo sa pagbaton ug mas dako nga merito. Ang ilang pangutana nagpasabut, Unsa ang among buhaton aron kami mahimo nga takus sa langit? Unsa ang bili nga gikinahanglan natong ibayad aron mabatonan ang umaabot nga kinabuhi?

“‘Si Jesus mitubag ug miingon ngadto kanila, Kini mao ang buhat sa Dios, nga kamo motuo kaniya nga Iyang gipadala.’ Ang bili sa langit mao si Jesus. Ang dalan paingon sa langit pinaagi sa pagtuo sa ‘Cordero sa Dios, nga nagakuha sa sala sa kalibutan.’ Juan 1:29.”—*Ibid.*, p. 385.

“Ang paghinulsol mao ang pagtalikod gikan sa kaugalingon ngadto kang Cristo; ug sa dihang gidawat nato si Cristo aron nga pinaagi sa pagtuo Siya makapuyo sa Iyang kinabuhi dinhi kanato, ang maayong mga buhat makita.”—*Thoughts From the Mount of Blessing*, p. 87.

“Hinaut nga ang Ginoo motabang sa Iyang katawhan nga makaamgo nga adunay mainiton nga buluhaton nga pagabuhaton. . . . Diha sa puloy-anan, sa simbahan, ug sa kalibutan sila magbuhat sa mga buhat ni Cristo. Dili sila pasagdan nga mag-inusara sa pagbuhat. Ang mga manulonda mao ang ilang mga katabang. Ug si Cristo mao ang ilang magtatabang.”—*Testimonies for the Church*, vol. 8, p. 18.

- a. Unsang ilhanan ang gitinguha sa mga Judeo ug unsang kamatuoran sa kasaysayan ang ilang gihisgutan? Juan 6:30, 31. Unsa ang gisulti ni Jesus sa tinapay gikan sa langit? Juan 6:32, 33.

“Gipasidunggan sa mga Judeo si Moises ingon nga tighatag sa manna, nga naghatag ug pagdayeg ngadto sa instrumento, ug nawad-an sa panan-aw Kaniya nga pinaagi kang kinsa ang buhat natuman. Ang ilang mga amahan nagbagulbol batok kang Moises, ug nagduhaduha ug milimod sa iyang balaang misyon. Karon sa samang espiritu gisalikway sa mga anak ang Usa nga nagdala sa mensahe sa Dios sa ilang kaugalingon. ‘Unya si Jesus miingon kanila, Sa pagkatinuod, sa pagkatinuod, magaingon ako kaninyo, si Moises wala maghatag kaninyo nianang tinapay gikan sa langit.’ Ang tighatag sa mana nagtindog sa ilang taliwala. Si Cristo mismo ang nanguna ang mga Hebreohanon latas sa kamingawan, ug sa adlaw-adlaw nagpakaon kanila sa tinapay gikan sa langit. Kadto nga pagkaon maoy usa ka tipo sa tinuod nga tinapay gikan sa langit. Ang maghahatag sa kinabuhi nga Espiritu, nga nagadagayday gikan sa walay kinutuban nga kahupnganan sa Dios, mao ang tinuod nga mana.”—*The Desire of Ages*, pp. 385, 386.

- b. Nga nagtumong sa ilang mga hunahuna lamang diha sa natural, pisikal nga tinapay, unsang hangyo ang ilang gihimo - ug unsa ang gisaysay sa Ginoo? Juan 6:34-36.

“Ang hulagway nga gigamit ni Cristo sinati kaayo sa mga Judeo. Si Moises, pinaagi sa inspirasyon sa Balaang Espiritu, miingon, ‘Ang tawo dili mabuhi sa tinapay lamang, kondili pinaagi sa matag pulong nga nagagula sa baba sa Ginoo.’ Ug ang propeta nga si Jeremias nagsulat, ‘Ang imong mga pulong nakaplagan, ug gikaon ko sila; ug ang Imong pulong alang kanako maoy kalipay ug pagmaya sa akong kasingkasing.’ Deuteronomio 8:3; Jeremias 15:16. Ang mga rabbi sa ilang kaugalingon adunay panultihon, nga ang pagkaon sa tinapay, diha sa espirituhanong kahulogan niini, mao ang pagtuon sa balaod ug ang pagbuhat sa maayo nga mga buhat; ug kini kanunay nga giingon sa pag-abut sa Mesias ang tanan nga Israel mapakaon. Ang pagtulon-an sa mga propeta nagpatin-aw sa lawom nga espirituhanong leksyon diha sa milagro sa mga tinapay. Kini nga leksyon gipaninguha ni Cristo nga ablihan sa Iyang mga tigpaminaw diha sa sinagoga. Kon nakasabot pa sila sa mga Kasulatan, ila untang masabtan ang Iyang mga pulong sa dihang Siya miingon, ‘Ako mao ang tinapay sa kinabuhi.’ Sa miaging adlaw lamang, ang dakong panon, sa dihang gikapoyan ug gikapoy, gipakaon pinaagi sa tinapay nga Iyang gihatag. Ingon nga gikan niana nga tinapay nakadawat sila ug pisikal nga kusog ug kahayahay, mao nga gikan kang Cristo sila makadawat ug espirituhanong kusog ngadto sa dayon nga kinabuhi.”—*Ibid.*, p. 386.

a. Unsang duha ka magkadugtong nga mga saad ang gihatag ngadto niadtong nagpaila sa ilang mga kaugalingon uban kang Cristo - ug sa unsa nga kini nga paglaum ngadto sa matag makasasala? Juan 6:37- 40.

“Ang tanan nga midawat Kaniya diha sa pagtuo, [si Jesus] miingon, makabaton ug dayon nga kinabuhi. Walay usa nga mawala.”—*The Desire of Ages*, p. 387.

“Ayaw paminawa ang sugyot sa kaaway nga magpahilayo kang Cristo hangtud nga ikaw makahimo sa imong kaugalingon nga mas maayo; hangtud nga ikaw maayo na nga moduol sa Dios. Kon ikaw maghulat hangtud niana, ikaw dili gayud moduol. Sa diha nga si Satanas motudlo sa imong mahugaw nga mga saput, sublia ang saad ni Jesus, ‘Siya nga moanhi Kanako dili ko gayud isalikway.’ Juan 6:37. Sultihi ang kaaway nga ang dugo ni Jesu-Cristo nagahinlo gikan sa tanang sala. Himoa ang pag-ampo ni David nga imong kaugalingon, ‘Hinloi ako sa hisopo, ug ako mamahinlo; hugasi ako, ug ako mahimong mas puti pa kay sa niyebe.’ Salmo 51:7.

“Tindog ug umadto ka sa imong Amahan. Siya makigtagbo kanimo. Kung motikang ka bisan usa ka lakang padulong Kaniya diha sa paghinulsol, Siya magdali sa pagkupert kanimo sa Iyang mga bukton sa walay katapusang gugma. Ang iyang igdulungog abli sa pagtuaw sa mga mahinulsulon nga kalag. Ang pinakauna nga tinguha sa kasingkasing sa pagsunod sa Dios Iyang nahibaloan. Walay usa ka pag-ampo nga gihalad, bisan unsa pa kaluya, walay luha nga gipaagas, bisan unsa nga tinago, walay sincero nga tinguha sa pagsunod sa Dios gipangga, bisan unsa ka huyang, apan ang Espiritu sa Dios nagalakaw sa pagtagbo niini. Bisin sa wala pa ang pag-ampo gilitok o ang pangandoy sa kasingkasing napahibalo, ang grasya gikan kang Cristo mogula aron sa pagtagbo sa grasya nga nagabuhat diha sa tawhanong kalag.”—*Christ’s Object Lessons*, pp. 205, 206.

b. Unsa ang gibagulbol sa dili matinoohon nga mga Judeo ug unsa ang saad ang gisubli ni Jesus niadtong nagatuo diha Kaniya? Juan 6:41- 51.

PERSONAL SUBLI NGA MGA PANGUTANA

Biernes, Abril 4

1. Human sa milagro sa mga tinapay, unsay giplano sa mga sumusunod ni Cristo nga buhaton?
2. Ihubit ang dakong interes sa panon sa katawhan nga nagasunod kang Jesus.
3. Isaysay ang mga pulong ni Jesus diha sa Juan 6:29.
4. Unsang ilustrasyon ang gigamit ni Cristo aron sa paghulagway sa tinubdan sa espirituhanon nga kinabuhi?
5. Giunsa sa mga pangulong Judeo pagpakita sa ilang pag-ayad batok kang Cristo?

Ang Krisis sa Galilea

SAG-ULOHON NGA BERSEKULO: “Sa pagkamatuod, sa pagkamatuod, magaingon ako kanimo, Gawas nga kamo mokaon sa unod sa Anak sa tawo, ug moinom sa iyang dugo, walay kinabuhi diha kaninyo” (Juan 6:53)

Gisugyot nga Basahon:

Testimonies for the Church, vol. 5, pp. 573–580.

“Ang bugtong mahinungdanon nga pagtuo mao ang pagtuo nga nagadawat ug nagakinabuhi sa kamatuoran hangtud nga kini mahimong bahin sa persona ug ang motibong gahum sa kinabuhi ug paglihok.”—*Testimonies for the Church*, vol. 5, p. 576.

1. KINABUHI DIHA SA UNOD UG DUGO NI CRISTO

Domingo, Abril 6

- a. Unsay nahimong epekto sa mga pulong ni Cristo diha sa relihiyoso nga mga pangulo? Juan 6:52. Unsa may Iyang gisaysay mahitungod sa Iyang unod ug Iyang dugo? Juan 6:53- 55.

“Karon ang mga rabbi mipahayag nga masuk-anon, ‘Unsaon man niining Tawhana sa paghatag kanato sa Iyang unod aron pagakan-on?’ Sila naapektohan sa pagsabut sa Iyang mga pulong diha sa samang literal nga pagpanabut maingon kang Nicodemus sa dihang siya nangutana, Unsaon man sa usa ka tawo pagpakatawo pag-usab sa dihang siya tigulang na?’ Juan 3:4. Sa laing bahin sila nakasabut sa kahulogan ni Jesus, apan dili sila buot nga modawat niini. Pinaagi sa pagsayop sa Iyang mga pulong, sila nagdahom sa pagsupak sa katawhan batok Kaniya.”—*The Desire of Ages*, p. 389.

- b. Unsa man gyud ang buot ipasabut sa pagkaon sa unod ug pag-inom sa dugo sa Anak sa Dios? Juan 6:56, 57; 1 Juan 3:24; 5:12.

“Ang pagkaon sa unod ug pag-inom sa dugo ni Cristo mao ang pagdawat Kaniya ingon nga usa ka personal nga Manluluwas, magatuo nga Siya magapasaylo sa atong mga sala, ug nga kita hingpit diha Kaniya. Pinaagi sa pagtan-aw sa Iyang gugma, pinaagi sa pagpabilin diha niana, pinaagi sa pag-inom niini, nga kita mahimong umalambit sa Iyang kinaiya. Kon unsa ang pagkaon alang sa lawas, mao man si Cristo alang sa kalag.”—*Ibid.*, p. 389.

- a. Uban sa unsa pang dugang nga pagpahayag ang gihimo ni Jesus sa kahulogan sa Iyang mga pulong nga tin-aw kaayo? Juan 6:63.

“Ang pagkaon dili makabenepisyo kanato gawas kon kita mokaon niini, gawas kon kini mahimong kabahin sa atong pagkatawo. Mao man si Cristo mahimong walay bili kanato kon kita wala makaila Kaniya isip usa ka personal nga Manluluwas. Ang teoretikal nga kahibalo dili makahatag kanato ug kaayohan. Kinahanglan kita mokaon diha Kaniya, dawaton Siya ngadto sa kasingkasing, aron ang Iyang kinabuhi mahimong atong kinabuhi. Ang Iyang gugma, Iyang grasya, kinahanglan mahimong motuhop. . .

“Ang kinabuhi ni Cristo nga naghatag ug kinabuhi sa kalibutan anaa sa Iyang pulong. Pinaagi sa Iyang pulong nga si Jesus nag-ayo sa balatian ug naghingilin sa mga demonyo; pinaagi sa Iyang pulong nga Siya nagpalinaw sa dagat, ug nagbanhaw sa mga patay; ug ang mga tawo nagpamatuod nga ang Iyang pulong adunay gahum. Gisulti niya ang pulong sa Dios, ingon sa iyang gisulti sa tanan nga mga propeta ug mga magtutudlo sa Daang Tugon. Ang tibuk Biblia maoy pagpadayag ni Cristo, ug ang Manluluwas nagtinguha sa pagpahimutang sa pagtuo sa Iyang mga sumusunod diha sa pulong. Sa diha nga ang Iyang makita nga presensya kinahanglan nga kuhaon, ang pulong kinahanglan mao gayud ang ilang tinubdan sa gahum. Sama sa ilang Agalon, sila kinahanglan nga magkinabuhi ‘pinaagi sa matag pulong nga nagagula gikan sa baba sa Dios.’ Mateo 4:4.

“Ingon nga ang atong pisikal nga kinabuhi gisusteniha pinaagi sa pagkaon, mao man usab ang atong espirituhanong kinabuhi gisusteniha pinaagi sa pulong sa Dios. Ug ang matag kalag kinahanglan nga makadawat ug kinabuhi gikan sa pulong sa Dios alang sa iyang kaugalingon. Ingon nga kita kinahanglan mokaon alang sa atong kaugalingon aron makadawat ug sustansya, busa kita kinahanglan nga modawat sa pulong alang sa atong kaugalingon. Dili nato kini makuha pinaagi lamang sa paggamit sa hunahuna sa uban. Kinahanglan tun-an nato pag-ayo ang Biblia, nga mangayo sa Dios alang sa panabang sa Balaang Espiritu, aron masabtan nato ang Iyang pulong. Kinahanglan nga mokuha ta ug usa ka bersekulo, ug isentro ang hunahuna sa buluhaton sa pagtino sa hunahuna nga gibutang sa Dios niana nga bersekulo alang kanato. Kinahanglan nga kita magpabilin diha sa hunahuna hangtud nga kini mahimong atong kaugalingon, ug kita mahibalo ‘kon unsa ang giingon sa Ginoo.’”—*The Desire of Ages*, pp. 389, 390.

- b. Giunsa ni Propeta Jeremias paghubit kini nga kasinatian? Jeremias 15:16.

“Kon atong batonan ang Dios diha sa Iyang pulong, atong makita ang Iyang kaluwasan. . . . Atong dawaton ang pulong sa Dios. Kinahanglan nga atong kaanon ang pulong, kinabuhian ang pulong; kini mao ang unod ug dugo sa Anak sa Dios. Kinahanglan nga atong kan-on ang Iyang unod ug imnon ang Iyang dugo - dawaton pinaagi sa pagtuo ang Iyang espirituhanon nga mga kinaiya.”—*Testimonies for the Church*, vol. 6, pp. 51, 52.

- a. Unsang krisis ang nakapahagit sa pulong ni Cristo taliwala sa Iyang mga tinun-an - ug sa unsa nga kini usa ka pasidaan alang kanato karon? Juan 6:60, 61, 65, 66.

“Dako kaayo ang pagsulay. Ang kadasig niadtong nagtinguha sa pagkuha Kaniya pinaagi sa pwersa ug maghimo Kaniya nga hari nagkabugnaw. Kini nga diskurso sa sinagoga, sila mipahayag, nag-abli sa ilang mga mata. Karon wala na sila malimbongi. Sa ilang hunahuna ang Iyang mga pulong usa ka direkta nga pagsugid nga Siya dili mao ang Mesias, ug nga walay yutan-on nga mga ganti nga mabatonan gikan sa pagpakigdugtong Kaniya. Ilang giabi-abi ang Iyang gahum sa pagbuhat ug milagro; sila naghinamhinam nga mahigawas gikan sa balatian ug pag-antus; apan dili sila malooy sa Iyang nagsakripisyo sa kaugalingon nga kinabuhi. Wala silay pagtagad alang sa misteryosong espirituhanong gingharian nga Iyang gisulti. Ang dili sincero, ang hakog, nga nangita Kaniya, wala na magtinguha Kaniya. Kon Siya dili magdebuto sa Iyang gahum ug inpluwensya sa pagbaton sa ilang kagawasan gikan sa mga Romano, sila walay mahimo diha Kaniya. . . .

“Pinaagi sa mga pulong sa kamatuoran, ang tahop ibulag gikan sa trigo. Tungod kay sila hilabihan ka kawang ug nagpakamatarung sa kaugalingon aron modawat sa pagbadlong, hilabihan ka mahigugmaon sa kalibutan aron nga modawat sa usa ka kinabuhi nga mapaubsanon, daghan ang mitalikod kang Jesus. Daghan pa ang nagbuhat sa samang butang. Mga kalag gisulayan karon sama niadtong mga tinun-an didto sa sinagoga sa Capernaum. Sa diha nga ang kamatuoran pagadalhon ngadto sa kasingkasing, ilang makita nga ang ilang mga kinabuhi dili uyon sa kabubuton sa Dios. Ilang makita ang panginahanglan sa usa ka tibuok nga kausaban sa ilang mga kaugalingon; apan dili sila andam sa pagbaton sa buhat sa pagdumili sa kaugalingon. Busa sila masuko sa diha nga ang ilang mga sala madiskobrehan. Sila mamahawa nga nasilo, sama sa pagbiya sa mga tinun-an kang Jesus, nga nagbagulbol, ‘Kini usa ka lisud nga panultihon; kinsa may makapatalinghug niini?’ ”—*The Desire of Ages*, pp. 391, 392.

- b. Human nga kadtong mga tinun-an mibiya Kaniya, unsa may gipangutana ni Cristo ngadto sa napulo ug duha? Juan 6:67. Unsaon man nato pagpasibaw karon ang maalamon nga tubag ni Pedro? Juan 6:68, 69.

“Pinaagi sa maayo ug dautan nga taho, pinaagi sa kangitngit, pinaagi sa tanan nga pagsupak sa mga ahensya ni Satanas, ang adlaw sa pagkamatarung kalmado nga nagdan-ag, nagapangita sa dautan, nagasanta sa sala, ug nagapabuhi sa espiritu sa mapaubsanon ug mahinolsulon. ‘Ginoo, asa man kami moadto? Ikaw ang adunay mga pulong sa dayon nga kinabuhi.’ ”—*Testimonies to Ministers*, p. 285.

- a. Unsa may atong masulti sa kinatibuk-an mahitungod niadtong nanagpamiya kang Cristo? 1 Juan 2:19. Unsang makasusubo nga posisyon ang gibatonan sa namiya nga mga tinun-an?

“Samtang kadtong nawad-an ug pagbati nga mga tinun-an mitalikod kang Cristo, ang lahi nga espiritu ang mikontrolar kanila. Wala silay makita nga makapadani diha Kaniya nga sa makausa ilang nakit-an nga makapaikag kaayo. Ilang gipangita ang Iyang mga kaaway, tungod kay sila nahiyon sa ilang espiritu ug buhat. Ilang gisayop pagsabot ang Iyang mga pulong, gihimong bakak ang Iyang mga pahayag, ug gisupak ang Iyang mga motibo. Ilang gipaluyohan ang ilang tumong pinaagi sa pagtigom sa matag butang nga mahimong gamiton batok Kaniya; ug ang ingon nga kasuko napukaw pinaagi niining bakak nga mga taho nga nagbutang sa Iyang kinabuhi diha sa katalagman.”—*The Desire of Ages*, pp. 392, 393.

- b. Unsay nahitabo sa unodnon ug hunahuna nga mga tigpaminaw? Roma 16:17, 18.

“Pagdayeg ug pag-ulog-ulog mahimong makapahimuot. . . apan ang kamatuoran dili hinangponon; dili sila ganahan maminaw niini. Sa dihang ang panon sa katawhan misunod, ug ang panon gipakaon, ug ang singgit sa kadaugan nadungog, ang ilang mga tingog milanog diha sa pagdayeg; apan sa dihang ang nagaussia nga espiritu sa Dios nagpadayag sa ilang sala, ug nagmando kanila sa pagbiya niini, sila mitalikod sa kamatuoran, ug wala na magalakaw uban kang Jesus.”—*Ibid.*, p. 392.

- c. Gawas niadtong mibiya kang Jesus, kinsa pa ang nahimong sa tago nakighiusa uban sa Iyang mga kaaway - ug sa unsa nga kining taphaw nga pagsunod napadayag? Juan 6:70, 71.

“Ang diskurso ni Cristo didto sa sinagoga mahitungod sa tinapay sa kinabuhi mao ang nag-usab sa kasaysayan ni Judas. . . . Iyang nakita nga si Cristo nagtanyag ug espirituhanon inay kay sa kalibutanong kaayohan. Giisip niya ang iyang kaugalingon nga layo ug panan-aw, ug naghunahuna nga siya makakita nga si Jesus walay kadunggan, ug nga Siya dili makahatag ug hataas nga posisyon sa Iyang mga sumosunod. Determinado siya nga dili makighiusa pag-ayo sa iyang kaugalingon kang Cristo apan siya makahimo sa pagpalayo. Kinahanglan nga siya magbantay. Ug siya nagbantay gayud.

“Sukad nianang panahona siya mipahayag ug mga pagduhaduha nga nakapalibog sa mga tinun-an. Siya nagpasulod ug mga kontrobersya ug nagpahisalaag nga mga sentimento, nagsubli sa mga argumento giawhag sa mga eskriba ug mga Pariseo batok sa mga pag-angkon ni Cristo. Ang tanan nga gagmay ug dagkong mga kasamok ug mga krus, ang mga kalisdanan ug ang dayag nga mga babag sa pag-uswag sa ebanghelyo, gisabot ni Judas ingon nga mga ebidensya batok sa kamatinuoron niini.”—*Ibid.*, p. 719.

- a. Ihulagway ang taras sa kinaiya nga gisagop ni Judas. Juan 12:4- 6; Proverbio 3:32.

“[Si Judas] mopakita ug mga texto sa Kasulatan nga wala gayud koneksyon sa kamatuoran nga gipresentar ni Cristo. Kini nga mga texto, kon ibulag gikan sa ilang kadugtongan, nagpasamok sa mga tinun-an, ug nagdugang sa pagkaluya nga kanunay nagaduot diha kanila. Apan kining tanan nahitabo pinaagi kang Judas diha sa paagi nga daw makita nga siya matinumanon.”
—*The Desire of Ages*, p. 719.

- b. Unsang saad sa kanunay gipalig-on diha sa atong relihiyoso nga kasinatian - bisan diha sa kaso nga sama niining krisis sa Galilea? Romans 8:28.

“Sa dihang gipresentar ni Jesus ang masulayon nga kamatuoran nga maoy hinungdan sa daghan sa Iyang mga tinun-an sa pagtalikod, nasayud Siya kon unsa ang mahimong resulta sa Iyang mga pulong; apan Siya adunay katuyoan sa kalooy nga matuman. Iyang nakita nga sa takna sa tentasyon ang matag usa sa Iyang hinigugma nga mga tinun-an nga sa hilabihan pagasulayan. Ang Iyang pag-antus didto sa Getsemane, ang pagbudhi ug paglansang Kaniya sa krus, alang kanila maoy usa ka labing mapait nga pagsulay. Kon wala pay gihatag nga miaging pagsulay, daghan nga gipalihok sa mga hakog lamang nga mga motibo mahimo unta nga madugtong kanila. Sa diha nga ang ilang Ginoo gihukman didto sa hukuman; sa dihang ang panon sa katawhan nga midayeg Kaniya ingon nga ilang hari mibiaybiay kaniya ug miyubit Kaniya; sa dihang ang nagbiaybiay nga panon sa katawhan misinggit, ‘Ilang Siya sa krus!’— sa dihang ang ilang kalibutanon nga mga ambisyon napakyas, kining mga tawo nga nagapangita lamang sa kaugalingon, pinaagi sa pagbiya sa ilang pagkamaunongon kang Jesus, nagdala ngadto sa mga tinun-an usa ka mapait, mabug-at sa kasingkasing nga kasubo, dugang pa sa ilang kasubo ug pagkabalo diha sa pagkaguba sa ilang pinakahinam nga paglaum. Niadtong takna sa kangitngit, ang panig-ingnan niadtong mibiya Kaniya magdala unta sa uban ngadto kanila. Apan si Jesus gidala niini nga krisis samtang nga pinaagi sa Iyang personal nga presensya Siya makapahimo pa sa pagpalig-on sa pagtuo sa Iyang tinuod nga mga sumosunod.”—*Ibid.*, p. 394.

PERSONAL SUBLI NGA MGA PANGUTANA

Biernes, Abril 11

1. Sa unsang paagi nga kita “magkaon sa unod sa Anak sa tawo, ug moinom sa Iyang dugo”?
2. Unsay ipasabot sa pagtan-aw kang Jesus?
3. Ngano nga ang uban napandol sa mga pulong ni Cristo?
4. Unsa ang ilang gibuhad pagkahuman—ug sa unsang paagi kini usa ka pasidaan alang kanato?
5. Ihulagway ang espirituhanon nga kahimtang ni Judas human niini, ug ang epekto niini.

Si Jesus diha sa Fiesta sa Mga Tabernaculo

SAG-ULOHON NGA BERSEKULO: “Ug nahibulong sila sa iyang pagpanudlo: kay ang iyang pagpamulong inubanan man sa kagahum” (Lucas 4:32).

Gisugyot nga Basahon: *Thoughts From the Mount of Blessing*, pp. 31–35.

“Si Jesus nasayud sa panginahanglan sa kalag. Ang kahalangdon, bahandi, ug dungog dili makatagbaw sa kasingkasing. ‘Kon bisan kinsa nga tawo giuhaw, umari siya Kanako.’ Ang datu, ang kabus, ang taas, ang ubos, managsama nga giabiabi. Nagsaad Siya sa paghumpay sa nabug-atan nga hunahuna, sa paghumpay sa nagsubo, ug sa paghatag ug paglaum sa nawad-an ug paglaum.”—*The Desire of Ages*, p. 454.

1. ANG KINABUHI NI JESUS SA PULUY-ANAN

Domingo, Abril 13

- a. Unsang seryoso nga hagit ang giatubang ni Jesus diha sa Iyang kaugalingong puluyan? Juan 7:5.

“Sa sayo kaayo nga edad, si Jesus nagsugod sa pagbuhat alang sa Iyang kaugalingon diha sa pagporma sa Iyang kinaiya, ug bisan ang pagtahud ug gugma alang sa Iyang mga ginikanan dili makapaliso Kaniya gikan sa pagsunod sa pulong sa Dios. ‘Kini nahisulat’ maoy Iyang rason sa matag buhat nga lahi gikan sa kostumbre sa pamilya. Apan ang inpluwensya sa mga rabbi naghimo sa Iyang kinabuhi nga usa ka mapait. Bisan diha sa Iyang pagkabatan-on kinahanglan Siya nga makakat-on sa lisud nga leksyon sa kahilom ug mapailubon nga paglahutay.

“Ang iyang mga igsoon, ingon sa pagtawag nga mga anak ni Jose, midapig sa mga rabbi. Sila mipugos nga ang mga tradisyon kinahanglan nga pagatumanon, nga daw ingon nga kini ang mga kinahanglanon sa Dios. Ilang gitamod pa gani ang mga kalagdaan sa mga tawo ingon nga labaw pa kay sa pulong sa Dios, ug sila sa hilabihan nasamok gayud sa tin-aw nga pagpanabot ni Jesus sa pag-ila tali sa bakak ug sa tinuod. Ang iyang strikto nga pagsunod sa kasugoan sa Dios ilang gikondena ingon nga kagahi sa ulo. Sila natingala sa kahibalo ug sa kaalam nga Iyang gipakita diha sa pagtubag sa mga rabbi. Sila nahibalo nga Siya wala nakadawat ug instruksiyon gikan sa maalamon nga mga tawo, apan ila gayud nga nakita nga Siya mao ang magtutudlo kanila. Ilang nakita nga ang Iyang edukasyon maoy usa ka mas taas nga matang kay sa ilang kaugalingon. Apan wala nila makita nga siya adunay agianan ngadto sa kahoy sa kinabuhi, ang tinubdan sa kahibalo diin sila walay alamag.”—*The Desire of Ages*, p. 86.

- a. Unsa nga sugyot ang gihimo sa mga igsoon ni Cristo ngadto Kaniya sa pagpaabut sa tinuig nga Fiesta sa Mga Tabernakulo? Juan 7:3, 4.

“[Ang kang Cristo] nga mga igsoon naghunahuna nga usa ka sayop alang Kaniya ang pagpahilayo sa bantugan ug edukado nga mga tawo sa nasud. Gibati nila nga kini nga mga tawo anaa gayud sa husto, ug nga si Jesus anaa gayud sa sayop sa pagbutang sa Iyang kaugalingon sa pagpakigbatok kanila. Apan ilang nasaksihan ang Iyang walay ikasaway nga kinabuhi, ug bisan nga sila wala mahanay sa ilang kaugalingon uban sa Iyang mga tinun-an, sila napasantop pag-ayo sa Iyang mga buhat. Ang iyang pagkainila sa Galilea nakapatagbaw sa ilang ambisyon; sila naglaum sa gihapon nga Siya mohatag usa ka ebidensya sa Iyang gahum nga mogiya sa mga Pariseo sa pagtan-aw nga Siya mao kon unsa ang Iyang giangkong. Unsa kaha kon Siya mao ang Mesias, ang Prinsipe sa Israel! Ilang gipangga kini nga hunahuna uban ang mapahitas-on nga katagbawan.

“Nabalaka kaayo sila mahitungod niini mao nga ilang giawhag si Cristo sa pag-adto sa Jerusalem. ‘Pahawa dinhi,’ sila miingon, ‘ug adto sa Judea, aron nga ang Imong mga tinun-an makakita usab sa mga buhat nga Imong ginah mo. Tungod kay walay tawo nga nagabuhat sa bisan unsa sa tago, ug siya sa iyang kaugalingon nagtinguha nga maila sa dayag. Kon Imong gibuhat kining mga butanga, ipakita ang imong kaugalingon ngadto sa kalibutan.’ Ang pulong ‘kon’ nagpahayag ug pagduhaduha ug pagkawalay pagtuo. Kini sila nagbutang ug katalawan ug kahuyang ngadto Kaniya. Kon Siya nahibalo nga Siya mao ang Mesias, ngano nga kining katingad-an gireserba ug wala himoa? Kon Siya nakabaton gayud sa ingon nga gahum, ngano nga dili moadto sa Jerusalem nga maisugon, ug ipahayag ang Iyang mga pag-angkong? Nganong dili magpasundayag sa Jerusalem sa kahibulongan nga mga buhat nga gibalita mahitungod Kaniya didto sa Galilea? Ayaw pagtago sa hilit nga mga probinsya, miingon sila, ug magbuhat sa imong gamhanang mga buhat alang sa kaayohan sa mga ignorante nga mga mag-uuma ug mangingisda. Ipakita ang imong kaugalingon didto sa kaulohan, daniha ang suporta sa mga sacerdote ug mga pangulo, ug hiusahon ang nasud sa pagtukod sa bag-ong gingharian.”—*The Desire of Ages*, p. 450.

- b. Ihulagway ang problema nga kanunay nga giatubang sa mga maaghop. Salmo 86:14.

“Kining mga igsoon ni Jesus nangatarungan gikan sa hakog nga motibo nga sagad makaplagan diha sa mga kasingkasing niadtong mga ambisyoso sa pagpasundayag. Kini nga espiritu mao ang nagharing espiritu sa kalibutan. Sila napandol tungod kay, imbes mangita ug temporaryo nga trono, Si Cristo nagpahayag sa Iyang kaugalingon nga mao ang tinapay sa kinabuhi. Sila sa hilabihan nabalo sa dihang daghan sa Iyang mga tinun-an ang mibiya Kaniya. Sila mismo sa ilang kaugalingon miliso gikan Kaniya aron sa pag-ikyas sa krus sa pag-ila kon unsa ang gipadayag sa Iyang mga buhat — nga Siya mao ang Pinadala sa Dios.”—*Ibid.*, p. 451.

- a. Unsang nagkasumpaki nga mga opinyon ang mitungha mahitungod kang Jesus? Juan 7:11, 12.

“Gikan sa Jerusalem ang taho sa mga milagro ni Cristo mikaylap bisan asa ang mga Judeo nagtibulaag; ug bisan nga sa daghang mga bulan Siya wala gikan sa mga fiesta, ang interes diha Kaniya wala mawala. Daghan gikan sa tanang bahin sa kalibutan mitungha ngadto sa Fiesta sa mga Tabernakulo sa paglaum nga makita Siya. Diha sa sinugdanan sa fiesta daghang mga pangutana ang gihimo alang Kaniya. Ang mga Pariseo ug ang mga punoan nagpaabut Kaniya nga motungha, nga nagdahom nga makabaton ug kahigayonan sa paghukom Kaniya. Sila matinguhaon nga nangutana, ‘Hain man Siya?’ apan walay nahibalo. Ang hunahuna mahitungod Kaniya mao ang nangibabaw diha sa tanan nga mga hunahuna. Pinaagi sa kahadlok sa mga sacerdote ug mga punoan, walay usa nga nangahas sa pag-ila Kaniya ingon nga Mesias, apan bisan diin adunay hilom apan mainiton nga panaghisgot mahitungod Kaniya. Daghan ang nanalipod Kaniya ingon nga usa nga gipadala gikan sa Dios, samtang ang uban nagsaway Kaniya ingon nga usa ka maglilimbong sa katawhan.”—*The Desire of Ages*, pp. 451, 452.

- b. Giunsa ni Jesus pagpahilom ang nagkasumpaki nga mga opinyon mahitungod sa Iyang kaugalingon? Juan 7:14-18; Lucas 4:32.

“Sa tungatunga sa fiesta, sa diha nga ang kahinam mahitungod Kaniya diha na sa gitag-on, Siya misulod sa sawang sa templo sa atubangan sa panon sa katawhan. Tungod sa Iyang pagkawala sa fiesta, kini ginapugos nga dili Siya mangahas sa pagbutang sa Iyang kaugalingon diha sa gahum sa mga sacerdote ug mga punoan. Ang tanan nahibulong sa Iyang presensya. Ang matag tingog nahilom. Ang tanan natingala sa dignidad ug kaisog sa Iyang paglihok sa taliwala sa gamhanang mga kaaway nga giuhaw alang sa Iyang kinabuhi.

“Sa ingon nga pagbarog, ang sentro sa atraksyon nianang dakong panon, si Jesus namulong kanila sa paagi nga wala pay tawo nga nakahimo sa ingon. Ang iyang mga pulong nagpakita ug kahibalo sa mga balaod ug mga institusyon sa Israel, sa sakripisyo nga serbisyo ug sa mga pagtulon-an sa mga manalagna, nga labaw pa kay nianang sa mga sacerdote ug mga rabbi. Iyang gibungkag ang mga babag sa pormalismo ug tradisyon. Ang mga talan-awon sa umalabut nga kinabuhi daw giladlad diha sa Iyang atubangan. Isip usa nga nakakita sa dili Makita, Siya naghisgut sa yutan-on ug sa langitnon, ang tawhanon ug ang diosnon, uban sa positibo nga awtoridad. Ang Iyang mga pulong maoy labing klaro ug makapakonbinsir; ug usab, ingon didto sa Capernaum, ang mga tawo natingala diha sa Iyang pagpanudlo; ‘tungod kay ang Iyang pulong adunay gahum.’ Lucas 4:32 . . . Ang tanan natingala sa Iyang kahibalo sa balaod ug sa mga tagna.”—*Ibid.*, pp. 452, 453.

- a. Unsa may namatikdan ni Jesus diha sa mga rabbi ug unsang pangutana ang Iyang gibutang ngadto kanila? Juan 7:19.

“Si Jesus mihatag sa mga rabbi ug ebidensya sa Iyang pagkadios pinaagi sa pagpakita nga Siya makabasa sa ilang mga kasingkasing. Sukad sa pag-ayo didto sa Betsaida sila naglaraw sa Iyang kamatayon. Sa ingon sila mismo nagalapas sa balaod nga ilang giangkong nga gidepensahan. ‘Wala ba si Moises maghatag kaninyo ug kasugoan,’ Siya miingon, ngani wala kaninyoy nagatuman sa kasugoan? Nganong nagtinguha man kamo sa pagpatay Kanako?’ ”—*The Desire of Ages*, p. 456.

- b. Diha sa ilang tubag kang Cristo, sa unsang butang ang mga rabbi nag-akusar Kaniya - ug giunsa man Niya pagtubag? Juan 7:20-23.

“Ngadto niini nga sugyot [nga ang Iyang katingalahang mga buhat giaghat sa usa ka dautang espiritu] Si Cristo wala magtagad. Siya mipadayon sa pagpakita nga ang Iyang buhat sa pagpang-ayo sa Betsaida nahiuyon sa balaod sa Igpapahulay, ug nga kini gipakamatarung pinaagi sa interpretasyon nga ang mga Judeo mismo nagbutang diha sa balaod. Siya miingon, ‘Busa si Moises naghatag kaninyo sa sirkunsisyon; . . . ug sa adlaw nga igpapahulay kamo nagsirkunsidar sa usa ka tawo.’ Sumala sa balaod, ang matag bata kinahanglan nga tulion sa ikawalo nga adlaw. Kon ang tinudlong panahon matunong sa Igpapahulay, nan ang seremonyas kinahanglan nga pagahimoon. Unsa pa ka labaw nga kini nahiuyon sa espiritu sa balaod sa pag-ayo sa tibuok lawas sa usa ka tawo ‘sa adlaw nga Igpapahulay.’ ”—*Ibid.*, pp. 456, 457.

- c. Isaysay ang halapad nga kahulogan sa sunod nga pasidaan ni Cristo. Juan 7:24.

“Ang mga pangulo nahilom; ug daghan sa katawhan ang mipahayag, ‘Dili ba mao ni Siya, nga inyong gitinguha sa pagpatay? Apan, tan-awa, maisugon Siya nga nagasulti, ug wala silay gisulti ngadto Kaniya. Nasayud ba gayud ang mga kadagkoan nga kini mao si Cristo?’ ”—*Ibid.*, p. 457.

“[Si Cristo] wala magtan-aw diha sa gawasnon nga panagway; Siya dili magahukom ingon sa paghukom sa tawo. Dili Niya ginabilihan ang tawo sumala sa iyang ranko, talento, edukasyon, o posisyon. ‘Niining tawhana motan-aw Ako,’ Siya miingon, ‘bisan pa kaniya nga kabus ug adunay Espiritu nga mahinolsulon, ug nga nagapangurog tungod sa akong pulong.’ ”—*The Signs of the Times*, October 21, 1897.

- a. Giunsa sa Kasulatan paghulagway ang utoknon nga kahimtang sa katilingban dinhi niini nga kalibutan—sagad sa nakita diha sa karaang mga panahon, apan labina karon? Isaias 59:14, 15.

“Ang mga ahensya sa dautan nagkahiusa sa ilang mga pwersa ug nagpalig-on. Sila nagapalig-on alang sa katapusang dako nga krisis. Dagko nga mga kausaban sa dili madugay magakahitabo dinhi sa atong kalibutan, ug ang katapusang mga kalihokan mahimong paspas. . . .

“Ang kaaway nagmalampuson sa pagbalit-ad sa hustisya ug nagpuno sa mga kasingkasing sa mga tawo uban sa tinguha alang sa hinakog nga ganansya. . . . Ang tiyabaw sa gigutom nga katawhan misaka atubangan sa Dios, samtang pinaagi sa matag paagi sa pagdaugdaug ug panghukhok ang mga tawo nagtapok ug dako nga mga bahandi.”—*Testimonies for the Church*, vol. 9, pp. 11, 12.

- b. Taliwala sa kaguliyang, ngano nga kita makasalig sa mga paagi sa Dios? Isaias 55:8, 9.

“Bisan pa nga ang may kinutoban nga mga hunahuna sa mga tawo dili paigo sa pagsulod ngadto sa mga konseho sa Usa nga Walay Kinutoban, o sa pagsabot sa hingpit sa pagbuhat sa Iyang mga katuyoan, apan kasagaran kini tungod sa pipila ka kasaypanan o pagpasagad sa ilang kaugalingon nga bahin nga sila sa ingon dili kaayo makasabot sa mga mensahe sa Langit. Kanunay nga ang mga hunahuna sa mga tawo, ug bisan sa mga ulipon sa Dios, nabutaan pag-ayo pinaagi sa tawhanon nga mga opinyon, ang mga tradisyon ug bakak nga pagtulon-an sa mga tawo, nga sila makahimo lamang sa bahin nga pagsabot sa dagkong mga butang nga Iyang gipadayag diha sa Iyang pulong.”—*The Great Controversy*, pp. 344, 345.

“Ang tinguha sa Dios alang sa Iyang mga anak mas taas pa kay sa maabot sa labing taas nga hunahuna sa tawo. Iyang gihatag diha sa Iyang balaang balaod ang kopya sa Iyang kinaiya.”—*Testimonies for the Church*, vol. 8, p. 63.

PERSONAL SUBLI NGA MGA PANGUTANA

Biernes, Abril 18

1. Ihulagway ang palibot sa panimalay diin gimatuto si Jesus.
2. Sa unsang paagi ang gawi nga gipakita sa mga igsoon ni Cristo sagad nga ginasubli karon?
3. Unsang magkasumpaki nga mga opinyon ang gipakatag mahitungod kang Jesus?
4. Isaysay ang espiritu nga gipakita sa mga rabbi ngadto kang Jesus.
5. Ihulagway ang dakong kalainan tali sa mga dalan sa tawo ug kadtong iya sa Dios.

Walay Usa nga Nagsulti sama Niining Tawhana

SAG-ULOHON NGA BERSEKULO: “Ang mga opisyal mitubag nga nanag-ingon, Wala pa gayud tawo nga nakasulti sama niining tawhana” (Juan 7:46).

Gisugyot nga Basahon:

Testimonies to Ministers, pp. 506–512.

“Ang pagpanabut ug pagdawat sa kamatuoran, miingon Siya, wala kaayo magdepende diha sa hunahuna kay sa diha sa kasingkasing. Ang kamatuoran kinahanglan pagadawaton diha sa kalag; kini nagkinahanglan sa pagpasakop sa kabubut-on.”—*The Desire of Ages*, p. 455.

1. ANG INTERES SA KATAWHAN DIHA KANG JESUS

Domingo, Abril 20

- a. Diha sa pagkadungog ug pagkakita nga si Jesus nagwali sa dayag, unsa may gipangutana sa pipila sa mga Judeo? Juan 7:25, 26.

“Daghan sa taliwala sa mga tigpaminaw ni Cristo nga nagpuyo diha sa Jerusalem, ug kinsa dili ignorante sa mga laraw sa mga pangulo batok Kaniya, nagabati sa ilang mga kaugalingon nga nadala ngadto Kaniya pinaagi sa dili masupak nga gahum. Ang konbiksyon nagtandog diha kanila nga Siya Anak sa Dios.”—*The Desire of Ages*, p. 457.

- b. Giunsa ni Satanas pagbuhat diha sa mga pangulo aron sa pagpaukyab sa pagduhaduha? Juan 7:27.

“Si Satanas andam sa pagsugyot ug pagduhaduha; ug alang niini ang dalan naandam pinaagi sa ilang kaugalingong sayop nga mga ideya sa Mesias ug sa Iyang pag-abot. Gituohan sa kadaghanan nga si Cristo matawo sa Betlehem, apan human sa usa ka panahon Siya mawala, ug sa Iyang ikaduhang pagpadayag walay makahibalo kon diin Siya gikan. Daghan ang nagtuo nga ang Mesias walay natural nga relasyon sa katawhan. Ug tungod kay ang inila nga pagsamkon sa himaya sa Mesias wala makita diha kang Jesus nga Nazaretnon, daghan ang namati sa sugyot, ‘Apan nahibaloan nato kining Tawhana kon diin Siya gikan: apan sa dihang moabot si Cristo, walay tawo nahibalo kon diin Siya gikan.’”—*Ibid*.

- a. Diha sa pagbasa sa mga hunahuna sa Iyang maduhaduhaon nga mga tigpaminaw, unsa may gisulti ni Jesus ngadto kanila? Juan 7:28.

“Samtang sila nagduhaduha tali sa pagduhaduha ug pagtuo, si Jesus midawat sa ilang mga hunahuna ug mitubag kanila: Kamo nakaila Kanako, ug kamo nahibalo diin Ako gikan: ug Ako wala moanhi sa Akong Kaugalingon, kondili Siya nga nagpadala Kanako tinuod, nga wala ninyo hiilhi.’ Nag-angkon sila ug kahibalo kon unsa ang gigikanan ni Cristo, apan sila anaa sa hingpit nga pagkawalay alamag niini. Kon sila nagkinabuhi sumala sa kabubut-on sa Dios, nakaila unta sila sa Iyang Anak sa dihang Siya nagpakita kanila.”—*The Desire of Ages*, p. 457.

- b. Kulang sa mga argumento aron sa pagsupak kang Jesus, sa unsa nga paagi ang mga pangulo sa Judeo naningkamot sa pagpahilom Kaniya? Juan 7:30 (unang bahin). Sa tinud-anay lang, nganong dili man sila makadakop Kaniya? Juan 7:30 (katapusan nga bahin).

“Ang mga tigpaminaw dili makasabot sa mga pulong ni Cristo. Sa kaklaro sila usa ka pagsubli sa pag-angkon nga Iyang gihimo sa atubangan sa Sanhedrin daghang mga bulan nga minglabay, sa dihang Iyang gipahayag ang Iyang kaugalingon nga Anak sa Dios. Ingon sa mga magmamando kaniadto misulay sa paglikos sa Iyang kamatayon, busa karon naninguha sila sa pagdakop Kaniya; apan sila gipugngan sa usa ka dili makita nga gahum, nga nagbutang ug limitasyon sa ilang kasuko, nga nag-ingon kanila, kutob ra kamo dinhi, ug dili na sa unahan.”—*Ibid.*

- c. Giunsa sa kadaghanan pagpahayag ang ilang pagtuo kang Jesus — ug unsay plano sa mga pangulo sa higayon nga ilang naamgohan ang simpatiya sa mga tawo alang Kaniya? Juan 7:31, 32.

“Ang mga pangulo sa mga Pariseo, nga matinguhaon nga nagbantay sa dagan sa mga panghitabo, nakuha ang mga pagpahayag sa simpatiya taliwala sa panon. Nagdali ngadto sa pangulo nga sacerdote, sila nagplano sa pagdakop Kaniya. Bisan pa niana sila nagpahalona, sa pagkuha Kaniya sa diha nga Siya nag-inusara; kay wala sila mangahas sa pagdakop Kaniya diha sa presensya sa katawhan.”—*Ibid.*, pp. 457, 458.

- a. Diha sa katapusang adlaw sa fiesta, unsang matahom nga ilustrasyon ang gigamit ni Jesus aron sa pagtanyag ug kahumpayan ngadto sa mga kalag nga gikapuyan sa sala? Juan 7:37, 38.

“Ang kasingkasing nga modawat sa pulong sa Dios dili sama sa linaw nga moalisngaw, dili sama sa busloto nga sudlanan nga nawad-an sa iyang bahandi. Kini sama sa sapa sa bukid, gipakaon pinaagi sa dili mapakyas nga mga tuboran, kansang bugnaw, naggilakgilak nga mga tubig nagaambak gikan sa bato ngadto sa bato, nga nagapapresko sa gikapoy, giuhaw, nabug-atan. Kini sama sa suba nga kanunay nagdagayday ug, samtang kini nagaabanti, nahimong mas lawom ug mas lapad, hangtud nga ang iyang nagahatag ug kinabuhi nga katubigan mokaylap sa tibuok yuta. Ang sapa nga nagaawit sa iyang agianan nagbilin sa iyang gasa sa pagkalunhaw ug mas presko nga lunhaw, ang mga kahoy adunay mas daghang kabulakan, ang mga bulak mas daghan. Sa diha nga ang yuta naghay-ad nga hubo ug kayumanggi ilawom sa makapaso nga kainit, ang usa ka linya sa kadahonan ang nagtimaan sa agianan sa suba.

“Mao man usab kini sa tinuod nga anak sa Dios. Ang relihiyon ni Cristo nagpadayag sa iyang kaugalingon ingon nga usa ka makapalagsik, makapatuhop nga prinsipyo, usa ka buhi, nagabuhat, espirituhanong kusog. Sa dihang ang kasingkasing naablihan ngadto sa langitnong inpluwensya sa kamatuoran ug gugma, kini nga mga prinsipyo modagayday pag-usab sama sa mga sapa sa disyerto, nga mopakita sa pagkamabungahon diin karon ang pagkawalay bunga ug pagkagutom.”—*Prophets and Kings*, pp. 233, 234.

“‘Kon adunay si bisan kinsa giuhaw’ alang sa masaligon nga paglaum, alang sa kaluwasan gikan sa dautan nga mga kahiligan, si Cristo nag-ingon, ‘umari siya Kanako, ug paimna.’ Juan 7:37.”—*The Ministry of Healing*, p. 179.

- b. Unsaon nga kini nga inbitasyon sa dugang pa masabtan? Juan 7:39.

“Gipresentar ni Cristo ang mga prinsipyo sa kamatuoran diha sa ebanghelyo. Sa Iyang pagtudlo makahimo kita sa pag-inom sa putli nga mga sapa nga nagdagayday gikan sa trono sa Dios.”—*Testimonies for the Church*, vol. 8, p. 309.

“Ang atong gikinahanglan mao ang usa ka buhi nga relihiyon. Usa ka indibidwal nga gipaluag nga mga pagsabot sa katungdanan, kansang kalag anaa sa pakigduktong sa Dios ug kinsa puno sa kasibot alang kang Cristo, makahatag ug gamhanang inpluwensya alang sa kaayohan. Siya magainom sa dili mabaw, lapokon, hugaw nga sapa, apan gikan sa putli, lawom nga tubig sa tuboran; ug siya makatunol ug bag-ong espiritu ug gahum ngadto sa iglesya. Sa dihang ang pag-ataki gikan sa gawas magadugang, ang Dios magpabaskog sa Iyang iglesya pinaagi sa sagrado, solemne nga mga kamatuoran nga ilang gitooan. Ang Balaan nga Espiritu gikan sa langit, nga nagabuhat uban sa mga anak nga lalake ug mga anak nga babaye sa Dios, mobuntog sa mga babag ug mogunit sa bantaaw nga dapit batok sa kaaway. Ang Dios adunay dagkong mga kadaugan nga gitagana alang sa Iyang nagahigugma sa kamatuoran, nagtuman sa kasugoan nga katawhan.”—*Ibid.*, vol. 5, p. 581.

- a. Ingon nga resulta sa paghisgut ni Cristo sa tubig sa kinabuhi, unsa may giingon sa kadaghanan - ug ngano? Juan 7:40 (itandi sa Deuteronomio 18:15).

- b. Samtang nga ang uban nadasig uban sa paglaum tungod sa maong pagdahum, unsa may reaksiyon sa uban? Juan 7:41-44.

- c. Unsang sugo ang nadawat sa mga opisyal gikan sa ilang mga pangulo? Juan 7:45. Nganong dili nila kaya nga dakpon si Jesus? Juan 7:46.

“Diha sa katapusang adlaw sa fiesta, ang mga sulogoon nga gipadala sa mga sacerdote ug mga punoan aron sa pagdakop kang Jesus, namalik nga wala Siya madala. Sila gisukna uban sa kasuko, ‘Nganong wala Ninyo Siya madala?’ Uban ang solemne nga panagway sila mitubag, ‘Wala pa gayud ing tawo nga nagsulti sa ingon.’

“Napagahi ingon sa ilang mga kasingkasing, sila napahumok sa Iyang mga pulong. Samtang Siya nagasulti diha sa sawang sa templo, sila nagpaduol, sa paglit-ag nga mahimong isumbat batok Kaniya. Apan sa dihang sila namati, ang katuyoan diin sila gipadala nalimtan. Sila nagbarug ingon nga mga tawo nga misulod. Si Cristo nagpadayag sa Iyang kaugalingon ngadto sa ilang mga kalag. Sila nakakita nga diin ang mga sacerdote ug mga pangulo dili makakita – ang pagkatawhanon natugob uban sa himaya sa pagkabalaan.”—*The Desire of Ages*, p. 459.

“[Si Cristo] migamit sa mga butang sa kinaiyahan diin sila hinasa, aron sa paghulagway sa balaan nga kamatuoran. Ang yuta sa kasingkasing sa ingon naandam sa pagdawat sa maayong binhi. Iyang gipabati sa Iyang mga tigpaminaw nga ang Iyang mga interes nahiusa uban sa ilaha, nga ang iyang kasingkasing nagapitik sa simpatiya kanila diha sa ilang mga kalipay ug kaguol. Diha sa samang panahon ilang nakita diha Kaniya ang pagpadayag sa gahum ug pagkalabaw nga mas labaw kay sa gipanag-iya sa ilang labing gipasidunggan nga mga rabbi. Ang mga pagtulon-an ni Cristo maila uban sa usa ka kayano, dignidad, ug gahum nga wala nila nahibal-an kaniadto, ug ang ilang wala tuyoa nga pahayag mao: ‘Wala gayoy tawo nga nakasulti sama niining Tawhana.’ Ang mga tawo naminaw Kaniya nga malipayon; apan ang mga sacerdote ug ang mga punoan — sa ilang kaugalingon dili matitud-anon sa ilang katungdanan ingon nga mga magbalantay sa kamatuoran — nagdumot kang Cristo tungod sa grasya nga gipadayag, nga nagganoy sa panon sa katawhan palayo gikan kanila aron sa pagsunod sa Kahayag sa kinabuhi. Pinaagi sa ilang impluwensya ang nasud nga Judeo, napakyas sa pag-ila sa Iyang diosnong kinaiya, misalikway sa Manunubos.”—*Testimonies for the Church*, vol. 5, p. 747.

- a. Giunsa sa pangulo nga mga sacerdote ug mga Pariseo pagbadlong ang mga opisyal? Juan 7:47-49.
- b. I-asoy ang panag-storyahay nga misunod uban kang Nicodemo - nga nagpakita sa iyang pagtubo sukad sa iyang gabii nga pagpakighinabi kang Cristo diha sa Juan kapitulo 3. Juan 7:50-52.

“[Si Nicodemo] nagtipig sa kamatuoran diha sa iyang kasingkasing, ug sulod sa tulo ka tuig adunay dyutay lamang makita nga bunga. Apan samtang si Nicodemo wala sa dayag moila kang Cristo, siya diha sa konseho sa Sanhedrin sa makadaghan nagsanta sa mga laraw sa mga sacerdote aron sa paglaglag Kaniya.”—*The Acts of the Apostles*, p. 104.

“Ang leksyon nga gihatag ni Cristo kang Nicodemo [sa iyang gabii nga pagbisita diha sa Juan kapitulo 3] wala makawang. Ang konbiksyon misantop sa iyang hunahuna, ug diha sa iyang kasingkasing gidawat niya si Jesus. Sukad sa iyang pakighinabi sa Manluluwas, siya sa kamatinguhaon nagsusi sa mga Kasulatan sa Daang Tugon, ug nakakita siya sa kamatuoran nga napahalona diha sa matuod nga han-ay sa ebanghelyo.

“Ang pangutana nga gipangutana niya maalamon, ug makadayeg unta sa iyang kaugalingon ngadto niadtong nagdumala sa konseho kon wala pa sila malingla sa kaaway. Apan sila napuno pag-ayo sa pagpihig nga walay argumento pabor kang Jesus nga Nazaretnon, bisan unsa ka makapakonbinsir, adunay bisan unsa nga gibug-aton uban kanila. Ang tubag nga nadawat ni Nicodemo mao, ‘Taga-Galilea ka ba usab? Susiha, ug tan-awa: kay gikan sa Galilea walay propeta nga motungha.’

“Ang mga sacerdote ug mga magmamando nalimbongan, ingon sa gitinguha ni Satanas kanila, ngadto sa pagtuo nga si Cristo mitungha gikan sa Galilea. Ang pipila nga nasayud nga siya natawo sa Betlehem, nagpakahilom, aron nga ang kabakakan dili maagaw sa gahum niini.”—*The SDA Bible Commentary* [E. G. White Comments], vol. 5, p. 1136.

PERSONAL SUBLI NGA MGA PANGUTANA

Biernes, Abril 25

1. Nganong nadani ni Jesus ang pagtagad ug pagtahod sa mga tawo?
2. Giunsa sa Judeo nga mga magmamando pagpadayon sa pagsulay sa pagpahunong kang Jesus?
3. Unsang publikong hangyo ang gihimo ni Jesus sa katapusang adlaw sa fiesta?
4. Isaysay ang dakong kontrobersiya nga misunod ingon nga resulta.
5. Naghunahuna ug mga tawo nga akong nailhan, unsa ang akong mahinumduman mahitungod kang Nicodemo?

Halad sa Unang Sabado

SABADO, MAYO 3, 2025



Alang sa Mga Misyon sa Kalibutan

Karon adlaw, ang napanahon nga mensahe milanog:

“Ang espiritu sa misyonaryo kinahanglang buhion sa atong mga simbahan. Matag membro sa iglesya kinahanglang magtuon unsaon pagtabang sa pagpadayon sa buluhaton sa Dios, diha sa mga misyon sa haduol ug sa langyaw nga mga nasud. Halos gamay pa kaayo nga bahin sa bulohaton ang nahimo nga angay buhaton diha sa kaumhang misyonero. Ang Dios nagtawag sa Iyang mga magbubuhat sa pagdugang ug bag-ong teritoryo alang Kaniya. Adunay matambok nga mga kaumahan nga naghulat alang sa matinumanong magbubuhat. Ug ang nag-alagad nga mga manulonda makigtambayayong sa matag membro sa iglesya nga maghago nga dili hakog alang sa Agalon.

“Ang iglesya ni Cristo dinhi sa yuta giorganisar alang sa misyonaryo nga katuyoan, ug ang Ginoo nagtinguha nga makita ang tibuok iglesya nga maghimo ug mga pamaagi diin ang taas ug ubos, adunahan ug kabos, makadungog sa mensahe sa kamatuoran. Dili tanan gitawag sa personal nga pagtrabaho sa langyaw nga kaumahan, apan ang tanan makahimo ug usa ka butang pinaagi sa ilang mga pag-ampo ug sa ilang mga gasa sa pagtabang sa misyonaryo nga bulohaton.

“Usa ka Amerikanong negosyante nga usa ka sincero nga Cristohanon, sa pagpakig-estorya sa usa ka kaubang trabahante miingon nga siya mismo nagtrabaho kang Cristo kaluhaan ug upat ka oras sa adlaw. ‘Sa tanan nakong relasyon sa negosyo,’ siya miingon, ‘Naningkamot ko sa pagrepresentar sa akong Agalon. Samtang naa koy kahigayonan, naningkamot ko nga madaug ang uban ngadto Kaniya. Tibuok adlaw nagtrabaho ko para kang Cristo. Ug sa gabii, samtang ako matulog, ako adunay usa ka tawo nga nagtrabaho alang Kaniya sa China.’

“Sa pagpatin-aw midugang siya: ‘Sa akong kabatan-on determinado ko nga moadto isip misyonaryo ngadto sa mga pagano. Apan sa pagkamatay sa akong amahan kinahanglan kong kuhaon sa iyang negosyo aron sa paghatag sa pamilya. Karon, imbes nga mag-inusara, nagsuporta ko ug misyonaryo. Sa maong lungsod sa maong probinsiya sa China, ang akong trabahante nadestino. Ug busa, bisan samtang ako natulog, ako, pinaagi sa akong representante, nga nagabuhat gihapon alang kang Cristo.’” —*Testimonies for the Church*, vol. 6, pp. 29, 30.

Karon labaw pa kay sa kaniadto ang panahon sa pagpamuhunan sa bangko sa Langit pinaagi sa mga misyon sa kalibutan. Dili kini mahimong mas sayon, ug sa ulahi mahimong ulahi na kaayo. Ang mga kalag nangawala kung wala si Cristo ug ang karon nga kamatuoran, ug ang Ginoo mitugyan kanato sa bililhong kahayag nga ipakaylap sa tanan palibot sa planeta.

Palihug hatag nga madagayaon, ug hinaut nga ang Ginoo madagayaon nga magpanalangin kanimo ug sa imong gasa. Salamat!

Ang Departamento sa Skwela Sabatika sa Konperencia Heneral

“Dili Usab Ako Maghukom Kanimo”

SAG-ULOHON NGA BERSEKULO: “Dili usab ako mohukom kanimog silot; Lumakaw ka ug ayaw na pagpakasala” (Juan 8:11 katapusang bahin).

Gisugyot nga Basahon: *Testimonies for the Church*, vol. 2, pp. 73–77.

“Ang Cristohanong gugma mahinay sa pagsaway, alisto sa pag-ila sa paghinulsol, andam sa pagpasaylo, sa pagdasig, sa pagpahimutang sa naglatagaw diha sa dalan sa pagkabalaan, ug sa pagpabilin sa iyang kaugalingong mga tiil didto.”—*The Desire of Ages*, p. 462.

1. USA KA LAANG ALANG KANG JESUS

Domingo, Abril 27

- a. Samtang si Jesus nagpanudlo didto sa templo, unsa may gihimo sa mga escriba ug mga Pariseo? Juan 8:2-3.

“[Si Cristo] sa wala madugay nabalda. Usa ka grupo sa mga Pariseo ug mga escriba ang miduol Kaniya, nga nagguayod uban kanila ug usa ka babaye nga sa hilabihan nahadlok, kang kinsa uban sa isug, matinguhaon nga mga tingog ilang giakusar nga nakalapas sa ikapitong sugo.”—*The Desire of Ages*, p. 460.

- b. Nagpakitag dakong pagtahod sa balaod, unsang pangutana ang gipangutana sa mga Pariseo kang Cristo — ug unsa ang ilang tinuod nga tuyo? Juan 8:4–6 (unang bahin).

“Ang ilang nagpakaaron-ingnon nga pagtahod nagtabon sa usa ka lawom nga laraw alang sa Iyang kalaglagan. Ilang gisakmit kini nga kahigayonan sa pagsiguro sa Iyang pagkahinukman sa silot, nga naghunahuna nga bisan unsa nga desisyon nga Iyang mahimo, sila makakitag higayon sa pagsumbong Kaniya. Kon Iyang buhian ang babaye, Siya mahimong akusahan sa pagtamay sa balaod ni Moises. Kung Iyang gipahayag nga siya takus sa kamatayon, Siya mahimong ikasumbong ngadto sa mga Romano ingon nga usa nga nagbaton ug kagahum nga ila lamang.”—*Ibid.*, pp. 460, 461.

- a. Giunsa pagtubag ni Jesus ang kabakakan sa mga Pariseo? Juan 8:6 (katapusang bahin).

“Si Jesus mitan-aw sa makadiyot sa talan-awon — ang nagkurog nga biktima diha sa iyang kaulaw, ang bagag nawong nga mga talahuron, walay bisan tawhanon nga kalooy. Ang iyang walay dagta nga kaputli mikunhod gikan sa talan-awon. Nasayud kaayo Siya kon sa unsa nga katuyoan kini nga kaso gidala ngadto Kaniya. Iyang nabasa ang kasingkasing, ug nahibalo sa kinaiya ug kasaysayan sa kinabuhi sa matag usa diha sa Iyang presensya. Kini nga mga mahimong magbalantay sa hustisya sa ilang kaugalingon nagdala sa ilang biktima ngadto sa sala, aron sila makabutang ug lit-ag alang kang Jesus. Wala magpakita ug timailhan nga Siya nakadungog sa ilang pangutana, Siya miduko, ug nagtutok sa Iyang mga mata sa yuta, misugod sa pagsulat diha sa abog.”—*The Desire of Ages*, p. 461.

- b. Giunsa ni Jesus pagpakita nga ang mga magsusumbong sa ilang kaugalingon mga sad-an —ug unsa ang ilang gibuhat? Juan 8:7-9.

“Napildi na ang mga magsusumbong. Karon, ang ilang kupo sa nagpakaaron-ingnon nga pagkabalaan gigisi gikan kanila, sila mibarug, sad-an ug gihukman, sa presensya sa Walay Kinutuban nga Kaputli. Nangurog sila kay tingali unyag madayag ang tinago nga kasal-anan sa ilang mga kinabuhi ngadto sa panon sa katawhan; ug sa tagsa-tagsa, uban sa nagduko nga mga ulo ug mga mata nga naloyloy, sila miikyas, nagbiya sa ilang biktima uban sa maloloy-on nga Manluluwas.”—*Ibid*.

- c. Sa kinatibuk-an, unsay angay natong kat-onon gikan sa mga pulong ni Jesus ngadto sa mga magsusumbong? Lucas 6:42.

“Anaa kadtong mga dili pa hingkod sa ilang tinguha sa pagreporma sa mga butang nga alang kanila makita nga dili husto. Nagtuo sila nga sila ang pilion nga mopuli niadtong nakahimo ug mga sayop. Sila nakaminus kon unsa ang nahimo niini nga mga magbubuhat samtang nga ang uban nagtan-aw ug nagapanaway. Pinaagi sa ilang mga aksyon sila nag-ingon: ‘Makahimo ko ug dagkong mga butang. Akong madala ang buluhaton sa unahan nga malampuson.’ Ngadto niadtong kinsa naghunahuna nga sila nahibalo kaayo kon unsaon paglikay sa mga sayop, ako gisugo sa pag-ingon: ‘Ayaw kamo paghukom, aron kamo dili pagahukman.’ Mateo 7:1. Mahimo tingali kamo makalikay sa mga sayop sa pipila ka mga punto, apan sa ubang mga butang ikaw adunay tulubagon sa paghimo sa grabe nga mga sayop, nga malisod kaayo tambalan ug nga magdala ug kalibog sa buhat. Kini nga mga sayop mahimong mas makadaut kay sa gihimo sa imong mga kaigsoonan.”—*Testimonies for the Church*, vol. 7, p. 279.

- a. Unsang pangutana ang gipangutana ni Jesus sa babaye human ang iyang mga magsusumbong mibiya - ug sa unsa nga ang Iyang paagi sa pagtagad sa sitwasyon nag-apekto sa iyang kinabuhi? Juan 8:10, 11.

“Ang babaye mibarog sa atubangan ni Jesus, nga nagkurog sa kahadlok. Ang Iyang mga pulong, ‘Siya nga walay sala diha kaninyo, siya ang unang molabay ug bato,’ midangat ngadto kaniya ingon sa usa ka sentensya sa kamatayon. Wala siya mangahas sa pagyahat sa iyang mga mata ngadto sa nawong sa Manluluwas, apan sa hilom naghulat sa iyang kalaglagan. Sa katingala iyang nakita ang iyang mga magsusumbong nga nanglakaw nga wala makasulti ug nangalibog; unya kadtong mga pulong sa paglaum nahulog sa iyang igdulongog, ‘Dili usab ako mohukom kanimo: lakaw, ug ayaw na pagpakasala.’ Ang iyang kasingkasing natunaw, ug, mihapa sa iyang kaugalingon diha sa tiilan ni Jesus, siya midangoyngoy sa iyang mapasalamaton nga gugma ug uban sa mapait nga mga luha misugid sa iyang mga sala.

“Kini alang kaniya mao ang sinugdanan sa usa ka bag-ong kinabuhi, usa ka kinabuhi sa kaputli ug kalinaw, gididikar ngadto sa Dios. Diha sa pag-isa niining nahulog nga kalag, si Jesus mihimo ug mas dako nga milagro kay sa pag-ayo sa labing grabe nga balatian sa lawas; Iyang giayo ang espirituhanong sakit nga mosangko sa dayon nga kamatayon. Kining mahinolsulon nga babaye nahimong usa sa Iyang labing malig-on nga mga sumosunod. Uban sa masakripisyohon sa kaugalingon nga gugma ug debosyon iyang gipakita ang iyang pagpasalamat tungod sa Iyang mapasayloon nga kalooy. Alang niining masalaypon nga babaye ang kalibutan aduna lamang pagtamay ug pagyubit, apan ang Ang Usa nga Walay Sala nalooy sa iyang kahuyang ug mitunol kaniya sa matabangon nga kamot. Samtang nga ang salingkapaw nga mga Pariseo nagsaway, si Jesus misugo kaniya, ‘Lakaw, ug ayaw na pagpakasala.’”—*The Ministry of Healing*, p. 89.

“Sa Iyang buhat sa pagpasaylo niini nga babaye ug nagdasig kaniya sa pagkinabuhi nga mas maayo nga kinabuhi, ang kinaiya ni Jesus misidlak diha sa katahum sa hingpit nga pagkamatarung. Samtang Siya wala magpakunhod sa sala, ni gipagamay ang pagbati sa pagkasad-an, wala Niya tinguhaa ang pagkondenar, kon dili ang pagluwas. Ang kalibutan alang niining nasayop nga babaye mao ang pagtamay ug pagyubit; apan si Jesus nagsulti ug mga pulong sa paghumpay ug paglaum.”—*The Desire of Ages*, p. 462.

- b. Ihulagway ang epekto sa makaluwas nga grasya ni Cristo. Lucas 7:37–40, 47, 48.

“Si Jesus nahibalo sa mga sirkumstansya sa matag kalag. Sa labi ka dako ang sala sa makasasala, sa labi nga nagkinahanglan siya sa Manluluwas. Ang Iyang kasingkasing sa diosnong gugma ug kalooy nagdani ug labaw sa tanan alang sa usa nga labing walay paglaum nga nagapos sa mga lit-ag sa kaaway. Uban sa Iyang kaugalingong dugo Iyang gipirmahan ang mga papeles sa kagawasan sa rasa o katawhan.”—*The Ministry of Healing*, pp. 89, 90.

- a. Unsa may magbatasan sa atong gawi, ilabina sa kadugtongan ngadto sa uban - sa unsa lamang nga kini posibli? 2 Corinto 1:3-5.
-

“Ang mga sirkumstansya walay kalabotan sa mga kasinatian sa kalag. Kini mao ang espiritu nga gipangga nga naghatag kolor sa tanan natong mga lihoc. Ang usa ka tawo nga anaa sa pakigdait uban sa Dios ug sa iyang isigkatawo dili mahimong miserable. Ang kasina wala diha sa iyang kasingkasing; ang dautan nga katahap dili makakaplag ug luna didto; ang pagdumot dili motungha. Ang kasingkasing nga nahiuyon sa Dios ibayaw ibabaw sa mga kasamok ug mga pagsulay niining kinabuhia.”—*Testimonies for the Church*, vol. 5, p. 488.

“Pinaagi sa pag-antus nga nabatongan ni Jesus ang ministeryo sa paghumpay. Diha sa tanan nga kasakitan sa katawhan Siya gisakit; ug ‘nga Siya sa Iyang kaugalingon nag-antus nga gitintal, Siya makahimo sa pagtabang kanila nga gitintal.’ Isaias 63:9; Hebreohanon 2:18. Niini nga ministeryo ang matag kalag nga misulod sa panag-uban sa Iyang mga pag-antus nahatagan ug pribilehiyo nga makaambit.”—*Thoughts From the Mount of Blessing*, p. 13.

- b. Ihulagway ang talagsaong paglaum ug pribilehiyo nga atong nabatongan sa pagsunod sa mga lakang ni Cristo. 2 Corinto 1:6, 7.
-

“Kon wala nimo batia nga maoy usa ka kadungganang nga mahimong umalambit sa mga pag-antus ni Cristo; kon wala kay gibati nga palas-anon alang sa kalag niadtong andam na nga mamatay; kon ikaw dili gusto nga magsakripisyo aron makatipig ug salapi alang sa buhat nga kinahanglan nga pagahimoon, walay lugar alang kanimo sa gingharian sa Dios. Kinahanglan nga kita mga umalambit uban kang Cristo sa Iyang mga pag-antus ug pagdumili sa kaugalingon diha sa matag lakang.”—*Testimonies for the Church*, vol. 9, pp. 103, 104.

- c. Ihulagway ang kalidad nga labing gikinahanglan taliwala sa mga magtutuo sa mensahe sa tulo ka manulonda. 1 Corinto 13:13, 4-8.
-

“Ang mga kinaiya nga labing gikinahanglan nga manggaron sa katawhan nga nagabantay sa sugo sa Dios mao ang pailub ug pagkamainantuson, kalinaw ug gugma. Kon ang gugma kulang, ang dili mabawi nga pagkalugi mabatonan.”—*Ibid.*, vol. 6, p. 398.

- a. Unsaon sa matuod nga tumotuo paglihok kon ang usa ka Cristohanon mahulog ngadto sa sala - kasukwahi sa sagad ginahimo sa dili matinud-anon ug kasingkasing nga mga tumotuo? Galacia 6:1-3; Roma 15:1-3.

“Hinumdumi nga ang buhat sa pagpasig-uli mao ang atong palas-anon. Kini nga buhat dili pagahimoon diha sa mapahitas-on, mapangahason, hinawod nga paagi. Ayaw pag-ingon, pinaagi sa imong pamaagi, ‘Aduna akoy gahum, ug gamiton ko kini,’ ug ibubo ang mga pag-akusa diha sa nasayop. Himoa ang imong pagpasig-uli ‘diha sa espiritu sa kaaghop; nga magatagad sa imong kaugalingon, basin unya ikaw usab matintal.’ Ang buluhaton nga gibutang sa atong atubangan nga buhaton alang sa atong mga kaigsoonan dili ang pagsalikway kanila, dili sa pagtulak kanila ngadto pagkabigo o pagka-walay paglaum pinaagi sa pag-ingon: ‘Imo ako nga gipakyas, ug dili ako maninguha sa pagtabang kanimo.’ Siya nga nagbutang sa iyang kaugalingon nga puno sa kaalam ug kusog, ug nagpaubos sa usa nga gidaugdaug ug naguol ug nangandoy sa tabang, nagpakita sa espiritu sa Pariseo, ug nagputos sa iyang kaugalingon uban sa kupo sa iyang tinukod sa kaugalingon nga dungog. Diha sa iyang espiritu siya nagpasalamat sa Dios nga siya dili sama sa ubang mga tawo, ug nagdahum nga ang iyang dalan dalaygon ug nga siya kusgan kaayo aron matintal. Apan ‘kon ang usa ka tawo maghunahuna sa iyang kaugalingon nga usa ka butang, sa diha nga siya walay kapuslanan, siya nagalimbong sa iyang kaugalingon.’ Bersekulo 3.” —*Testimonies for the Church*, vol. 6, pp. 398, 399.

“Dili sumosunod ni Cristo nga, uban ang gilikay nga mga mata, motalikod gikan sa masalaypon, nga magabiya kanila nga walay babag sa pagpadayon sa ilang ubos nga dalan. Kadtong dili maugdang sa pag-akusar sa uban, ug madasigon sa pagdala kanila ngadto sa hustisya, sa kasagaran anaa ang ilang kaugalingong kinabuhi nga mas sad-an kay kanila. Ang mga tawo nagadumot sa makasasala, samtang sila nahigugma sa sala. Si Cristo nagdumot sa sala, apan nagahigugma sa makasasala. Kini ang mahimong espiritu sa tanan nga nagasunod Kaniya. Ang Cristohanong gugma mahinay sa pagsaway, alisto sa pag-ila sa paghinulsol, andam sa pagpasaylo, sa pagdasig, sa pagpahimutang sa nahisalaag diha sa dalan sa pagkabalaan, ug sa pagpabilin sa iyang mga tiil didto.” —*The Desire of Ages*, p. 462.

PERSONAL SUBLI NGA MGA PANGUTANA

Biernes, Mayo 2

1. Isaysay ang laang nga giandam sa mga escriba ug mga Pariseo alang kang Jesus.
2. Giunsa sa salingapaw nga mga Judeo pagpakita ug dayag nga pagtahod sa kasugoan?
3. Unsa may nakapugos nga dawaton sa magsusumbong nga mga Judeo mahitungod sa ilang kaugalingon?
4. Ihulagway ang paglaum nga gihatag sa makasasala nga babaye nga gimaltrato.
5. Sa unsang paagi nga ako molabi pa nga mahisama kang Jesus sa dihang magtagad sa masalaypon nga mga kalag?

Si Jesus, ang Kahayag sa Kalibutan

SAG-ULOHON NGA BERSEKULO: “Ug kanila si Jesus misulti pag-usab nga nag-ingon, Ako mao ang kahayag alang sa kalibutan: siya nga magasunod Kanako dili gayud magalakaw sa kangitngit, hinonoa magabaton siya sa kahayag nga nagahatag ug kinabuhi” (Juan 8:12).

Gisugyot nga Basahon: *Testimonies for the Church*, vol. 1, pp. 405–409.

“Samtang ang bulan ug mga bitoon sa atong solar system nagasidlak pinaagi sa gipasibaw nga kahayag gikan sa adlaw, mao man, kutob nga ang ilang pagpanudlo matuod, mao man ang mga maalamon sa kalibutan mopasibaw sa mga sidlak sa Adlaw sa Pagkamatarung. Ang matag sidlak sa hunahuna, matag kidlap sa pangutok, gikan sa Kahayag sa kalibutan.”—*Education*, p. 14.

1. MAGHINUMDOM SA PAGLALANG

Domingo, Mayo 4

a. Unsa ang gilalang sa Dios diha sa unang adlaw sa paglalang? Genesis 1:3-5.

“Diha sa malalanganon nga pulong sa sinugdanan, ang kahayag milamdag sa kangitngitan.”—*The Desire of Ages*, p. 464.

b. Kinsa ang presente diha sa paglalang sa kalibutan - dili ingon nga usa ka tigpaniid, kon dili usa ka aktibo nga partisipante? Genesis 1:1, 2; Juan 1:1, 2; Colosas 1:16.

“Sa sinugdan, ang Dios nadayag diha sa tanang mga buhat sa paglalang. Si Cristo mao kadtong nagbuklad sa mga langit, ug nagpahaluna sa mga patukoranan sa yuta. . . . Siya mao ang nagpuno sa yuta sa katahum, ug sa kahanginan uban sa awit. Ug diha sa tanan nga mga butang sa yuta, ug sa hangin, ug sa langit, Iyang gisulat ang mensahe sa gugma sa Amahan.”—*Ibid.*, p. 20.

“Ang kamot nga nagpugong sa mga kalibutan diha sa kawanangan, ang kamot nga nagkupot sa ilang libutanan (orbit) nga han-ay ug walay kakapoy nga paglihok sa tanan nga mga butang sa tibuok uniberso sa Dios, mao ang kamot nga gilansang sa krus alang kanato.”—*Education*, p. 132.

- a. Sa unsa nga ang mga anak sa Israel nagiyahan didto sa deserto? Exodus 13:21, 22. Isaysay ang presensya nga nagtabon diha sa haligi sa panganod ug diha sa haligi nga kalayo? Exodus 13:21 (unang bahin); 1 Corinto 10:1-4.
-

“Diha sa pagpadayag sa Dios ngadto sa Iyang katawhan, ang kahayag kanunay nagsimbolo sa Iyang presensya. Diha sa malalangon nga pulong sa sinugdanan, kahayag midan-ag gikan sa kangitngitan. Ang kahayag gibukotan diha sa haligi sa panganod diha sa adlaw ug sa haligi nga kalayo sa gabii, naggiya sa mabaga nga kasundalohan sa Israel.”—*The Desire of Ages*, p. 464.

- b. Unsa may nasulat mahitungod sa presensya ni Cristo uban sa Israel didto sa deserto - ug unsang proteksyon ang gisaad sa Dios ngadto sa Iyang katawhan? Salmo 105:39; Isaias 4:5, 6.
-

“Diha sa usa sa labing matahom ug makapalipay nga mga pasahi sa tagna ni Isaias, reperensya gihimo ngadto sa haligi sa panganod ug sa kalayo aron magrepresentar sa pag-alima sa Dios alang sa Iyang katawhan diha sa katapusang pakigbisug uban sa mga gahum sa dautan.”—*Patriarchs and Prophets*, p. 283.

- c. Giunsa ni Cristo pagpakita ang Iyang kaugalingon didto sa Sinai - ug giunsa ni Moises ug sa katawhan pagtubag? Exodus 19:16-18; 20:18, 19; Hebreohanon 12:21.
-

“‘Ang himaya sa Ginoo sama sa nagaut-ut nga kalayo didto sa tumoy sa bukid’ diha sa panan-aw sa nagkatigom nga panon sa katawhan. . . . Makalilisang kaayo ang mga timaan sa presensya ni Jehova nga ang mga panon sa Israel nangurog sa kahadlok, ug nanghapa sa atubangan sa Ginoo.”—*Ibid.*, p. 304. “Mahimayaon kaayo ang pagpadayag sa presensya [ni Cristo] nga kini dili makaya sa mamalatyon nga tawo. Si Moises, nga gikahimut-an pag-ayo sa Dios, mipatugbaw, ‘Ako nahadlok pag-ayo ug nangurog’. Apan siya gipalig-on sa Dios sa pag-antus niining hilabihan ka dakong himaya, ug sa pagdala gikan sa bukid sa usa ka pagpasanag niini diha sa iyang nawong nga tungod niana ang mga tawo dili makalahutay sa pagtutok niini.”—*Sons and Daughters of God*, p. 225.

- a. Giunsa ni Cristo pagpakita ang Iyang presensya diha sa tabernakulo? Exodus 40:34, 35.

“Uban sa matinguhaon nga kasibut ang mga panon sa Israel midugok aron sa pagtan-aw sa Sagrado nga istruktura. Samtang sila namalandong sa talan-awon uban sa matinahuron nga pagkatagbaw, ang haligi nga panganod naglutaw ibabaw sa sanctuaryo ug, mikunsad, nagputos niini. ‘Ug ang himaya sa Ginoo mipuno sa tabernakulo.’ Dihay pagpadayag sa diosnon nga kahalangdon, ug sa usa ka panahon bisan si Moises dili makasulod. Uban sa halalum nga pagbati ang mga tawo nakakita sa timaan nga ang buhat sa ilang mga kamot gidawat. Walay makusog nga mga papakita sa pagmaya. Usa ka solemne nga kataha midangat diha sa tanan. Apan ang kalipay sa ilang mga kasingkasing mitubo diha sa mga luha sa kalipay, ug sila naghagawhaw ug hinay, sa mainiton nga mga pulong sa pagpasalamat nga ang Dios mikunsad aron sa pagpabilin uban kanila.”—*Patriarchs and Prophets*, pp. 349, 350.

“Sa ibabaw sa lingkoranan sa kalooy mao ang Shekinah, ang pagpadayag sa diosnon nga presensya; ug gikan sa taliwala sa mga querubin, ang Dios magpahibalo sa Iyang kabubut-on. Balaanon nga mga mensahe usahay ipahibalo ngadto sa labawng sacerdote pinaagi sa usa ka tingog gikan sa panganod. Usahay ang usa ka kahayag mahulog diha sa manulonda sa tuo, aron magpasabot sa pag-uyon o pagdawat, o usa ka landong o panganod nga mopatong sa usa nga naa sa wala aron sa pagpadayag ug dili pag-uyon o pagsalikway.”—*Ibid*.

- b. Unsa ang nahitabo sa ulahi, sa dihang ang templo gidedikar? 2 Cronicas 7:1.

“Usa ka labing nindot nga sanctuaryo ang gihimo, sumala sa gipakita nga sumbanan kang Moises didto sa bukid, ug sa ulahi gipresentar ni Jehova ngadto kang David. Ang yutan-on nga sanctuaryo gihimo nga sama sa langitnon. Dugang pa sa mga kerubin sa ibabaw sa arka, si Solomon naghimo ug laing duha ka manulonda nga mas dagko, nga nagbarog diha sa matag tumoy sa arka, nagrepresentar sa langitnong mga manulonda nga kanunay nagbantay sa balaod sa Dios. Imposible ang paghulagway sa katahum ug kanindot niini nga tabernakulo. Didto, maingon didto sa tabernakulo, ang sagradong arka gidala sa solemne, matinahuron nga han-ay, ug ibutang sa iyang dapit sa ilalum sa mga pako sa duruha ka halangdon nga querubin nga nagbarog sa salog.

“Ang sagrado nga mga mag-alawit naghiusa sa ilang mga tingog, uban sa tanang matang sa mga instrumento sa musika, sa pagdayeg sa Dios. Ug samtang ang mga tingog nagkaharmoniya, uban sa instrumento sa musika, milanog latas sa templo, ug gipadpad sa kahanginan latas sa Jerusalem, ang panganod sa himaya sa Dios mikunsad sa gambalay, sama sa pagpuno niini kaniadto sa tabernakulo. ‘Ug nahitabo, sa paggula sa mga sacerdote sa balaang dapit, nga ang panganod mipuno sa balay ni Jehova, nga tungod niana ang mga sacerdote dili makabarog sa pag-alagad tungod sa panganod, tungod kay ang himaya sa Ginoo mipuno sa balay sa Ginoo’ (1 Hari 8:11).”—*Spiritual Gifts*, vol. 4a, pp. 113, 114.

- a. Unsang mensahe ni Cristo diha sa Juan 8:12 nagdala kanato ug dakong paglaum?

“Dili ang eskolar nga mga teologo ang adunay pagpanabut niini nga kamatuoran, ug miapil sa pagmantala niini. Kon kini sila matinumon pa nga mga magbalantay, makugihon ug mainampoon nga nagsusi sa mga Kasulatan, nahibal-an unta nila ang takna sa kagabhion; ang mga tagna mag-abli unta kanila sa mga hitabo nga hapit na magakahitabo. Apan wala sila magbaton niini nga posisyon, ug ang mensahe gihatag ngadto sa mas mapaubsanon nga mga tawo. . . . Kadtong mitalikod gikan sa kahayag nga gihatag sa Dios, o kinsa wala magpakabana sa pagpangita niini samtang nga kini maabot pa nila, gibiyaa diha sa kangitngit.”—*The Great Controversy*, p. 312.

“Ang Ginoo mihimo sa matag probisyon aron kita makabaton ug madato, abunda, malipayong kasinatian. Si Juan nagsulat mahitungod kang Cristo, nga nag-ingon, ‘Diha Kaniya ang kinabuhi; ug ang kinabuhi mao ang kahayag sa mga tawo.’ Ang kinabuhi kadugtong sa kahayag, ug kon kita walay kahayag gikan sa Adlaw sa Pagkamatarung, dili kita makabaton ug kinabuhi diha Kaniya. Apan kini nga kahayag gitagana alang sa matag kalag, ug diha lamang nga kita mobiya gikan sa kahayag nga ang kangitngit moabut kanato. Si Jesus miingon, ‘Siya nga magasunod kanako dili magalakaw sa kangitngit, apan makabaton sa kahayag sa kinabuhi.’ Sa kalibutan nga naglibut kanato walay kinabuhi kon walay kahayag. Kon ang adlaw mahunong sa iyang pagsidlak, tanang tanom, tanang kinabuhi sa mananap, mahimong matapos. Kini nag-ilustrar sa kamatuoran nga kita dili makabaton ug espirituhanong kinabuhi gawas kon ibutang nato ang atong mga kaugalingon ilalum sa sidlak sa Adlaw sa Pagkamatarung. Kon atong ibutang ang usa ka mamulak nga tanum sa usa ka ngitngit nga kwarto, kini sa dili madugay malaya ug mamatay; ug mao nga kita mahimo nga makabaton ug pipila ka espirituhanong kinabuhi, apan sa gihapon mawad-an niini pinaagi sa pagpabilin diha sa usa ka kawanangan sa pagduhaduha ug kasubo.”—*Sons and Daughters of God*, p. 281.

- b. Unsang kasigurohan ang moabut samtang kita modangup kang Jesus? 2 Corinto 3:18.

“Sama sa usa ka bulak nga moliso ngadto sa adlaw nga ang masanag nga mga silaw niini makatabang diha sa paghingpit sa katahom niini ug simetriya, mao nga ang mga sumosunod ni Cristo moliso ngadto sa Adlaw sa Pagkamatarung, aron nga ang kahayag sa langit modan-ag diha kanila, maghingpit sa ilang mga kinaiya, ug maghatag kanila ug lawom ug malungtaron nga kasinatian sa mga butang sa Dios. Wala sa atong gahum ang paghunahuna sa mga panalangin nga gidala nganhi kanato pinaagi kang Cristo, kon atong ihiusa ang atong tawhanong paningkamot uban sa diosnong grasya.”—*Ibid.*, p. 26.

“Bisan kinsa nga adunay usa ka katuyoan magatinguha sa pagbuhat sa kabubut-on sa Dios, sa kamainiton mosunod sa kahayag nga gihatag, makadawat ug mas dako nga kahayag; ngadto nianang maong kalag ang mga bituon sa langitnong kahayag ipadala aron sa paggiya kaniya ngadto sa tanang kamatuoran.”—*The Great Controversy*, p. 312.

- a. Sa unsa nga kita mapatuboy pinaagi sa makapadasig nga reperensya ni Pablo sa Kahayag sa kalibutan? 2 Corinto 4:6.

“Himoa nga ang mahimayaon nga mga pagpanabut sa Dios magagahum sa imong hunahuna. Himoa nga ang imong kinabuhi mahiusa pinaagi sa tinago nga mga sumpay ngadto sa kinabuhi ni Jesus. Siya nga nagsugo sa kahayag sa pagdan-ag sa kangitngit andam sa pagdan-ag diha sa imong kasingkasing, aron sa paghatag sa kahayag sa kahibalo sa himaya sa Dios diha sa nawong ni Jesu-Cristo. Ang Espiritu Santo mokuha sa mga butang sa Dios ug magapakita niini nganha kanimo, nga magatunol kanila ingon nga usa ka buhi nga gahum ngadto sa masinugtanon nga kasingkasing. Si Cristo mogiya kanimo ngadto sa ganghaan sa Walay Kinutuban. Mahimo nimong makita ang himaya sa luyo sa tabil, ug magpadayag ngadto sa mga tawo sa pagkaanaa Niya nga nabuhi sa walay katapusan aron sa pagpataliwala alang kanato.”—*Christ’s Object Lessons*, p. 149.

“Ang pagpadayag sa Iyang kaugalingong himaya diha sa dagway sa pagkatawhanon magdala sa langit haduol kaayo sa mga tawo aron ang katahum nga nagdayandayan sa sulod nga templo makita sa matag kalag kang kinsa ang Manluluwas nagpuyo. Ang mga tawo mabihag sa himaya sa usa ka pagpabilin ni Cristo. Ug diha sa mga bul-og sa pagdayeg ug pagpasalamat gikan sa daghan nga mga kalag nga sa ingon nadaug ngadto sa Dios, ang himaya modagayday balik ngadto sa dakong Maghahatag.

“‘Tindog, sidlak; kay ang imong kahayag miabut na, ug ang himaya ni Jehova misubang sa ibabaw nimo.’ Isaias 60:1. Alang niadtong mogula aron sa pagsugat sa Pamanhonon mao kini ang mensahe nga gihatag. Si Cristo moabot uban ang gahum ug dakong himaya. Moanhi Siya uban sa Iyang kaugalingong himaya ug uban sa himaya sa Amahan. Moanhi Siya uban ang tanang balaan nga mga manulonda uban Kaniya. Samtang nga ang tibuok kalibutan naunlod diha sa kangitngit, adunay kahayag diha sa matag puloy-anan sa mga balaan. Ilang makuha ang unang kahayag sa Iyang ikaduhang pagpadayag. Ang kahayag nga putli mosidlak gikan sa Iyang kahalangdon, ug si Cristo ang Manunubos pagadayegon sa tanan nga nag-alagad Kaniya. Samtang ang mga dautan mangalagiw gikan sa Iyang presensya, ang mga sumusunod ni Cristo magmaya.”—*Ibid.*, pp. 420, 421.

PERSONAL SUBLI NGA MGA PANGUTANA**Biernes, Mayo 9**

1. Unsa ang gitudlo sa Biblia mahitungod sa pagka-Dios diha sa buhat sa paglalang?
2. Ihulagway giunsa ni Jesus pagpakita sa Iyang kaugalingon ngadto sa Iyang katawhan didto sa deserto.
3. Sa unsang paagi ang kahayag ni Cristo misidlak diha sa sulod sa tabernakulo ug sa templo?
4. Ihulagway kon giunsa ni Jesus pagpakita ang Iyang kaugalingon diha sa pagdedikar sa templo.
5. Sa unsang paagi nga si Cristo magpadayag sa Iyang kaugalingon nganhi kanato ug pinaagi kanato?

Ang Kahayag Gisalikway— o Gipasanag?

SAG-ULOHON NGA BERSEKULO: “Si Jehova mao ang akong kahayag ug ang akong kaluwasan; kinsa man ang akong pagakahadlokan?” (Salmo 27:1).

Gisugyot nga Basahon: *Testimonies for the Church*, vol. 7, pp. 18–28.

“Si Cristo mao ang ‘Kahayag, nga nagalamdag sa matag tawo nga moanhi sa kalibutan.’ Juan 1:9. Ingon nga pinaagi kang Cristo ang matag tawo adunay kinabuhi, mao man usab nga pinaagi Kaniya ang matag kalag makadawat ug mga sidlak sa langitnong kahayag.”—*Education*, p. 29.

1. ANG KAHAYAG GITAGNA

Domingo, Mayo 11

- a. Giunsa sa Balaang Espiritu paghigut kang Jesus pinaagi kang Isaias? Isaias 49:6.
- b. Giunsa ni Simeon pag-ila kang Jesus sa dihang Siya gidala ngadto sa templo alang sa dedikasyon - ug sa unsa nga kini makahimo kanato sa pagkonsiderar? Lucas 2:32.

“Ang tigulang nga si Simeon, didto sa templo diin si Cristo karon nagpanudlo, mihigut Kaniya ingon ‘nga usa ka kahayag aron magdan-ag sa mga Gentil, ug sa himaya sa Imong katawhang Israel.’ Lucas 2:32. Niini nga mga pulong iyang gipadapat ngadto Kaniya ang usa ka tagna nga hinasa sa tibuok Israel. Pinaagi ni propeta Isaias, ang Balaang Espiritu mipahayag, ‘Magaan ra kaayo nga butanga nga Ikaw mahimo nga Akong alagad aron sa pagbangon sa mga banay ni Jacob, ug sa pagpabalik sa salin sa Israel: ako usab ikaw ihatag nga usa ka suga alang sa mga Gentil, aron ikaw mamahimong Akong kaluwasan hangtud sa kinatumyan sa yuta.’ Isaias 49:6, R.V. Kini nga tagna sa kinatibuk-an gisabot ingon nga naghigut sa Mesias, ug kanus-a si Jesus miingon, ‘Ako mao ang kahayag sa kalibutan,’ ang mga tawo dili mapakyas sa pag-ila Ang Iyang pag-angkon nga mao ang Usa nga Gisaad.”—*The Desire of Ages*, p. 465.

“Oh, unsa nga leksyon kining talagsaon nga istorya sa Bethlehem! Giunsa kini pagbadlong sa atong kawalay pagtuo, atong garbo ug pagka-makaugalingon. Sa unsa nga paagi nga kini nagpasidaan kanato sa pagbantay, kay tingali pinaagi sa atong kriminal nga pagkawalay pagtagad mapakyas usab kita sa pag-ila sa mga timailhan sa kapanahonan, ug busa wala mahibalo sa adlaw sa atong pagduaw.”—*The Great Controversy*, p. 315.

- a. Giunsa sa pangulo nga mga Judeo pagtagad ang misyon ni Cristo? Juan 1:11; 8:13.
-

“Ang tibuok nga kinabuhi ug mga pagtudlo ni Cristo maoy makanunayon nga mga leksyon sa pagpaubos, kaayo, katarung, ug pagdumili sa kaugalingon. Kini maoy usa ka makanunayon nga pagbadlong sa nagpakamatarung sa kaugalingon, pinikito nga espiritu nga gipakita sa mga Judeo. Si Satanas nagdala kanila hangtud nga sila daw nagbaton ug usa ka kasuko bisan diha sa paghisgut sa kahibulongan nga mga buhat ni Cristo, nga nagadani sa pagtagad sa katawhan gikan kanila. Sila sa kadugay na naghimo sa ilang mga kaugalingon sa pagtuo nga siya usa ka impostor, ug bisan unsang paagi nga ilang mahimong mamugna aron sa pagpahawa Kaniya mahimong usa ka ikaayo nila.”—*Spiritual Gifts*, vol. 4a, p. 117.

- b. Unsang tin-aw nga pagpasabut ang gihatag ni Jesus ngadto sa walay pagtuo nga mga Pariseo - apan unsa man ang ilang tubag? Juan 8:14-18.
-

“[Ang mga Pariseo] ignorante sa balaanong kinaiya ug misyon [ni Cristo] tungod kay wala sila makasusi sa mga propesiya mahitungod sa Mesias, ingon nga maoy ilang pribilehiyo ug katungdanan nga buhaton. Sila walay koneksyon sa Dios ug sa Langit, ug busa wala makasabut sa buhat sa Manluluwas sa kalibutan, ug, bisan pa nakadawat sila sa labing makapakombinsi nga ebidensya nga si Jesus mao ang Manluluwas, apan nagdumili sila sa pag-abli sa ilang mga hunahuna aron makasabut. Sa sinugdan ilang gipahaluna ang ilang mga kasingkasing batok Kaniya, ug nagdumili sa pagtuo sa labing lig-on nga proyba sa Iyang pagka-dios, ug, ingon nga gisangputan, ang ilang mga kasingkasing mitubo nga mas gahi hangtud nga sila determinado nga dili motuo o modawat Kaniya.”—*The Spirit of Prophecy*, vol. 2, pp. 354, 355.

- c. Unsang dakong kalainan ang giingon ni Jesus nga makita tali sa Iyang kaugalingon ug sa dili matinuohon nga mga Pariseo? Juan 8:19-23.
-

- d. Unsa ang mahimong makamatay nga sangputanan sa pagsalikway sa Judeong mga magmamando kang Cristo? Juan 8:24; Mateo 23:38.
-

- a. Human nga gipasidan-an nga mahimong mamatay sila diha sa ilang mga sala, unsa may gipangayo sa mga Pariseo kang Jesus - ug ngano? Juan 8:25 (unang bahin).

“Daw nagbaliwala sa Iyang mga pulong, sila nangutana, ‘Kinsa ba Ikaw?’ Sila desidido sa pagpugos Kaniya sa pagpahayag sa Iyang kaugalingon nga mao ang Cristo. Ang Iyang panagway ug Iyang buhat hilabihan ka sukwahi sa gidahum sa katawhan, nga, ingon sa gitooan sa Iyang malinglahon nga mga kaaway, ang derekta nga pagpahibalo sa Iyang kaugalingon ingon nga mao ang Mesias naghimo kaniya nga isalikway ingon nga usa ka impostor.”—*The Desire of Ages*, p. 465.

- b. Giunsa sa Manluluwas sa pagtubag kanila - nagpadayag sa Iyang dili ordinaryo nga koneksyon uban sa Amahan? Juan 8:25 (katapusang bahin). 26-29.

“Wala gayud si Cristo motipas gikan sa pagkamaunongon ngadto sa mga prinsipyo sa balaod sa Dios. Wala gayud Siya nakahimo ug bisan unsa nga supak sa kabubut-on sa Iyang Amahan. Sa atubangan sa mga manulonda, mga tawo, ug mga demonyo Siya makasulti sa mga pulong nga kon gikan sa ubang lain nga mga ngabil pagpasipala: ‘Ginabuhat ko kanunay kadtong makapahimuot Kaniya.’ Juan 8:29. Adlaw-adlaw sulod sa tulo ka tuig ang Iyang mga kaaway nagsunod Kaniya, naningkamot sa pagpangitag buling diha sa Iyang kinaiya. Si Satanas, uban sa tanan niyang kaabin sa dautan, naninguha sa pagbuntog Kaniya; apan wala silay nakaplagan diha Kaniya nga pinaagi niini makabaton sila ug bintaha. Bisan ang mga yawa napugos sa pagsugid: ‘Ikaw ang Balaan sa Dios.’ ”—*Testimonies for the Church*, vol. 8, p. 208.

- c. Ihulagway ang adlaw-adlaw nga pagkinabuhi ni Cristo uban sa Iyang Amahan — ug unsaon nato sa pagpakita kana nga kasinatian. Juan 15:10; Efeso 2:4-6.

Maingon nga si Jesus diha sa tawhanong kinaiya, mao usab ang Dios nagpasabut nga ang Iyang mga sumusunod mahimong ingon. Diha sa Iyang kusog kita magkinabuhi sa kinabuhi nga putli ug kahalangdon nga gikinabuhi sa Manluluwas.”—*Ibid.*, p. 289.

“Ang kinabuhi sa Manluluwas dinhi sa yuta, bisan tuod nagpuyo taliwala sa panagbangi, maoy usa ka kinabuhi sa kalinaw. Samtang ang nasuko nga mga kaaway kanunay nga naggukod Kaniya, Siya miingon, ‘Siya nga nagpadala Kanako ania uban Kanako: ang Amahan wala magbiya kanako nga mag-inusara; tungod kay ginabuhat Ko kanunay ang mga butang nga makapahimuot Kaniya.’ Juan 8:29. Walay bagyo sa tawhanon o satanasnon nga kasuko ang nakahimo sa pagtugaw sa kalinaw nianang hingpit nga pakig-uban sa Dios.”—*Thoughts From the Mount of Blessing*, pp. 15, 16.

- a. Samtang si Cristo nagsulti ug mahait nga mga kamatuoran ngadto sa mga Pariseo, sa unsa nga ang Iyang mga pulong nakaapekto sa sincero nga mga nagpatalinghug - ug ngano nga kini magadasig kanato karon? Juan 8:30.

“Si Cristo nakasabut unsaon sa paglihok diha sa kalmado, manggialamon nga paagi, ug sa pagdala ngadto sa pagpakyas sa ilang mga plano sa pagdala Kaniya ngadto sa pagkahinukman sa silot. Ang mga pulong sa Ginoo sama sa mahait nga mga udyong nga miigo sa marka, ug nagsamad sa mga kasingkasing sa Iyang mga magsusumbong. Sa matag higayon nga si Cristo nakigpulong sa katawhan, bisan ang Iyang mamiminaw daghan o dyutay, ang Iyang mga pulong adunay makaluwas nga epekto diha sa mga kalag sa pipila sa Iyang mga tigpaminaw. Walay mensahe nga nahulog gikan sa mga ngabil ni Cristo ang mawala. Matag pulong nga Iyang gisulti nagbutang ug bag-ong responsibilidad niadtong nakadungog niini. Ang mga ministro nga naghatag sa katapusan nga mensahe sa kalooy ngadto sa kalibutan, nga nagpresentar sa kamatuoran diha sa pagkasincero, nga nagsalig sa Dios alang sa kusog, dili angay nga mahadlok nga ang ilang mga paningkamot makawang. Walay usa nga makaingon nga ang pana sa kamatuoran wala moigo sa marka, ug mitusok sa mga kalag niadtong naminaw. Bisan tuod walay mata sa tawo nga makakita sa paglupad sa pana sa kamatuoran, bisan walay tawhanon nga igdulongog ang nakadungog sa singgit sa nasamaran nga kalag, apan ang kamatuoran sa hilom nag-abli sa dalan sa kasingkasing. Ang Dios nakigsulti ngadto sa kalag, ug sa adlaw sa katapusang paghusay ang ministro sa Dios mobarug uban sa mga tropeyo sa matubosong grasya aron sa paghatag ug pasidungog ngadto kang Cristo, kang kinsa angay ang kadungganan. Ang Dios, nga nakakita sa tago, sa dayag magabalos niadtong nagpahayag sa kamatuoran diha sa Iyang ngalan.”—*The Signs of the Times*, February 6, 1896.

- b. Gawas sa mga ministro, kinsa pa ang mabulahan pinaagi sa pagpasanag sa kahayag gikan sa langit? Salmo 27:1; 147:15; Isaias 55:10, 11.

“Ang mga tawo nga wala tawaga ngadto sa ministryo kinahanglang dasigon sa pagpangabudlay alang sa Agalon sumala sa ilang daghang abilidad. Gatusan ka mga lalaki ug babaye karon ang walay trabaho ang makahimo ug hinangpon nga serbisyo. Pinaagi sa pagdala sa kamatuoran ngadto sa mga balay sa ilang mga higala ug mga silingan, makahimo sila ug dakong buhat alang sa Agalon. Ang Dios walay pinalabi sa mga tawo. Siya mogamit sa mapainubuson, debotado nga mga Cristiano, bisan pa nga wala sila makadawat ug bug-os nga edukasyon sama sa nabatonan sa uban. Himoa nga moapil sila sa pag-alagad alang Kaniya pinaagi sa pagbuhat sa balay-balay nga buluhaton. Maglingkod tupad sa daub, sila makahimo — kon mapaubsanon, maalamon, ug diosnon — makabuhay ug labaw pa aron sa pagtagbo sa tinuod nga mga panginahanglan sa mga pamilya kay sa usa ka ordinadong ministro.”—*Testimonies for the Church*, vol. 7, p. 21.

- a. Unsa may gisulti ni Jesus ngadto sa mga Judeo nga midawat Kaniya? Juan 8:31, 32. Sa katugbang, giunsa sa mga walay pagtuo pagkapakyas sa pagkakita sa bugtong nga kondisyon nga maghimo kanato nga mahigawas gikan sa sala? Juan 8:33-36.

“[Ang mga Pariseo] nahimutang sa labing grabi nga matang sa pagkaulipon - nga gigamhan sa espiritu sa dautan.

“Ang matag kalag nga nagadumili sa paghatag sa iyang kaugalingon ngadto sa Dios anaa nailalum sa lain nga gahum. Siya dili na iya sa iyang kaugalingon. Mahimong siya mohisgut ug kagawasan, apan anaa siya sa labing alaut nga pagka-ulipon. Dili siya tugotan sa pagtan-aw sa katahom sa kamatuoran, tungod kay ang iyang hunahuna anaa nailalum sa pagkontrolar ni Satanás. Samtang siya nagaulo-ulo sa iyang kaugalingon nga siya nagasunod sa dikta sa iyang kaugalingon nga paghukom, siya nagasunod sa kabubut-on sa prinsipal sa kangitngit. Si Cristo mianhi aron sa pagbugto sa mga talikala sa pagkaulipon sa sala gikan sa kalagl. . . .

“Diha sa buhat sa pagtubos walay pinugsanay. Walay pwersa sa gawas ang gigamit. Ilalum sa inpluwensya sa Espiritu sa Dios, ang tawo gipasagdan sa pagpili kinsa ang iyang alagaron. Diha sa kausaban nga mahitabo sa dihang ang kalag mosurendir ngadto kang Cristo, adunay pinakataas nga pag-ila sa kagawasan. Ang paghingilin sa sala maoy buhat sa kalag mismo. Tinuod, wala kitay gahum sa pagpahigawas sa atong mga kaugalingon gikan sa pagkontrolar ni Satanás; apan kon kita magatinguha nga mapahigawas gikan sa sala, ug diha sa atong dako nga pagkinahanglan motiyabaw alang sa gahum nga wala sa atong mga kaugalingon, ang mga gahum sa kalag hatagan ug langitnong kusog sa Balaang Espiritu, ug sila motuman sa dikta sa kabubut-on diha sa pagtuman sa kabubut-on sa Dios.

“Ang bugtong kondisyon diin ang kagawasan sa tawo mahimong posibli mao kanang pagkahimong usa uban kang Cristo. ‘Ang kamatuoran magahatag kanimo ug kagawasan;’ ug si Cristo mao ang kamatuoran. Ang sala modaug lamang pinaagi sa pagpaluya sa hunahuna, ug magadaut sa kagawasan sa kalag. Ang pagpasakop ngadto sa Dios maoy pagpahiuli sa usa ka kaugalingon - ngadto sa matuod nga himaya ug dignidad sa tawo. Ang balaanon nga balaod, diin kita dalhon ngadto sa pagpasakop, mao ‘ang kasugoan sa kagawasan.’ Santiago 2:12.”—*The Desire of Ages*, p. 466.

PERSONAL SUBLI NGA MGA PANGUTANA

Biernes, Mayo 16

1. Isaysay ang kahulogan sa mga pulong ni Simeon mahitungod kang Jesus.
2. Ihulagway ang pagtrato o pagtagad sa mga escriba ug mga Pariseo kang Cristo.
3. Unsa may nahitabo sa ilang nasud tungod sa pagsalikway kang Jesus?
4. Unsaon sa sincero nga mga kalag ang pagtubag kang Cristo—kaniadto ug karon?
5. Isaysay ang konsepto sa “kagawasan” diha sa kahayag sa kamatuoran sa ebanghelyo.

Si Jesus ug si Abraham

SAG-ULOHON NGA BERSEKULO: ‘Ang inyong amahan nga si Abraham nali-pay nga siya makakita sa adlaw sa akong pag-anhi, ug siya nakakita niini ug nagmaya’ (Juan 8:56).

Gisugyot nga mga Basahon: *Christ’s Object Lessons*, pp. 269–271, 330–332;
Early Writings, pp. 149–153.

“[Si Abraham] mihimo ug labing mainiton nga pag-ampo nga sa dili pa ang iyang kamatayon makita niya ang Mesias. Ug iyang nakita si Cristo.”—*The Desire of Ages*, p. 468.

1. MGA ANAK NI ABRAHAM

Domingo, Mayo 18

- a. Unsang pag-angkon ang padayon nga gisublisubli sa mga Pariseo? Juan 8:33, 39 (unang bahin). Apan unsa may magproyba niana nga pagka-kaliwat? Juan 8:39 (katapusang bahin), 56; Roma 9:6-8.

“Ang mga Pariseo mipahayag sa ilang kaugalingon nga mga anak ni Abraham. Miin-gon si Jesus kanila nga kini nga pag-angkon maestablisar lamang pinaagi sa pagbuhat sa mga buhat ni Abraham. Ang tinuod nga mga anak ni Abraham magkinabuhi, sama sa iyang gihimo, usa ka kinabuhi sa pagkamasinugtanon ngadto sa Dios. Dili sila mo-sulay sa pagpatay sa Usa nga nagsulti sa kamatuoran nga gihatag Kaniya gikan sa Dios. Sa paglaraw batok kang Cristo, ang mga rabbi wala magbuhat sa mga buhat ni Abraham. Ang usa lamang ka linya sa pagka-kaliwat ni Abraham walay bili. Kon walay espirituhanong kadugtongan uban kaniya, nga mapadayag diha sa pagbaton ug sama nga espiritu, ug pagbuhat sa samang mga buhat, sila dili iyang mga anak.

“Kini nga prinsipyo adunay parehas nga gibug-aton sa usa ka pangutana nga dugay nang nagsamok sa Cristohanong kalibutan — ang pangutana sa apostolikanhong pag-puli. Ang kagikan kang Abraham napamatud-an, dili sa ngalan ug kaliwat, kondili pi-naagi sa pagkasama sa kinaiya. Busa ang apostolikanhong pagpuli wala magdepende sa pagpasa sa eklesiastikanhong awtoridad, kon dili sa espirituhanon nga relasyon. Usa ka kinabuhi nga gipalihok sa espiritu sa mga apostoles, ang pagtuo ug pagtulon-an sa kamatuoran nga ilang gitudlo, kini ang tinuod nga ebidensya sa apostolikanhong pagpuli. Mao kini ang naghimo sa mga tawo nga mga manununod sa una nga mga magtutudlo sa ebanghelyo.”—*The Desire of Ages*, pp. 466, 467.

- a. Bisan tuod nga ang mga Judeo mao ang natural nga mga kaliwat ni Abraham, kang kinsang mga anak sila sa tinud-anay sa dihang ilang gisalikway si Cristo? Juan 8:41- 44.

“Si Jesus milimod nga ang mga Judeo mga anak ni Abraham. Siya miingon, ‘Gibuhat ninyo ang mga buhat sa inyong amahan.’ Sa pagbiaybiay sila mitubag, ‘Kami wala matawo sa pakighilawas; kami adunay usa ka Amahan, nga mao ang Dios.’ Kini nga mga pulong, sa pasumbingay sa mga sirkumstansya sa Iyang pagkahimugso, gituyo ingon nga usa ka pagduot batok kang Cristo diha sa atubangan niadtong nagsugod sa pagtuo Kaniya. Si Jesus wala magtagad sa walay kwenta nga insulto, apan miingon, ‘Kon ang Dios mao pa ang inyong Amahan, kamo mahigugma unta Kanako: kay Ako mitungha ug nagagikan sa Dios.’

“Ang ilang mga buhat nagpamatuod sa ilang relasyon kaniya kinsa usa ka bakakon ug usa ka mamumuno. ‘Kamo gikan sa inyong amahan ang yawa,’ miingon si Jesus, ‘ug ang mga kailibgon sa inyong amahan kini mao ang inyong gusto nga buhaton. Siya usa ka mamumuno sukad pa sa sinugdan, ug wala magbarug sa kamatuoran, tungod kay walay kamatuoran diha kaniya. . . . Tungod kay nagsulti ako sa kamatuoran, dili kamo motuo Kanako.’ Juan 8:44, 45, R.V. Ang pamatuod nga si Jesus nagsulti sa kamatuoran, ug kana tino gayud, mao ang hinungdan nga wala Siya gidawat sa mga pangulo sa mga Judeo. Kini mao ang kamatuoran nga nakapasilo niining nagpakamatarung sa kaugalingon nga mga tawo. Ang kamatuoran nagbutyag sa kasaypanan sa sayop; gikondenar niini ang ilang pagtudlo ug buhat, ug kini dili nila madawat. Mas ila pa nga ipiyong ang ilang mga mata sa kamatuoran kaysa magpaubos sa ilang kaugalingon sa pagsugid nga sila nasayop. Wala nila higugmaa ang kamatuoran. Wala nila kini tinguhaa, bisan nga kini kamatuoran.”—*The Desire of Ages*, p. 467.

- b. Unsa ang naghimo kanato nga mga anak ni Abraham — ug giunsa sa pagpakita sa mga pangulo sa mga Judeo nga sila dili tinuod nga mga anak ni Abraham? Galacia 3:6-9; Juan 8:40.

“Kay kamo wala makadawat sa espiritu sa pagkaulipon pag-usab ngadto sa kahadlok; apan kamo adunay nakadawat sa Espiritu sa pagkasinagop, diin kita nagatuaw, Abba, Amahan.’ Ang espiritu sa pagkaulipon namugna pinaagi sa pagtinguha nga magkinabuhi uyon sa legal nga relihiyon, pinaagi sa pagpaningkamot sa pagtuman sa mga gipangayo sa balaod diha sa atong kaugalingong kusog. Adunay paglaum lamang alang kanato samtang kita mopasakop ilalum sa Abrahamic nga pakigsaad, nga mao ang pakigsaad sa grasya pinaagi sa pagtuo kang Cristo Jesus. Ang ebanghelyo giwali ngadto kang Abraham, nga pinaagi niini siya adunay paglaum, mao ang sama nga ebanghelyo nga gimantala nganhi kanato karon, nga pinaagi niini kita adunay paglaum. Si Abraham mitan-aw ngadto kang Jesus, kinsa mao usab ang Tigpasiugda ug ang Tigtapos sa atong pagtuo.”—*The Youth’s Instructor*, September 22, 1892.

- a. Unsang pangutana nga ang mga kaaway ni Jesus wala makahimo sa pagtubag mahitungod sa Iyang walay mansa nga kinaiya? Juan 8:46 (unang bahin).

“Sa Iyang kinabuhi dinhi sa yuta, si Cristo nakaugmad ug usa ka hingpit nga kinaiya, Siya nakahatag ug hingpit nga pagsunod sa mga sugo sa Iyang Amahan. Sa pag-anhi sa kalibutan diha sa dagway sa tawo, sa pagpasakop sa balaod, diha sa pagpadayag sa mga tawo nga Iyang gipas-an ang ilang balatian, ilang kasub-anan, ilang kasal-anan, Siya wala mahimong makasasala. Sa atubangan sa mga Pariseo Siya makaingon, ‘Kinsa kaninyo ang makapamatuod nga Ako nakahimo ug sala?’ Walay usa ka buling sa sala ang nakaplagan diha Kaniya. Siya mibarug atubangan sa kalibutan ang walay buling nga Cordero sa Dios.”—*Sons and Daughters of God*, p. 25.

“Si Jesus nagkinabuhi sa balaod diha sa panan-aw sa langit, sa atubangan sa wala mahulog nga mga kalibutan, ug diha sa panan-aw sa makasasala nga mga tawo. Sa atubangan sa mga manulonda, mga tawo, ug mga demonyo, Siya misulti, nga walay nakasukmat, mga pulong nga kon gikan sa lain nga mga ngabil mahimong usa ka pagpasipala: ‘Gibuhat ko kanunay kadtong mga butang nga makapahimuot Kaniya.’”—*The Desire of Ages*, pp. 467, 468.

- b. Gawas pa nianang gisulti ni Jesus ingon nga Anak sa tawo, unsay gipahayag sa Kasulatan mahitungod sa kinaiya ni Cristo? Hebreohanon 4:15; 1 Pedro 1:18, 19.

“Ang pagtuo sa mga tawo diha kang Cristo ingon nga mao ang Mesias wala magbasi sa mga ebidensya nga nakita, ug sila mituo Kaniya tungod sa Iyang personal nga mga atraksyon, kon dili tungod sa kahalangdon sa kinaiya nga makaplagan diha Kaniya, nga wala gayud makaplagi, ni makaplagan, diha sa lain.”—*The SDA Bible Commentary* [E. G. White Comments], vol. 7, p. 904.

- c. Sa unsang paagi kita matandog sa kinabuhi ni Jesus? Filipos 2:6–8.

“Wala ba ang atong Ehemplo mitunob sa usa ka malisud, pagdumili sa kaugalingon, pagsakripisyo sa kaugalingon, mapaubsanon nga dalan nga kini ato aron sa pagluwas kanato? Siya nakasugat ug mga kalisdanan, nakasinati ug mga pagkahigawad, ug nag-antus sa kaulawan ug kasakitan sa Iyang buhat sa pagluwas kanato. Ug magdumili ba kita sa pagsunod kon asa ang Hari sa himaya maggiya sa dalan? Moreklamo ba kita sa kalisdanan ug pagsulay diha sa buhat sa pagdaug sa atong kaugalingon nga bahin, sa dihang atong mahinumdoman ang mga pag-antus sa atong Manunubos?”—*Testimonies for the Church*, vol. 3, p. 371.

- a. Unsa man ang tumong sa tanang matuod nga mga sumosunod ni Cristo? 1 Pedro 1:13-16.

“Ang atong buluhaton mao ang pagpaningkamot nga makab-ot diha sa atong natad sa paglihok ang kahingpitan nga nakab-ot ni Cristo sa Iyang kinabuhi dinhi sa yuta sa matag hugna sa kinaiya.”—*That I May Know Him*, p. 130.

- b. Unsaon nato pagkab-ut kini nga kalab-uton? Hebreohanon 12:1-4; Galacia 5:6 (katapusang bahin); Filipos 3:12-15; 4:13.

“Unsaon nato pagkab-ot ang kahingpitan nga gitakda sa atong Ginoo ug Manluluwas nga si Jesu Cristo — atong Dakong Magtutudlo? Matuman ba nato ang Iyang gikinahanglan ug makakab-ot sa hilabihan ka taas nga sumbanan? Mahimo nato, kon dili, si Cristo dili unta magsugo kanato sa pagbuhat sa ingon. Siya mao ang atong pagkamatarung. Diha sa Iyang pagkatawhanon Siya nag-una kanato ug naghimo alang kanato ug kahingpitan sa kinaiya. Kita kinahanglan nga adunay hugot nga pagtuo diha Kaniya nga nagabuhat pinaagi sa gugma ug nagputli sa kalag. Ang kahingpitan sa kinaiya gibase sa kong unsa si Cristo alang kanato. Kon kita adunay makanunayon nga pagsalig diha sa mga merito sa atong Manluluwas, ug maglakaw diha sa Iyang mga tunob, kita mahimong sama Kaniya, putli ug walay kahugawan.”—*Ibid*.

- c. Sa unsa nga paagi gayud nga kita mahimong putli ug walay lama atubangan sa Dios? Roma 5:18-20; Hebreohanon 10:14.

“Walay pasayloon ni Cristo gawas sa mahinulsulon, apan kinsa ang Iyang gipasaylo Siya naghimo una nga mahinulsulon.”—*Selected Messages*, bk. 1, pp. 393, 394.

“Ang makasasala kinahanglan nga kanunay motan-aw sa Kalbaryo; ug uban sa yano nga pagtuo sa usa ka gamay nga bata, kinahanglan siya mosalig diha sa mga merito ni Cristo, modawat sa Iyang pagkamatarung ug magatuo sa Iyang kalooy. . . .

“Unsa nga gugma kini — unsa ka kahiribulongan, dili matugkad nga gugma — nga magdala kang Cristo sa pagpakamatay alang kanato samtang kita mga makasasala pa! Unsa nga kapildihan sa kalag nga nakasabut sa lig-on nga mga gipangayo sa balaod, ug kinsa mapakyas pa sa pagsabut sa grasya ni Cristo nga mas modagaya!”—*Ibid.*, p. 384.

- a. Unsaon nato sa paghimo ang atong pagkatinawag ug pagkapinili nga sigurado? 2 Pedro 1:4-11; Bugna 19:8.

“Ang Dios nagkinahanglan karon kon unsay Iyang gikinahanglan kang Adan, hingpit nga pagkamasinugtanon, pagkamatarung nga walay depekto, walay kasaypanan diha sa Iyang panan-aw. Ang Dios magtabang kanato sa paghatag ngadto Kaniya sa tanan nga gikinahanglan sa Iyang balaod. Dili nato kini mahimo kon wala kanang pagtuo nga nagdala sa pagkamatarung ni Cristo ngadto sa adlaw-adlaw nga pagginawi.”—*Selected Messages*, bk. 2, p. 381.

“Samtang si Satanas naghari pa, aduna kitay kaugalingon nga buntogon, nagaataki nga mga sala nga pagabuntogon; samtang ang kinabuhi nagalungtad, walay dapit nga hunongan, walay punto diin kita makaabot ug makaingon, hingpit na nako nga nakab-ot. Ang pagkabalaan maoy resulta sa tibuok kinabuhi nga pagkamasinugtanon.”—*The Acts of the Apostles*, pp. 560, 561.

“Kita kinahanglang makaamgo nga pinaagi sa pagtuo diha Kaniya kini atong pribilehiyo nga mahimong umalambit sa diosnon nga kinaiya, ug sa ingon makalikay sa pagkadunot nga ania sa kalibutan pinaagi sa kaibog. Unya kita mahinloan gikan sa tanang sala, tanang depekto sa kinaiya. Dili kita kinahanglan maghupot ug usa ka makasasala nga kahiligan. . . .

“Samtang kita moambit sa diosnong kinaiya, napanunod ug naugmad nga mga kahiligan ngadto sa sayop maputol gikan sa kinaiya, ug kita mahimo nga usa ka buhi nga gahum alang sa maayo. Kanunay nga nagkat-on sa balaang Magtutudlo, matag adlaw nga mag-ambit sa Iyang kinaiya, kita mokooperar sa Dios sa pagbuntog sa mga tentasyon ni Satanas. Ang Dios magabuhat, ug ang tawo magabuhat, aron ang tawo mahiusa kang Cristo ingon nga si Cristo usa sa Dios. . . .

“Ang Dios maoy naghatag kanatog gahum sa pagdaug. Kadtong makadungog sa Iyang tingog ug nagtuman sa Iyang mga sugo makahimo sa pagporma ug matarung nga mga kinaiya.”—*The SDA Bible Commentary* [E. G. White Comments], vol. 7, p. 943.

PERSONAL SUBLI NGA MGA PANGUTANA

Biernes, Mayo 23

1. Ngano nga ang mga Pariseo dili makaangkon sa kinabuhing dayon pinasikad sa ilang kagikan sa dugo — ni bisan kinsa karon nga misalig sa kagikan o DNA ingon nga timaan sa kaluwasan?
2. Isaysay ang mga kinaiyahan sa tinuod nga mga anak ni Abraham.
3. Mahitungod sa Iyang kinaiya, unsa ang nahimo ni Jesus sa pagpahayag?
4. Unsang tumong ang gibutang sa atubangan sa matag Cristohanon?
5. Sa unsang paagi nga kita makaplagan nga hingpit ug walay ikasaway sa atubangan sa Dios?

Si Jesus ug Ang Tawo Nga Buta

SAG-ULOHON NGA BERSEKULO: “Ug si Jesus miingon, Ako mianhi dinhi niining kalibutana aron sa pagpanghukom, aron kadtong dili makakita managpakakita, ug kadtong mga makakita mangabuta” (Juan 9:39)

Gisugyot nga Basahon: *Testimonies for the Church*, vol. 3, pp. 570–575.

“Ang kasaysayan ni Job nagpakita nga ang pag-antus gipahamtang pinaagi ni Satanas, ug pagapugngan sa Dios alang sa katuyoan sa kalooy.”—*The Desire of Ages*, p. 471.

1. SAYOP NGA PAGPANABUT

Domingo, Mayo 25

- a. Unsang pangutana ang gipangutana sa mga tinun-an ngadto kang Jesus sa dihang ilang nakita ang tawo nga gipanganak nga buta? Juan 9:1, 2.
- b. Unsang sayop nga idiya mahitungod sa kasakitan ang gihuptan sa mga Judeo ug mga tinun -an, ug sa unsa nga si Satanas nakapabor pinaagi niini? Juan 9:34 (unang bahin).

“Kasagaran gituohan sa mga Judeo nga ang sala gisilotan dinhi niining kinabuhia. Matag kasakitan giisip ingon nga silot sa pipila ka sayop nga buhat, mismo sa nag-antus o sa iyang mga ginikanan. Tinuod nga ang tanang pag-antus resulta sa paglapas sa balaod sa Dios, apan kini nga kamatuoran nahimong gibalit-ad. Si Satanas, ang tigpasiugda sa sala ug sa tanan nga mga sangputanan niini, nagdala sa mga tawo sa pagtan-aw sa balatian ug kamatayon ingon nga gikan sa Dios — ingon nga silot nga arbitraryong gipahamtang tungod sa sala. Busa ang usa nga nakaagum ug dakong kasakitan o kalamidad adunay dugang nga palas-anon nga pagaisipon nga usa ka dako nga makasasala.

“Sa ingon ang dalan naandam alang sa mga Judeo sa pagsalikway kang Jesus. Siya nga ‘nagpas-an sa atong mga kaguol, ug nagdala sa atong mga kasubo’ gitan-aw sa mga Judeo nga ‘gihampak, gisamaran sa Dios, ug gisakit,’ ug ilang gitago ang ilang mga nawong gikan Kaniya.”—*The Desire of Ages*, p. 471.

- a. Unsang tubag ni Jesus mihatag ug kahayag mahitungod sa kasakitan ug sa sala? Juan 9:3-5.
-

“Ang pagtuo sa mga Judeo mahitungod sa relasyon sa sala ug pag-antus gihuptan sa mga tinun-an ni Cristo. Samtang gitul-id ni Jesus ang ilang mga sayop, wala Niya isaysay ang hinungdan sa kasakitan sa tawo, apan gisultihan sila kong unsa ang sangputanan. Tungod kay niini ang mga buhat sa Dios mapadayag. ‘Samtang ania pa ako sa kalibutan,’ Siya miingon, ‘Ako mao ang kahayag sa kalibutan.’ ”—*The Desire of Ages*, p. 471.

- b. Unsay gibuhay ni Jesus sa wala madugay human niadto, ug sa unsang paagi nga mikooperar ang buta Kaniya? Juan 9:6, 7.
-

“Unya sa nahidhiran na niya ang mga mata sa tawo nga buta, Iyang gipaadto siya aron manghilam-os sa linaw sa Siloam, ug naulian ang panan-aw sa tawo. Sa ingon natubag ni Jesus ang pangutana sa mga tinun-an diha sa praktikal nga paagi, sama sa Iyang kasagarang pagtubag sa mga pangutana gibutang ngadto Kaniya gikan sa pagkamausisaon. Ang mga tinun-an wala tawga sa paghisgot sa pangutana kon kinsa ang nakasala o wala makasala, kondili ang pagsabot sa gahum ug kalooy sa Dios diha sa paghatag ug panan-aw ngadto sa buta. Tin-aw kaayo nga walay makaayo nga gahum diha sa lapok, o sa linaw diin ang buta nga tawo gipaadto aron manghugas, apan ang gahum anaa kang Cristo.”—*Ibid.*

- c. Ihulagway ang nagkalainlain nga mga reaksiyon sa mga silingan sa naayo nga tawo — ug isaysay ang panag-istoryahanay nga nahitabo tali kaniya ug sa iyang mga silingan. Juan 9:8–12.
-

“Ang mga silingan sa batan-ong lalaki, ug kadtong nakaila kaniya kaniadto diha sa iyaha nga pagkabuta, miingon, ‘Dili ba mao kini siya ang naglingkod ug nagpakilimos?’ Sila mitan-aw kaniya uban ang pagduhaduha; kay sa dihang nabuka ang iyang mga mata, ang iyang panagway nausab ug midan-ag, ug nagpakita siya sama nga lahi nga tawo. Gikan sa usa ngadto sa lain ang pangutana gipasa. Ang uban miingon, ‘mao Kini siya,’ ang uban, ‘Siya sama kaniya.’ Apan siya nga nakadawat sa dakong panalangin nakasulbad sa pangutana pinaagi sa pag-ingon, ‘Ako mao siya.’ ”—*Ibid.*, pp. 471, 472.

- a. Ngadto kang kinsa gidala sa mga pangulo nga Judeo ang tawo nga gipanganak nga buta - ug ngano? Diha sa unsang adlaw nga siya giayo? Juan 9:13, 14.
-

- b. Ihulagway ang reaksiyon sa mga Pariseo. Juan 9:15, 16.
-

“Ang mga Pariseo naglaum sa paghimo kang Jesus nga mogawas ingon nga usa ka makasasala, ug busa dili mao ang Mesias. Wala sila mahibalo nga Siya mao ang nagbuhat sa Igpapahulay ug nasayud sa tanan nga mga obligasyon niini, ang nag-ayo sa tawo nga buta. Sila nagpakita nga mainiton kaayo sa pag-oberbar sa Igpapahulay, apan nagplano ug pagpatay nianang mao nga adlaw.”—*The Desire of Ages*, p. 472.

- c. Kinsa ang gitawag sa mga Pariseo aron magpamatuod mahitungod sa tawo nga naayo? Juan 9:18, 19.
-

“[Ang mga Pariseo] nagpatawag sa iyang mga ginikanan, ug nangutana kanila, nga nag-ingon, “Inyo ba ni siya nga anak, nga inyong giingon nga natawo nga buta?”

“Anaa ang tawo mismo, nagpahayag nga siya kanhi buta, ug naulian na ang iyang panan-aw; apan ang mga Pariseo buot nga ipanghimakak ang ebidensya sa ilang kaugalingon mismo nga pagbati kay sa pagdawat nga sila anaa sa sayop. Hilabihan ka gamhanan ang pag-ayad, hilabihan ka malubagon ang pagkamatarung sa mga Pariseo.”—*Ibid*.

- d. Sa unsa nga kita gipasidan-an batok sa hilabihan nga mikaylap nga dautan ang pagbaton ug gidahom-dahom nga opinyon? Proverbio 18:13.
-

Adunay daghan nga magbutang sa ilang kinaugalingon nga maghimohimo kon unsa ang ilang madungog, maghimo sa pagsabut nga hilabihan ka lahi gikan nianang gitinguha nga ipahayag sa nagsulti. Ang uban, nagapaminaw pinaagi sa ginamiton sa ilang kaugalingon nga pag-ayad o gitooan na nilang daan, nagsabut sa butang sumala sa ilang gitinguha - nga mosibo sa ilang katuyoan.”—*Testimonies for the Church*, vol. 5, p. 695.

- a. Giunsa sa mga Pariseo pagsulay sa paghadlok ang mga ginikanan sa tawo nga nahimugso nga buta - ug giunsa nila pagtubag? Juan 9:20, 21. Ngano nga sila mihatag ug malikayon nga tubag? Juan 9:22, 23.

“Ang mga Pariseo aduna lamay usa ka paglaum nga nahibilin, ug mao kanang paghadlok sa mga ginikanan sa maong tawo. Uban ang makita nga kamatinud-anon sila nangutana, ‘Sa unsa nga paagi nga siya karon makakita na?’ Ang mga ginikanan nahadlok sa pagkompromiso sa ilang mga kaugalingon; tungod kay gideklara nga si bisan kinsa nga moila kang Jesus ingon nga mao ang Cristo pagapalagputon sa senagoga;’ nga mao kini, palagputon gikan sa senagoga sulod sa trienta ka mga adlaw. Sulod niana nga panahon walay bata ang masirkunsidaran ni patay nga pagalamayan diha sa balay sa nakalapas. Ang sentensya giila ingon nga usa ka dakong kalamidad; kon kini mapakyas sa pagpakita ug paghinulsol, ang mas bug-at nga silot magasunod. Ang dakong buhat nga gibuhit alang sa ilang anak nagdala ug konbiksyon ngadto sa mga ginikanan, apan sila mitubag, ‘Kami nasayud nga kini amo nga anak, ug nga siya natawo nga buta: apan kon sa unsa nga paagi siya karon nakakita, wala mi masayud; o kinsa ang nagbuka sa iyang mga mata, wala kami masayud: may pangidaron naman siya; pangutan-a siya: siya na ang mosulti mismo.’ Sa ingon ilang gibalhin ang tanang responsibilidad gikan sa ilang mga kaugalingon ngadto sa ilang anak; tungod kay dili nila isugid si Cristo.”—*The Desire of Ages*, pp. 472, 473.

- b. Sa dihang pugson pinaagi sa paghadlok, unsa may atong ibutang diha sa hunahuna? Salmo 118:6.

“Barug nga malig-on, ug ayaw pagbuhat ug sayop nga buhat kay sa tawgon nga usa ka talawan. Ayaw tugoti ang pagbiaybiay, walay panghulga, walay pagbiaybiay nga mga pulong, aron maaghat ka sa paglapas sa imong konsensya sa labing gamay nga butang.”—*Fundamentals of Christian Education*, p. 93.

“Ang tinuod nga Cristohanon nga kinaiya kinahanglang mailhan pinaagi sa kalig-on sa katuyoan, usa ka determinasyon nga dili mapugngan, nga dili maumol o mabuntog sa yuta o sa impierno. Siya nga dili buta sa atraksyon sa kalibutanon nga mga kadunganan, walay pagtagad sa mga hulga, ug dili matarug sa mga pangdani, sa wala damha sa iyang kaugalingon, mapukan pinaagi sa mga lalang ni Satanas.”—*Testimonies for the Church*, vol. 4, pp. 543, 544.

“Kita makadawat sa labing mabangis nga pagsupak gikan sa mga Adventista nga mosupak sa balaod sa Dios. Apan, sama sa mga magtutukod sa mga padir sa Jerusalem, kinahanglan nga dili kita mapasimang ug mababagan gikan sa atong buhat pinaagi sa mga taho, pinaagi sa mga mensahero nga nagtinguha ug diskusyon o kontrobersya, o pinaagi sa makapaluya nga mga hulga, ang pagmantala ug mga bakak, o bisan unsa nga mga lalang nga mahimong isulsol ni Satanas.”—*Ibid.*, vol. 3, p. 574.

- a. Ihulagway ang talan-awon nga paga-atubangon sa nagabantay sa kasugoan nga katawhan sa Dios - ug unsaon nato ang pag-atubang niini. Bugna 12:17; Buhat 4:18-20.

“Samtang ang kontrobersya modangat ngadto sa bag-ong mga kaumahan ug ang mga hunahuna sa katawhan nadani ngadto sa giyatakan nga balaod sa Dios, si Satanas molihok. Ang gahum nga nagkuyog sa mensahe makapasuko lamang sa mga nagasupak niini. Ang kaparian mogamit ug halos labaw kay sa tawhanon nga mga paningkamot sa pagbabag sa kahayag aron dili kini modan-ag diha sa ilang mga panon. Pinaagi sa matag paagi nga anaa sa ilang gahum sila maninguha sa pagbabag sa paghisgot niining mahinungdanon nga mga pangutana. Ang iglesia mohangyo sa kusgan nga bukton sa sibil nga gahum, ug, niini nga buhat, ang papado ug mga Protestante maghiusa. Samtang ang kalihokan alang sa pagpatuman sa Domingo mahimong mas dayag ug desidido, ang balaod pagahimoon batok sa mga nagabantay sa sugo. Sila pagahulgaon uban sa mga multa ug pagkabilanggo, ug ang uban tanyagan ug mga posisyon sa inpluwensya, ug uban pang mga ganti ug mga pabor, ingon nga mga pag-agni sa pagsalikway sa ilang pagtuo. Apan ang ilang lig-ong tubag mao: ‘Ipakita kanamo gikan sa pulong sa Dios ang among kasaypanan’ — ang sama nga pangamuyo nga gihimo ni Lutero ilalum sa susama nga mga kahimtang. Kadtong kinsa pagataralon sa atubangan sa mga korte maghimo ug usa ka lig-on nga pagdependa sa kamatuoran, ug ang uban nga makadungog kanila madala sa pagkuha sa ilang baruganan sa pagtuman sa tanang mga sugo sa Dios. Sa ingon ang kahayag madala sa atubangan sa mga linibo nga wala untay nahibaloan niining mga kamatuoran.”—*The Great Controversy*, p. 607.

- b. Diha sa pag-atubang sa pagsupak, unsay angay natong hinumdoman kanunay? Juan 9:39; Buhat 4:33; Mateo 10:28.

“[Ang mga apostoles] dili mapugngan o mapalisang sa mga pagpanghulga.”—*The Acts of the Apostles*, p. 48.

PERSONAL SUBLI NGA MGA PANGUTANA

Biernes, Mayo 30

1. Sa unsang paagi gihukman sa Judeong mga pangulo ang masakiton ug ang nag-an-tus?
2. Kinsa ug unsa gayud ang nag-ayo sa tawo nga buta?
3. Nganong naglibog ang mga silingan sa tawo nga buta?
4. Unsang sitwasyon ang kinahanglan nga atubangon sa batan-ong lalaki human sa iyang pagkaayo?
5. Unsaon nako paglikay nga mahulog sa lit-ag nga nahitabo sa iyang mga ginikanan?

Halad sa Unang Sabado

SABADO, HUNYO 7, 2025



Alang sa Duha ka Kapilya sa Tamil Nadu, India

Ang arkeolohiko nga ebidensiya nagpakita nga sa sayo pa sa 2600 B. C., ang taas nga urbanisadong sibilisasyon sa Indus nagpuyo na sa subkontinente nailhan karon nga India. Ang panguna nga inpluwensiya sa relihiyon dinhi dugay na Hinduismo (79.8%), gisundan sa Islam (14.2%), Kristiyanismo (2.3%), Sikhismo (1.7%), ug uban pa. Samtang adunay mga taho sa pipila ka kontak sa SDA Reform Movement gikan sa 1920's ug 1950's, kini niadtong 1987 nga ang North India unang opisyal nga girepresentahan sa SDARM General Sesyon sa delegasyon sa konperensiya.

Ang kinahabagatan nga estado sa India — Tamil Nadu — gikonsiderar nga powerhouse o nanguna sa industriya ug agrikultura. Ang buhat sa Ginoo gitukod dinhi sa daghang mga tuig, apan nagserbisyo sa daghang populasyon sa labaw sa 72 ka milyon niini nga estado, adunay panginahanglan alang sa mas lapad nga pag-uswag.

Sumala sa sensus sa India niadtong 2001, ang balangay sa Pattiveeranpatti adunay 7,744 ka molupyo. Ang kasagaran nga pagsumada sa pagbasa ug pagsulat niini 83%, mas taas kaysa nasudnong aberids nga 59.5% (paborable alang sa literatura).

Ang nag-unang tinubdan sa panginabuhi dinhi mao ang kape, gisundan sa saging, oranges, cardamom, sili o atsal, ug uban pang mga panakot. Pallapatti maoy usa ka dakong balangay nga adunay 13,701 ka molupyo.

Sukad sa 1998, ang walay kakapoy nga trabaho sa usa ka ebanghelista gikan sa Periyaklam nakatabang sa pagdugang sa gidaghanon sa mga membro sa simbahan ilabi na niining duha ka mga lugar. Nagkalain-laing mga hagit nakapalisud kaayo sa paglahutay sa nag-abang nga mga balay, mao nga niining panahona, ang mga kaigsoonan sa mga baryo sa Pattiveer anpatti ug Pallapatti nagkinahanglan sa ilang kaugalingong mga dapit alang sa pagsimba.

Ang Espiritu sa Tagna espesipikong naghisgot sa India isip usa ka dapit diin “milyon-milyon ang wala pa kaayo makadungog bahin sa Dios o sa iyang gugma gipadayag diha kang Cristo. Ilang katungod ang pagdawat niini nga kahibalo. Sila adunay managsamang pag-angkon kanato diha sa kalooy sa Manluluwas.”—*Education*, p. 263.

Busa matinahoron kaming nanghangyo sa among mga kaigsoonan sa tibuok kalibutan sa pagtanyag sa inyong manggihatagon nga suporta sa pagtukod ug mga parola alang sa Ginoo sa pagsidlak dinhi. “Uban sa buhat sa pagpasiugda sa mga sugo sa Dios ug pag-ayo sa mga paglapas nga nahimo sa balaod sa Dios, atong isagol ang kalooy alang sa nag-antus nga katawhan. Kita kinahanglan nga mopakita sa kinalabwang gugma ngadto sa Dios; atong bayawon ang Iyang handumanan.”—*Welfare Ministry*, p. 32. Salamat, ug hinaut nga panalanginan sa Ginoo ang mga gasa ug ang maghahatag!

Ang inyong mga igsoong lalaki ug babaye gikan sa Pattiveeranpatti ug Pallapatti

Magaatubang sa Espirituhanon nga Pagkabuta

SAG-ULOHON NGA BERSEKULO: “Tungod niini nagaingon Ako kaninyo, ang tanang sala ug pasipala pagapasayloon alang sa mga tawo: apan ang pasipala batok sa Espiritu dili pagapasayloon. Ug bisan kinsa nga magapamulong sa usa ka pulong batok sa Anak sa tawo, arang siya mapasaylo; apan bisan kinsa nga magapamulong batok sa Espiritu Santo dili siya arang mapasaylo, bisan niini nga panahon sa kalibutan, bisan niadtong palaabuton” (Mateo 12:31, 32).

Gisugyot nga Basahon: *Testimonies for the Church*, vol. 2, pp. 489–497.

“Dili ang Dios ang nagbuta sa mga mata sa mga tawo o nagpagahi sa ilang mga kasingkasing. Siya nagpadala sa kahayag ngadto kanila sa pagtul-id sa ilang mga sayop, ug sa paggiya kanila diha sa hiluwas nga mga dalan; kini pinaagi sa pagsalikway niini nga kahayag nga ang mga mata gibutahan ug ang kasingkasing napagahi.”—*The Desire of Ages*, p. 322.

1. GIBAG-O NGA PAGPANGUTANA

Domingo, Hunyo 1

- a. Diha sa pagpatawag sa ikaduha nga higayon ang batan-on nga lalaki kinsang panan-aw giayo ni Jesus, unsa may gitinguha sa mga Pariseo sa pagpugos kaniya sa pagbuhat? Juan 9:24.

“Ang mga Pariseo nakakita nga sila nagmantala sa buhat nga gihimo ni Jesus. Dili nila malimod ang milagro. Ang buta nga tawo napuno sa kalipay ug pagpasalamat; siya nakakita sa kahibulongang mga butang sa kinaiyahan, ug napuno sa kalipay sa katahum sa yuta ug langit. Libre niyang giasoy ang iyang kasinatian, ug usab sila misulay sa pagpahilom kaniya, nga nag-ingon, ‘Thatag ang pagdayeg sa Dios: kami nahibalo nga kini nga Tawo usa ka makasasala.’ Sa ato pa, Ayawg isulti pag-usab nga kini nga Tawo naghatag kanimog panan-aw; ang Dios ang naghimo niini.”—*The Desire of Ages*, p. 473.

- b. Unsang dili malalis nga argumento ang gipresentar sa batan-ong lalaki? Juan 9:25.

- a. Unsa ang gipangutana sa mga Pariseo pag-usab sa batan-on nga lalaki kinsang panan-aw gipasig-uli - ug unsa man ang ilang aktuwal nga katuyoan? Juan 9:26.

“[Ang mga Pariseo] nangutana pag-usab, ‘Unsa may Iyang gibuhay kanimo? giunsa Niya pagbuka ang imong mga mata?’ Uban sa daghang mga pulong sila misulay sa paglibog kaniya, aron ngasiyamag hunahuna sa iyang kaugalingon ngan alimbongan. Si Satanas ug ang iyang dautang mga manulonda anaa sa kilid sa mga Pariseo, ug gihiusa ang ilang mga kusog ug maliputon uban sa pangatarungan sa tawo aron masumpo ang inpluwensya ni Cristo. Sila nagpugong sa mga pagtuo nga nagkalalom sa daghang mga hunahuna.”—*The Desire of Ages*, p. 473.

- b. Giunsa pagtubag sila sa batan-ong lalaki — ug kinsa ang mibarog sa iyang kiliran aron sa ingon makapadasig kaniya? Juan 9:27.

“Ang mga manulonda sa Dios didto usab sa natad aron sa paglig-on sa tawo nga kansang panan-aw naulian.

“Ang mga Pariseo wala makaamgo nga sila kinahanglan nga makiglabut sa uban gawas sa dili edukado nga tawo nga gipanganak nga buta; wala sila makaila kaniya nga kang kinsa anaa sila sa pakipaglantugi. Ang balaang kahayag misidlak ngadto sa mga lawak sa kalag sa tawo nga buta. Samtang kining mga salingkapaw naninguha sa paghimo kaniya nga dili motuo, ang Dios mitabang kaniya sa pagpakita, pinaagi sa kakusganon ug idlot sa iyang mga tubag, nga siya dili malit-agan.”—*Ibid.*, pp. 473, 474.

- c. Sa unsang paagi nga kita nakasiguro niining samang tabang karon? Lucas 12:11, 12.

“Karon, uban sa inyong mga Biblia gusto ninyong moadto sa atubangan sa Dios, ablihi sila atubangan sa Dios, ug mangamuyo sa Dios. Gusto nimo nga ang imong panabut mapadali; gusto nimo mahibalo nga kamo nasayud sa tinuod nga mga baruganan sa kamatuoran, ug unya sa diha nga kamo magkita uban sa mga kaatbang dili nimo kinahanglan nga atubangan sila sa imong kaugalingon nga kusog. Ang mga manulonda sa Dios mobarug diha sa imong kiliran aron sa pagtabang kanimo sa pagtubag sa matag pangutana nga mahimong ipangutana kanimo. Apan diha sa samang higayon si Satanas mobarog sa kiliran sa imong mga kaatbang sa pagpalihok kanila sa pagsulti sa mga butang nga malisud alang kanimo sa pagdala, aron paghagit kanimo sa pagsulti nga dili maayo; apan himoa nga ang inyong panagsultihanay ingon niana nga si Satanas dili makapahimulos sa inyong mga pulong.”—*The Review and Herald*, May 3, 1887.

- a. Wala makahimo sa paglimbong sa naulian nga batan-ong lalaki, giunsa sa mga Pariseo pagtamay kaniya - ug sa unsang paagi nga ang ingon nga pagka-ignoranti nagpakita sa tibuok kasaysayan? Juan 9:28, 29; 1 Corinto 1:18, 19, 26-28.

“Alang sa Iyang iglesia diha sa matag henerasyon ang Dios adunay pinasahi nga kamatuoran ug pinasahi nga buhat. Ang kamatuoran nga natago gikan sa kalibutanon nga maalamon ug makinaadmanon gipadayag ngadto sa sama sa bata nga mapaubsanon. Nagkinahanglan kini ug pagsakripisyo sa kaugalingon. Kini adunay mga gubat nga pagaawayon ug mga kadaugan nga kab-uton. Sa sinugdan dyutay ra ang mga dumadapig niini. Pinaagi sa mga bantugang mga tawo sa kalibutan ug pinaagi sa usa ka mapahiuyonon sa kalibutan nga iglesia, sila gisupak ug gitamay. . .

“Ang bantugang mga pangulo sa relihiyosong panghunahuna niini nga kaliwatan nagpalanog sa mga pagdayeg ug nagatukod sa mga monumento niadtong nagtanom sa binhi sa kamatuoran sa mga siglo nga minglabay. Dili ba daghan ang motalikod gikan niini nga buhat aron sa pagyatak sa pagtubo nga misibul gikan sa samang liso karon? Ang karaang singgit gisubli, ‘Kita nahibalo nga ang Dios misulti ngadto kang Moises; mahitungod niining tawhana [si Cristo sa mensahero nga Iyang gipadala], wala kami mahibalo kon asa siya gikan.’ Juan 9:29. Sama sa unang mga katuigan, ang pinasahi nga mga kamatuoran alang niining panahona makaplagan, dili sa eklesiastikanhong mga awtoridad, kondili sa mga lalaki ug mga babaye nga dili kaayo edukado o dili kaayo maalamon aron nga motuo sa pulong sa Dios.”—*Christ’s Object Lessons*, pp. 78, 79.

- b. Unsa nga ehemplo ang atong makat-onan gikan sa sincero nga pagpamatuod sa batan-ong lalaki, kauban sa ubang matinud-anon nga mga magtutuo ni Cristo? Juan 9:30–33; Buhat 4:19, 20.

“Diha sa tanang kaligdong, diha sa espiritu sa grasya, ug diha sa gugma sa Dios atong itudlo ang mga tawo ngadto sa kamatuoran nga ang Ginoong Dios mao ang Maglalalang sa mga langit ug sa yuta, ug nga ang ikapitong adlaw mao ang Igpapahulay sa Ginoo. “Diha sa ngalan sa Ginoo kita mopadayon, magbukhad sa Iyang bandila, magadapig sa Iyang pulong. Sa diha nga ang mga awtoridad magasugo kanato sa dili pagbuhat niini nga buhat, sa diha nga sila magdili kanato sa pagmantala sa mga sugo sa Dios ug sa pagtuo ni Jesus, unya kinahanglan nga kita moingon sama sa gihimo sa mga apostoles: ‘Kon matarung sa atubangan sa Dios kamo na hinoon mao ang patalinghugan inay ang Dios, kamo lay mag-igo niini. Kay alang kanamo dili kami makapugong sa pagsulti sa mga butang nga among nakita ug nadungog.’ Buhat 4:19, 20.”—*Testimonies for the Church*, vol. 6, p. 395.

- a. Ingon nga ang naglagut nga mga Pariseo dili buot modawat sa ebidensya, unsay ilang gibuhat sa batan-on nga lalaki nga nagpamatuod sa iyang pagkaayo? Juan 9:34.

“Ang tawo mitagbo sa iyang mga tigpang-usisa diha sa ilang kaugalingon nga nataran. Ang iyang mga pangatarungan dili matubag. Ang mga Pariseo natingala, ug sila nangahilom - nalumayan atubangan sa iyang maidlot, determinado nga mga pulong. Sulod sa pipila ka mga gutlo dihay kahilom. Unya ang nagmug-ot nga mga sacerdote ug mga rabbi nagtigom palibut kanila sa ilang mga bisti, nga daw sila nahadlok nga matakdan tungod sa pagpakigdugtong kaniya; ilang gipagpag ang abug sa ilang mga tiil, ug milabay ug mga pag-akusa batok kaniya - ‘Ikaw natawo gayud sa tumang mga kasal-anan, ug unya mangahas ikaw sa pagpanudlo kanamo?’ Ug siya ilang gipalagpot sa gawas.”—*The Desire of Ages*, p. 474.

- b. Diha sa kalainan, giunsa ni Jesus pagtrato ang batan-on nga lalaki? Juan 9:35-38.

“Ang tawo mihapa sa iyang kaugalingon diha sa tilan sa Manluluwas diha sa pagsimba. Dili lamang ang iyang natural nga panan-aw ang naayo, kon dili ang mga mata sa iyang pagpanabut naablihan. Si Cristo napadayag ngadto sa iyang kalag, ug iyang gidawat Siya ingon nga ang Pinadala sa Dios.”—*The Desire of Ages*, p. 475.

- c. Isaysay ang dako nga kalainan tali sa pagpalagpot sa tig-a nga rebelde batok sa gahian nga buta nagsalikway kang Cristo nga nagpalagpot ug mga kalag nga mahigugmaong nagasunod sa Dios. 1 Hari 9:6-9; Mateo 12:31, 32; Salmo 11:3.

“[Naobserbahan ni Wycliffe] walay tawo nga sa tinouray ipalagpot gawas nga siya una nagdala diha sa iyang kaugalingon sa kondinasyon sa Dios.”—*The Great Controversy*, p. 84.

“Ang pagsupak mao ang bahin sa tanan nga gigamit sa Dios sa pagpresentar sa mga kamatuoran nga sa pinasahe aplikado sa ilang panahon. Dihay presenti nga kamatuoran sa mga adlaw ni Luther — usa ka kamatuoran nianang panahona sa espesyal nga importansya; adunay presenti nga kamatuoran alang sa iglesia karon. . . . Kadtong nagpresentar sa kamatuoran alang niining panahona dili magdahum nga pagadawaton uban ang labaw nga pabor kay sa naunang mga repormador. Ang dakong kontrobersiya tali sa kamatuoran ug sa kasaypanan, sa taliwala kang Cristo ug kang Satanas, magdugang sa kakusog hangtud sa katapusan sa kasaysayan niining kalibutana.”—*Ibid.*, pp. 143, 144.

- a. Unsay gisulti ni Jesus mahitungod sa mga resulta sa Iyang buhat? Juan 9:39.

“Usa ka grupo sa mga Pariseo ang nagtigom sa duol, ug ang ilang panan-aw nadala ngadto sa hunahuna ni Jesus ang kalainan nga makita sa epekto diha sa Iyang mga pulong ug mga buhat. . . . Si Cristo mianhi aron sa pagpabuka sa buta nga mga mata, sa paghatag ug kahayag ngadto kanila nga naglingkod diha sa kangitngit. Iyang gipahayag ang Iyang kaugalingon nga mao ang kahayag sa kalibutan, ug ang milagro nga bag-o lang nahimo maoy pagmatuod sa Iyang misyon. Ang mga tawo nga nakakita sa Manluluwas sa Iyang pag-anhi gipaboran sa usa ka bug-os nga pagpadayag sa balaang presensya kay sa natagamtaman sa kalibutan kaniadto. Ang kahibalo sa Dios napadayag nga mas hingpit. Apan niining mao nga pagpadayag, ang paghukom nagaagi diha sa mga tawo. Ang ilang kinaiya gisulayan, ang ilang kapalaran gitino.”—*The Desire of Ages*, p. 475.

- b. Unsay reaksiyon sa mga Pariseo ngadto sa mga pulong ni Cristo? Juan 9:40. Ingon sa Iyang gisulti kanila, giunsa ni Jesus pagpadayag ang ilang pagkasad-an tungod sa ilang kaugalingong pagkabuta? Juan 9:41.

“Ang pagpakita sa diosnong gahum nga gihatag ngadto sa buta nga tawo sa natural ug sa espirituwal nga panan-aw nagbiya sa mga Pariseo sa mas lawom nga kangitngit. . . . Kon gihimo sa Dios nga imposibli alang kanimo sa pagkakita sa kamatuoran, ang imong pagkawalay alamag walay sala. ‘Apan karon kamo nagaingon, Kami nakakita.’ Kamo nagtuo sa inyong kaugalingon nga makakita, ug nagasalikway sa pamaagi nga mao lamang ang paagi nga niini ikaw makadawat sa panan-aw. Sa tanan nga nakaamgo sa ilang panginahanglan, si Cristo mianhi uban sa walay kinutuban nga tabang. Apan gusto sa mga Pariseo nga mosugid ug walay pagkinahanglan; sila midumili sa pagduol kang Cristo, ug tungod niini sila gibiyaan diha sa pagkabuta — usa ka pagkabuta diin sila mismo ang sad-an. Si Jesus miingon, ‘Ang inyong sala nagpabilin.’ ”—*Ibid*.

PERSONAL SUBLI NGA MGA PANGUTANA

Biernes, Hunyo 6

1. Sa unsa nga ang mga Pariseo misulay sa pagkombinsir sa kanhing buta nga tawo?
2. Kinsa ang naggamit sa dili matinuohon nga mga Pariseo?
3. Kinsa ang mitabang sa batan-ong lalaki sa paghatag ug klaro ug makapakombinsir nga mga tubag?
4. Unsay nahitabo sa dihang siya sa maisogon, sa dayag misugid kang Cristo?
5. Isaysay kon unsa gayud ang pinaka ngil-ad nga porma sa pagkabuta, ug ngano.

Si Jesus, ang Maayong Magbalantay

SAG-ULOHON NGA BERSEKULO: “Ako ang maayong magbalantay; ang maayong magbalantay nagahatag sa iyang kinabuhi alang sa mga carnero” (Juan 10:11).

Gisugyot nga Basahon: *The Desire of Ages*, pp. 476–484.

“Si Cristo mao ang pultahan ug ang magbalantay. Siya mosulod pinaagi sa Iyang kaugalingon. Pinaagi sa iyang kaugalingon nga sakripisyo nga Siya nahimong magbalantay sa carnero.”—*The Desire of Ages*, p. 478.

1. ANG KAWATAN UG ANG MAGBALANTAY

Domingo, Hunyo 8

- a. Giunsa ni Jesus pag-ila tali sa kawatan ug sa magbalantay, ug unsang espirituwal nga leksyon ang iyang gi-ilustrar? Juan 10:1, 2.

“Gigamit ni Cristo kini nga mga tagna [nagtumong sa pastoral nga bulohaton sa Mesias, ingon nga makita sa Isaías 40:9–11; Salmo 23:1, ug Ezequiel 34:23, 16, 25, 28] ngadto sa Iyang kaugalingon, ug Iyang gipakita ang kalainan tali sa Iyang kaugalingong kinaiya ug nianang sa mga pangulo sa Israel. Ang mga Pariseo bag-o pa lang nag-abog ug usa gikan sa toril, tungod kay siya nangahas sa pagsaksi sa gahum ni Cristo. Ilang giputol ang usa ka kalag kinsa ang gidani sa matuod nga magbalantay ngadto sa Iyang kaugalingon. Dinhi niini ilang gipakita ang ilang mga kaugalingon ingon nga ignorante sa buhat nga gisalig ngadto kanila, ug dili takus sa ilang pagsalig ingon nga magbalantay sa mga panon sa carnero. Gibutang karon ni Jesus sa ilang atubangan ang kalainan tali kanila ug sa Maayong Magbalantay, ug Siya nagtudlo sa Iyang kaugalingon ingon nga mao ang matuod nga magbalantay sa panon sa Ginoo.”—*The Desire of Ages*, p. 477.

“Si Cristo nagahigugma kanato tungod kay kita walay mahimo ug nagsalig.”—*Sermons and Talks*, vol. 1, p. 248.

- b. Unsang relasyon ang makita tali sa carnero ug sa ilang magbalantay? Juan 10:3, 4. Unsa may buhaton sa mga carnero atubangan sa usa ka estranghero? Juan 10:5.

- a. Giunsa ni Jesus pagpakita ang Iyang kaugalingon nga kalainan ngadto sa mga Pariseo? Juan 10:7-10.

“Si Cristo mao ang pultahan sa panon sa Dios. Pinaagi niini nga pultahan ang tanan Niyang mga anak, gikan sa pinakaunang mga panahon, nakakaplag ug agianan. Diha kang Jesus, ingon nga gipakita sa mga tipo, ingon nga gianinohan sa mga simbolo, ingon nga gipakita sa pagpadayag sa mga propeta, ingon nga gipadayag diha sa mga leksyon nga gihatag ngadto sa Iyang mga tinun-an, ug sa mga milagro nga nahimo alang sa mga anak sa mga tawo, ilang nakita ang ‘Cordero sa Dios, nga mikuha sa sala sa kalibutan’ (Juan 1:29), ug pinaagi Kaniya sila madala sa sulod sa toril sa Iyang grasya. Daghan ang mianhi nga nagpresentar sa ubang mga butang alang sa pagtuo sa kalibutan; ang mga seremonyas ug mga sistema gimugna diin ang mga tawo naglaum nga makadawat sa pagkamatarung ug pakigdait uban sa Dios, ug sa ingon makakaplag ug agianan ngadto sa Iyang panon. Apan ang pultahan lamang mao si Cristo, ug ang tanan nga nagpataliwala sa usa ka butang aron makuha ang lugar ni Cristo, ang tanan nga misulay sa pagsulod sa toril sa laing paagi, mga kawatan ug mga tulisan.

“Ang mga Pariseo wala makasulod sa pultahan. Nisaka sila sa toril sa laing paagi kay sa kang Cristo, ug wala nila matuman ang buhat sa tinuod nga magbalantay sa carnero. Ang mga sacerdote ug ang mga punoan, ang mga escriba ug ang mga Pariseo, miguba sa buhi nga mga sibsibanan, ug naghugaw sa mga atabay sa tubig sa kinabuhi. Tinuod gayud ang mga pulong sa inspirasyon naghulagway niadtong mini nga mga magbalantay: ‘Ang mga masakiton wala Ninyo lig-ona, ni inyong giayo ang masakiton, ni inyong gibugkosan kadtong nadugmok, ni ibalik ninyo kadtong gipapahawa; . . . apan uban ang puwersa ug uban ang kabangis gimandoan ninyo sila.’ Ezequiel 34:4.”—*The Desire of Ages*, pp. 477, 478.

- b. Sa unsang paagi lahi ang tinuod nga magbalantay gikan sa sinuholan? Juan 10:11-13.

“Adunay gipangita, dili lamang mga tawo nga makahimo sa pagwali, kondili kadtong adunay usa ka eksperimento nga kahibalo sa misteryo sa pagkadiosnon, ug kinsa makatagbo sa dinalian nga mga panginahanglan sa katawhan — kadtong nakaamgo sa kamahinungdanon sa ilang posisyon isip mga alagad ni Jesus, ug malipayong magpas-an sa krus nga anaa Kaniya mitudlo kanila unsaon sa pagpas-an.

“Mahinungdanon kaayo nga ang usa ka pastor makig-uban pag-ayo sa iyang katawhan, ug sa ingon mahimong masinati ang lain-laing mga hugna sa kinaiya sa tawo. Siya kinahanglan mokat-on sa mga buhat sa hunahuna, aron iyang ipahiangay ang iyang mga pagtulon-an ngadto sa salabutan sa iyang mga tigpaminaw. Sa ingon siya makakat-on nianang dakong gugma nga maangkon lamang niadtong nagtuon pag-ayo sa kinaiyahan ug mga panginahanglan sa mga tawo.”—*Gospel Workers*, p. 191.

- a. Unsa pang uban nga kinaiyahan sa maayong magbalantay ang gipakita ni Jesus? Juan 10:14, 15.

“Ingon nga ang usa ka yutan-on nga magbalantay nakaila sa iyang mga carnero, mao usab ang balaan nga Magbalantay nahibalo sa iyang panon nga nagkatibulaag sa tibuok kalibutan. ‘Kamo Akong panon, ang panon sa Akong sibsibanan, mga tawo, ug ako mao ang inyong Dios, nag-ingon ang Ginoong Dios.’ Si Jesus miingon, ‘Ako nagtawag kanimo pinaagi sa imong ngalan; ikaw Akoa.’ ‘Gikulit ko ikaw sa mga palad sa Akong mga kamot.’ Ezequiel 34:31; Isaias 43:1; 49:16.

“Si Jesus nakaila kanato sa tinagsatagsa, ug natandog sa pagbati sa atong mga kaluyahon. Siya nakaila kanatong tanan pinaagi sa ngalan. Nasayud siya sa balay diin kita nagpuyo, ang pangalan sa matag nagpuyo. Siya usahay mihatag ug mga direksyon ngadto sa Iyang mga sulugoon sa pag-adto ngadto sa usa ka kalye sa usa ka ciudad, ngadto nianang balay, aron sa pagpangita sa usa sa Iyang mga carnero.

“Ang matag kalag nailhan kaayo ni Jesus nga daw ingon nga siya lamang ang usa nga gipakamatyan sa Manluluwas. Ang kasakit sa matag usa nakatandog sa Iyang kasingkasing. Ang tiyabaw alang sa panabang makaabut sa Iyang igdulongog. Siya mianhi aron sa pagdani sa tanang mga tawo ngadto sa Iyang kaugalingon. Siya nagmando kanila, ‘Sunod Kanako,’ ug ang Iyang Espiritu magalihok diha sa ilang mga kasingkasing sa pagdani kanila sa pagduol ngadto Kaniya. Daghan ang nagadumili nga madani. Si Jesus nahibalo kon kinsa sila. Nahibal-an usab niya kon kinsa ang malipayon nga maminaw sa Iyang pagtawag, ug andam sa pagpailalum sa Iyang maamomahon nga pag-atiman. Siya miingon, ‘Ang akong mga carnero mamati sa Akong tingog, ug ako nakaila kanila, ug sila magsunod Kanako.’ Siya nag-atiman sa matag usa ingon nga daw wala nay lain pa dinhi sa ibabaw sa yuta.”—*The Desire of Ages*, pp. 479, 480.

- b. Alang sa unsang uban pa nga mga carnero si Jesus nagpakitag pagtagad? Juan 10:16.

“Si Jesus naghunahuna sa mga kalag sa tibuok yuta nga gipahisalaag sa mini nga mga magbalantay. Kadto sila nga Iyang gitinguha nga tigumon ingon nga mga carnero sa Iyang sibsibanan nagkatibulaag taliwala sa mga lobo, ug Siya miingon, ‘Ako adunay uban nga mga carnero, nga wala niining torila; kinahanglan usab nga dad-on ko sila, ug sila magapatalinghug sa akong tingog; ug sila mahimong usa ka panon, usa ka magbalantay.’ Juan 10:16, R.V.”—*Ibid.*, p. 483.

“Ang Dios adunay mga mutya sa tanang mga iglesia, ug dili alang kanato ang paghatag ug maharuson nga pagpanaway sa nag-angkon nga relihiyoso nga kalibutan, kon dili diha sa pagpaubos ug gugma, ipakita sa tanan ang kamatuoran ingon nga kini anaa kang Jesus. Himoa nga ang mga tawo makakita ug pagkamaayo ug debosyon, himoa nga sila makakita ug pagkasama kang Cristo nga kinaiya, ug sila madani ngadto sa kamatuoran.”—*The SDA Bible Commentary* [E. G. White Comments], vol. 4, p. 1184.

- a. Unsang diosnong gahum ang gipahayag ni Jesus nga Iyang nabatonan? Juan 10:17, 18.

“Tungod niini ang Amahan nahagugma kanako, kay Ako nagahatag sa akong kinabuhi, aron pagadawaton ko kini pag-usab.’ Nga mao, ang Akong Amahan nahigugma pag-ayo kaninyo, nga Siya nagahigugma Kanako ug labi tungod sa paghatag sa Akong kinabuhi aron sa pagtubos kaninyo. Sa pagkahimong inyong kahalili ug piyansa, pinaagi sa pagtugyan sa Akong kinabuhi, pinaagi sa pagkuha sa inyong mga tulobagon, inyong mga kalapasan, Ako gihigugma kaayo sa Akong Amahan.

“Ako naghatag sa Akong kinabuhi, aron pagadawaton ko kini pag-usab. Walay bisan kinsa nga makakuha niini gikan Kanako, hinonoa ginahalad Ko kini sa kinaugalingon kong pagbuot, ug Ako adunay gahum sa pagkuha niini pag-usab.’ Samtang ingon nga sakop sa tawhanon nga pamilya Siya mamalatyon, ingon nga Dios Siya mao ang tuboran sa kinabuhi alang sa kalibutan. Makahimo Siya sa pagbarug sa mga pagdasdas sa kamatayon, ug modumili sa pagpailalum sa pagbulot-an niini; apan sa kinabubuton Iyang gitugyan ang Iyang kinabuhi, aron nga Siya makadala ug kinabuhi ug dili mamalatyon ngadto sa kahayag. Iyang gipas-an ang sala sa kalibutan, nag-antus sa tunglo niini, naghatag sa Iyang kinabuhi ingon nga usa ka sakripisyo, aron nga ang mga tawo dili sa dayon mamatay. ‘Sa pagkatinuod Iyang gipas-an ang atong mga kasakitan, ug midala sa atong mga kasub-anan. . . . Siya nasamaran tungod sa atong mga kalapasan, Siya napangus tungod sa atong mga kalapasan: ang silot sa atong pakigdait diha sa ibabaw Niya; ug tungod sa Iyang mga labod kita nangaayo. Kitang tanan sama sa mga carnero nga nanghisalaag; ang tagsatagsa kanato misimang sa iyang kaugalingon nga dalan; ug gibutang ni Jehova diha Kaniya ang kasal-anan nato nga tanan.’ Isaias 53:4-6.”—*The Desire of Ages*, pp. 483, 484.

- b. Unsa may nagdala sa mga tawo sa pagsunod kang Cristo? Juan 10:27; 1 Juan 4:10, 19.

“Dili ang kahadlok sa silot, o ang paglaum sa walay katapusang ganti, ang nagdala sa mga tinun-an ni Cristo sa pagsunod Kaniya. Ilang nakita ang hilabihan ka dako nga gugma sa Manluluwas, nga gipadayag sa tibuok Niyang pagpanaw dinhi sa yuta, gikan sa pasungan sa Betlehem ngadto sa krus sa Kalbaryo, ug ang pagtan-aw Kaniya makadani, kini makapahumok ug makabuntog sa kalag. Ang gugma mapukaw diha sa kasingkasing sa mga nagtan-aw. Ilang nadungog ang Iyang tingog, ug sila nagsunod Kaniya.”—*Ibid.*, p. 480.

“Atong tagdon ang Iyang kinabuhi dinhi sa yuta, ang Iyang sakripisyo alang kanato, ang Iyang buhat didto sa langit ingon nga atong manlalaban, ug ang mga puloy-anan nga Iyang giandam alang niadtong nahigugma Kaniya, ug kita igo lamang makatuaw, O kataas ug giladmon sa gugma ni Cristo!”—*The Acts of the Apostles*, p. 334.

- a. Unsa nga pasalig ang gihatag ni Jesus ngadto sa Iyang carnero? Juan 10:28, 29.

“Bisan tuod karon Siya mikayab na ngadto sa presensya sa Dios, ug miambit sa trono sa uniberso, si Jesus wala mawad-i sa Iyang maloloy-on nga kinaiya. Karon adlawang samang maloloy-on, mabination nga kasingkasing abli ngadto sa tanang kaalautan sa tawo. Karon ang kamot nga nasamaran gituyhad aron sa pagpanalangin sa labi pa gayud ka madagayaon sa Iyang katawhan nga ania sa kalibutan. ‘Ug sila dili na gayud malaglag, ni adunay si bisan kinsa nga tawo nga makakuha kanila gikan sa Akong kamot.’ Ang kalag nga naghatag sa iyang kaugalingon ngadto kang Cristo labaw pa ka bililhon sa Iyang panan-aw kay sa tibuok kalibutan. Ang Manluluwas buot mosinati ug kasakitan sa Kalbaryo aron nga ang usa maluwas sa Iyang gingharian. Dili gayud Niya biyaan ang usa nga Iyang gipakamatyan. Gawas kon ang Iyang mga sumosunod mopili sa pagbiya Kaniya, Siya magakupot kanila.”—*The Desire of Ages*, pp. 480–483.

- b. Diha sa unsa nga ang atong espirituwal nga siguridad ug kasigurohan sa kaluwasan gibasi? Roma 8:31–39.

“Sa mga korte sa itaas, si Cristo nangamuyo alang sa Iyang Iglesia — nangamuyo alang niadtong kinsa Iyang gibayran sa bili sa pagtubos sa Iyang dugo. Mga siglo, mga katuigan, dili gayud makapakunhod sa kaepektibo sa Iyang matuboson nga sakripisyo. Dili kinabuhi o kamatayon, gitas-on o giladmon, ang makapahimulag kanato gikan sa gugma sa Dios nga anaa kang Cristo Jesus; dili tungod kay kita mikupot pag-ayo Kaniya, kondili tungod kay gikuptan ta Niya pag-ayo. Kon ang atong kaluwasan nagdepende sa atong kaugalingong mga paningkamot, dili gyud kita maluwas; apan kini nagdepende sa Usa nga nagpaluyo sa tanan nga mga saad. Ang atong pagkupot Kaniya mahimong daw huyang, apan tungod kay ang Iyang gugma usa man ka gugma sa magulang nga igsoon; samtang atong mintinahon ang atong pagkahiusa Kaniya, walay makaagaw kanato gikan sa Iyang kamot.”—*The Acts of the Apostles*, pp. 552, 553.

PERSONAL SUBLI NGA MGA PANGUTANA

Biernes, Hunyo 13

1. Isaysay ang kalainan sa pagginawi tali sa usa ka magbalantay ug sa usa ka kawatan.
2. Pinaagi sa unsa pang lain nga simbolo nga gipaila ni Jesus ang Iyang kaugalingon?
3. Sa unsang paagi ang tinuod nga mga magbalantay naggawi sa ilang mga carnero?
4. Ngano nga ang mga carnero nagsunod sa magbalantay ug dili sa usa ka dumoluong?
5. Isaysay kon sa unsang paagi kita makasigurado sa kaluwasan.

Si Jesus Ug Si Lazaru

SAG-ULOHON NGA BERSEKULO: “Hamili sa pagtan-aw ni Jehova ang kamatayon sa Iyang mga balaan” (Salmo 116:15).

Gisugyot nga Basahon:

The Ministry of Healing, pp. 219–224.

“Diha kang Cristo ang kinabuhi, orihinal, dili hinulaman, dili kinuha. . . . Ang pagka-Dios ni Cristo mao ang kasigurohan sa dayon nga kinabuhi.”—*The Desire of Ages*, p. 530.

1. ANG PAMILYA SA BETANIA

Domingo, Hunyo 15

- a. Unsang mga tinun-an ang nabatonan ni Jesus didto sa lungsod sa Betania? Juan 11:5.

“Ang kasingkasing [ni Cristo] nahiusa sa usa ka lig-on nga bugkos sa paghigugma ngadto sa pamilya sa Betania, ug sa usa kanila ang Iyang labing kahibulongan nga buhat nahimo.

“Sa balay ni Lazaru, si Jesus kanunay nakakaplag ug kapahulayan. Ang Manluluwas walay puloy-anan sa Iyang kaugalingon; Siya nagsalig sa pagkamaabiabihon sa Iyang mga higala ug mga tinun-an, ug kasagaran, sa dihang gikapoy, giuhaw sa tawhanong pakig-uban, Siya malipayon sa pagpahulay niining malinawon nga panimalay, layo sa katahap ug pangabugho sa nasuko nga mga Pariseo. Dinhi Iyang nakit-an ang usa ka sincero nga pag-abiabi, ug putli, balaang panaghigala. Dinhi makasulti Siya uban sa kayano ug hingpit nga kagawasan, nasayud nga ang Iyang mga pulong masabtan ug gipangga.”—*The Desire of Ages*, p. 524.

- b. Sa unsa nga matang sa panimalay anaa ang Dios uban sa Iyang pinili nga mga panalangin? Proverbio 3:33 (katapusan nga bahin).

“Ang atong Manluluwas naghatag bili sa usa ka hilom nga puloy-anan ug interesadong mga tigpaminaw. Siya nangandoy alang sa tawhanon nga kalooy, pagtahud, ug paghigugma. Kadto sila nakadawat sa langitnong instruksyon Siya kanunay andam sa pagpahat sa hilabihan nabulahan.”—*Ibid.*

- a. Unsang aksyon ang gihimo sa mga igsoong babaye ni Lazaru sa dihang ang ilang igsoon seryoso nga nagkasakit - unsa ang tubag ang ilang nadawat? Juan 11:1-4.

“Si Lazaru naigo sa kalit nga sakit, ug ang iyang mga igsoong babaye nagpadala ngadto sa Manluluwas, nga nagaingon, ‘Ginoo, tan-awa, siya nga Imong gihigugma nagmasakiton.’ Ilang nakita ang kapintasan sa sakit nga mitapot sa ilang igsoon, apan sila nahibalo nga si Cristo nagpakita sa Iyang kaugalingon nga makahimo sa pag-ayo sa tanang matang sa mga sakit. Sila mituo nga Siya mosimpatiya kanila diha sa ilang kalisdanan; busa sila wala maghimo ug dinalian nga hangyo alang sa Iyang diha diha nga presensya, apan nagpadala lamang sa masaligon nga mensahe, ‘Siya nga Imong gihigugma nagmasakiton.’ Sila naghunahuna nga Siya motubag dayon sa ilang mensahe, ug makauban nila sa diha nga Siya makaabot sa Betania.

“Matinguhaon sila nga naghulat sa pulong gikan kang Jesus. Samtang ang kidlap sa kinabuhi anaa buhi pa diha sa ilang igsoon, nangamuyo sila ug nagbantay nga moabot si Jesus. Apan ang mensahero mibalik nga wala Siya. Apan iyang gidala ang mensahe, ‘Kining sakita dili ngadto sa kamatayon,’ ug sila migunit sa paglaum nga si Lazaru mabuhi. Sa kalumo sila naningkamot sa pagsulti sa mga pulong sa paglaum ug pagdasig sa hapit wala nay panimuot nga nag-antus.”—*The Desire of Ages*, pp. 525, 526.

- b. Ihulagway ang mga pulong ug mga buhat ni Cristo sa sunod nga pipila ka mga adlaw. Juan 11:5-8.

“Sa sulod sa duha ka adlaw daw gibiyaan ni Cristo ang mensahe gikan sa Iyahang hunahuna; kay Siya wala magsulti mahitungod kang Lazaru. Ang mga tinun-an naghunahuna kang Juan Bautista, ang nag-una ni Jesus. Natingala sila ngano nga si Jesus, uban ang gahum sa paghimog kahibulongang mga milagro, mitugot kang Juan nga mag-antus sa bilangoan, ug mamatay sa mabangis nga kamatayon. Nakabaton sa ingon nga gahum, nganong wala ni Cristo luwasa ang kinabuhi ni Juan? Kini nga pangutana kanunay nga gipangutana sa mga Pariseo, nga nagpresentar niini ingon sa usa ka dili matubag nga argumento batok sa pag-angkon ni Cristo ingon nga Anak sa Dios. Ang Manluluwas mipasidaan sa Iyang mga tinun-an sa mga pagsulay, kapildihan, ug pagpanglutos. Biyaan ba Niya sila diha sa pagsulay? Ang uban nangutana kon sila ba nasayop sa Iyang misyon. Ang tanan sa hilabihan naglibog. . .

“Ang mga tinun-an nangutana, kon si Jesus moadto sa Judea, ngano nga naghulat pa ug duha ka adlaw. Apan ang kabalaka alang kang Cristo ug sa ilang kaugalingon mao na karon ang labaw sa tanan diha sa ilang mga hunahuna. Wala silay laing makita gawas sa katalagman sa tumong nga Iyang pagabuhaton karon.”—*Ibid.*, pp. 526, 527.

- a. Unsang walay katapusan nga mensahi ang atong mapupo gikan sa kon giunsa ni Cristo pagtagad ang nagdugtong-dugtong nga mga hitabo nga nakapalibut sa pagkasakit ni Lazaru? Juan 11:9, 10.

“Kadtong mahimo unta nga mga katabang ni Cristo, apan nagsalikway sa mga mensahero ug sa ilang mensahe, mawad-an sa ilang kadugtongan. Sila magalakaw diha sa kangitngit, nga dili mahibalo kon asa sila mapangdol. Ang mga ingon andam nga malimbongan pinaagi sa mga limbong sa katapusang adlaw. Ang ilang mga hunahuna nalinga sa ginagmay nga mga butang, ug sila mawad-an sa bulahan nga kahigayonan sa pagpakigyugo uban kang Cristo, ug ingon nga mga magbubuhat uban sa Dios.”—*Fundamentals of Christian Education*, p. 471.

- b. Unsa ka talagsaon nga pagpadayag ang gihatag ni Jesus sa Iyang mga tinun-an — apan giunsa kini nila paghubad ang Iyang mga pulong? Juan 11:11, 12.

“Kining mga butanga miingon Siya: ug human nga Siya miingon ngadto kanila, Ang atong higala nga si Lazaru natulog; apan moadto ako aron pukawon ko siya gikan sa pagkatulog.’ ‘Ang atong higala nga si Lazaru natulog.’ Unsa ka makapatandog nga mga pulong! Unsa ka puno sa simpatiya! Sa paghunahuna sa katalagman ang ilang Agalon pinaagi sa pag-adto sa Jerusalem, ang mga tinun-an halos nakalimot na sa namatyan nga pamilya sa Betania. Apan dili ingon niana si Cristo. Ang mga tinun-an daw mibati nga na badlong. Sila nabalo tungod kay si Cristo wala midali pagtubag sa mensahe. Sila natintal sa paghunahuna nga Siya walay malumong gugma kang Lazaru ug sa iyang mga igsoong babaye nga sa ilang paghunahuna Siya aduna, o Siya modali sa pagbalik uban sa mensahero. Apan ang mga pulong, ‘Ang atong higala nga si Lazaru natulog,’ nakapukaw ug hustong mga pagbati diha sa ilang mga hunahuna. Sila nakombinsir nga si Cristo wala makalimot sa Iyang nag-antus nga mga higala.”—*The Desire of Ages*, p. 527.

- c. Isaysay kon unsa gayud ang gipasabut sa mga pulong ni Cristo. Juan 11:13, 14.

“Si Cristo nagrepresentar sa kamatayon ingon nga usa ka pagkatulog ngadto sa Iyang matinoohon nga mga anak. Ang ilang kinabuhi natago uban kang Cristo diha sa Dios, ug hangtud sa katapusang trumpeta motingog ang mga mamatay matulog diha Kaniya.”—*Ibid.*

- a. Ngano nga wala si Jesus moadto sa Betania bisan sa human nasayud nga si Lazaru namatay na? Juan 11:15.

“Ang mga tinun-an natingala sa mga pulong ni Cristo sa dihang Siya miingon, ‘Si Lazaru patay na. Ug Ako nalipay . . . nga wala ako didto.’ Ang Manluluwas ba pinaagi sa Iyang kaugalingong pagpili milikay sa panimalay sa Iyang nag-antus nga mga higala? Dayag nga si Maria ug Marta ug ang himalatyon nga si Lazaru gipasagdan nga nag-inusara. Apan wala sila mag-inusara. Nakita ni Cristo ang tibuok nga talan-awon, ug human sa kamatayon ni Lazaru ang nagbangutan nga magsoon nga mga babaye gipalig-on pinaagi sa Iyang grasya. Nasaksihan ni Jesus ang kasubo sa ilang nasamaran nga mga kasingkasing, samtang ang ilang igsoon nakigbugno sa iyang kusgan nga kaaway, ang kamatayon. Iyang gibati ang matag kahapdos sa kasakit, ingon sa Iyang gisulti ngadto sa Iyang mga tinun-an, ‘Patay na si Lazaru.’ Apan si Cristo wala lamang maghunahuna sa mga hinigugma sa Betania; ang pagbansay sa Iyang mga tinun-an kinahanglan nga tagdon. Sila Iyang mga representante ngadto sa kalibutan, aron ang panalangin sa Amahan modangat sa tanan. Alang kanila Iyang gitugotan si Lazaru nga mamatay. Kon Iya pa siyang giayo gikan sa balatian ngadto sa kahimsog, ang milagro nga mao ang labing positibo nga ebidensya sa Iyang diosnong kinaiya, dili unta mahimo.”—*The Desire of Ages*, p. 528.

- b. Unsay angay natong maamgohan sa paagi nga ang Dakong Mananambal nagtugot kang Lazaru, Iyang higala, masakit nga grabi ug namatay gayud? 1 Corinto 15:17-19; Salmo 18:28.

“Ang buhat [ni Cristo] wala mohunong sa pagpakita sa Iyang gahum ibabaw sa balatian. Siya naghimo sa matag buhat sa pagpangayo nga usa ka higayon sa pagtisok diha sa kasingkasing sa balaan nga mga prinsipyo sa Iyang gugma ug pagkamaayo.”—*Counsels on Health*, p. 249.

“Kon si Cristo diha pa sa lawak sa masakiton, si Lazaru dili unta mamatay; tungod kay si Satanas walay gahum ibabaw niya. Ang kamatayon dili unta makatamong sa iyang pana diha kang Lazaru sa presensya sa Maghahatag sa Kinabuhi. Busa si Cristo nagpabilin nga layo. Iyang gitugotan ang kaaway sa paggamit sa iyang gahum, aron Siya makaabog kaniya, usa ka nabuntog nga kaaway. Iyang gitugotan si Lazaru nga moagi ubos sa dominyon sa kamatayon; ug ang nag-antus nga mga igsoong babaye nakakita sa ilang igsoon nga lalaki nga gipahimutang sa lubnganan. Si Cristo nahibalo nga sa dihang sila magtan-aw sa patay nga nawong sa ilang igsoon nga lalaki ang ilang pagtuo diha sa ilang Manunubos sa hilabihan gayud masulayan. Apan Siya nahibalo nga tungod sa pakigbisog diin sila karon moagi ang ilang pagtuo modan-ag uban sa mas dako pa nga gahum. Iyang giantus ang matag kangutngot sa kasubo nga ilang giantus. Ang Iyang gugma dili gamay tungod kay Siya naglangan; apan Siya nahibalo nga alang kanila, alang kang Lazaru, alang sa Iyang kaugalingon, ug alang sa Iyang mga tinun-an, usa ka kadaugan ang maangkon.”—*The Desire of Ages*, p. 528.

- a. Unsa man ang kanunay natong hunahunaon mahitungod sa kamatayon sa matinumanon nga mga ulipon sa Dios, sa way pagsapayan kon sa unsang paagi nga kini mahitabo? Salmo 116:15. Paghingalan ug panig-ingnan.

“Wala ihatag kang Eliseo ang pagsunod sa iyang agalon diha sa usa ka nagdilaab nga karo. Diha kaniya gitugot sa Ginoo nga moabot ang usa ka nagdugay nga sakit. Sa panahon sa taas nga oras sa tawhanong kahuyang ug pag-antus ang iyang pagtuo migunit sa mga saad sa Dios, ug siya nakakita kanunay sa libot kaniya ug langitnong mga mensahero sa kahumpayan ug kalinaw. . . . Ang pagtuo nahinog na ngadto sa usa ka malungtaron nga pagsalig sa iyang Dios, ug sa diha nga ang kamatayon mitawag kaniya siya andam na sa pagpahulay gikan sa iyang mga paghago.”—*Prophets and Kings*, pp. 263, 264.

- b. Unsang mga panghitabo ang nahitabo sa Betania sa wala pa moabot si Jesus — ug kinsa pa ang naa didto sa dihang Siya miabut? Juan 11:17–19.

“Sa paglangan sa pag-adto kang Lazaru, si Cristo adunay katuyoan sa kalooy ngadto kanila nga wala modawat Kaniya. Siya milangan, aron nga pinaagi sa pagbanhaw kang Lazaru gikan sa mga patay Iyang ikahatag ngadto sa Iyang gahi ug ulo, dili matinoohon nga mga tawo ang lain nga ebidensya nga Siya mao gayud ang ‘pagkabanhaw, ug ang kinabuhi.’ Dili Niya gusto nga wad-on ang tanang paglaum sa mga katawhan, ang mga kabus, nahisalaag nga mga carnero sa balay sa Israel. Ang Iyang kasingkasing nasakitan tungod sa ilang pagka-dili mahinulsolon. Sa Iyang kalooy gituyo Niya ang paghatag kanila ug usa pa ka ebidensya nga Siya mao ang Tigpahiuli, ang Usa nga mao lamang ang makahimo sa pagdala ug kinabuhi ug pagka dili mamatay ngadto sa kahayag. Kini maoy usa ka ebidensiya nga ang mga sacerdote dili makahubad sa insakto. Mao kini ang hinungdan sa Iyang paglangan sa pag-adto sa Betania. Kining pinakadako nga milagro, ang pagbanhaw kang Lazaru, mao ang pagbutang sa selyo sa Dios diha sa Iyang buhat ug sa Iyang pag-angkon sa pagka-Dios.”—*The Desire of Ages*, p. 529.

PERSONAL SUBLI NGA MGA PANGUTANA

1. Kinsa ang mga membro sa pamilya ni Lazaru?
2. Ngano nga si Jesus wala dayon motuman sa hangyo sa Iyang mga higala?
3. Unsa ang reaksiyon sa mga tinun-an ngadto sa kinaiya ni Cristo?
4. Unsaon sa mga tumotuo kang Cristo pagtagad ang kamatayon?
5. Alang sa unsang katuyoan nga si Cristo mitugot kang Lazaru nga mamatay?

Ang Pagkabanhaw ug ang Kinabuhi

SAG-ULOHON NGA BERSEKULO: “Si Jesus miingon kaniya, ‘Ako mao ang pagkabanhaw ug ang kinabuhi: siya nga motuo kanako, bisan siya mamatay, mabuhi siya” (Juan 11:25).

Gisugyot nga Basahon: *Selected Messages*, bk. 1, pp. 296–300.

“Alang sa magtutuo, ang kamatayon usa lamang ka gamay nga butang. Si Cristo nagsulti mahitungod niini nga daw sa usa lamang ka gutlo. . . . Alang sa mga Cristohanon, ang kamatayon maoy usa lamang ka pagkatulog, usa ka hamubo nga kahilom ug kangitngit. Ang kinabuhi natago uban kang Cristo diha sa Dios.”—*The Desire of Ages*, p. 787.

1. SI JESUS DIDTO SA BETANIA

Domingo, Hunyo 22

- a. Diha sa pagkadungog nga si Jesus moadto sa Betania, unsa may gihimo ni Marta ug unsang konbiksyon ang iyang gipahayag? Juan 11:20-22.

“Kauban sa nagbangotan nga mga higala mao ang mga paryente sa pamilya, ang uban kanila adunay taas nga katungdanan sa responsibilidad sa Jerusalem. Lakip niini mao ang pipila sa mga labing mapait nga mga kaaway ni Cristo. Si Cristo nahibalo sa ilang mga katuyoan, ug busa wala dayon Siya magpaila sa Iyang kaugalingon. Ang mensahe gihatag ngadto kang Marta sa hilom nga paagi nga ang uban sa lawak wala makadungog. . . .

“Si Marta nagdali sa pagsugat kang Jesus, ang iyang kasingkasing napalihok sa nagkasumpaki nga mga pagbati. Diha sa Iyang mapahayagon nga nawong nabasa niya ang samang kalumo ug gugma nga naa sa kanunay niana. Ang iyang pagsalig diha kaniya wala maputol, apan siya naghunahuna sa iyang hinigugma nga igsoon, nga gihigugma usab ni Jesus. Uban sa kaguol nga misulbong diha sa iyang kasingkasing tungod kay si Cristo wala man dayon moabut, apan uban sa paglaum nga bisan karon Siya aduna pay mahimo aron sa paghumpay kanila, siya miingon, ‘Ginoo, kon dinhi Ka pa, wala unta mamatay ang akong igsoon.’ Taliwala sa kaguliyang nga nahimo sa mga nagbangutan, pabalikbalik nga gisubli sa magsoon nga babaye kining mga pulonga.

“Uban sa tawhanon ug diosnon nga kalooy si Jesus mitan-aw sa iyang masulob-on, mabalak-on nga nawong. Si Marta walay inklinasyon sa paghisgut sa nangagi; ang tanan napahayag na pinaagi sa makapatandog nga mga pulong, ‘Ginoo, kon dinhi ka pa, ang akong igsoon wala unta mamatay.’ Apan nagtan-aw nianang nawong sa gugma, midugang siya, ‘Nasayud ako, nga bisan karon, bisan unsa ang Imong pangayoon sa Dios, kini ihatag sa Dios Kanimo.’ ”—*The Desire of Ages*, pp. 529, 530.

- a. Sa unsa nga si Jesus mipasalig kang Marta? Juan 11:23. Unsa may iyang nasabtan pinaagi niini? Juan 11:24.
-

“Gidasig ni Jesus ang iyang pagtuo, nga nag-ingon, ‘Ang imong igsoon mabanhaw.’ Ang iyang tubag wala gitinguha sa pagdasig sa paglaum sa usa ka dihadhi nga pagbag-o. Iyang gidala ang mga hunahuna ni Marta saylo sa presente nga pagpahiuli sa iyang igsoon, ug nagtumong kanila diha sa pagkabanhaw sa matarung. Gibuhat niya kini aron makita niya sa pagkabanhaw ni Lazaru ang usa ka pasalik sa pagkabanhaw sa tanan nga mga matarung nga nangamatay, ug usa ka kasigurohan nga kini matuman pinaagi sa gahum sa Manluluwas.

“Si Marta mitubag, ‘Ako nahibalo nga siya mabanhaw sa pagkabanhaw sa katapusang adlaw.’”—*The Desire of Ages*, p. 530.

- b. Uban sa unsang mga pulong nga giila ni Jesus ang pagtuo ni Marta? Juan 11:25; 1 Juan 5:12.
-

“Sa gihapon nagtinguha sa paghatag ug matuod nga direksyon sa iyang pagtuo, si Jesus mipahayag, ‘Ako mao ang pagkabanhaw, ug ang kinabuhi.’ Diha kang Cristo ang kinabuhi, orihinal, dili hinulaman, dili kinuha. ‘Siya nga adunay Anak adunay kinabuhi.’ 1 Juan 5:12. Ang pagka-Dios ni Cristo maoy kasigurohan sa magtutuo sa kinabuhing dayon.”—*Ibid*.

- c. Unsang saad ang pasukaranan sa atong paglaum luyo sa lubnganan, ug sa unsang paagi nadugtong ang konbiksyon ni Marta sa milagro ni Cristo? Juan 5:26; 11:26, 27.
-

“Si Cristo dinhi nagpaabot sa panahon sa Iyang ikaduhang pag-anhi. Unya ang matarung nga mga minatay pagabanhawon nga dili madunoton, ug ang buhi nga mga matarung paglalalinon ngadto sa langit nga wala makakita sa kamatayon. Ang milagro nga mao si Cristo hapit na mahitabo, sa pagbanhaw kang Lazaru gikan sa mga patay, magrepresentar sa pagkabanhaw sa tanang matarung nga patay. Pinaagi sa Iyang pulong ug sa Iyang mga buhat Siya mipahayag sa Iyang kaugalingon ang Tigpasiugda sa pagkabanhaw. Siya nga sa Iyang kaugalingon hapit na mamatay diha sa krus mibarug uban sa mga yawe sa kamatayon, usa ka mananaug sa lubnganan, ug mipahayag sa Iyang katungod ug gahum sa paghatag ug kinabuhing dayon.”—*Ibid*.

- a. Ihubit ang mga lihok ug mga pulong sa naguol kaayo nga Maria. Juan 11:28-32.
-
- b. Sa dihang nakita ni Jesus si Maria ug ang pipila sa mga Judeo nga naghilak, unsa may gihimo ni Jesus ug ngano? Juan 11:33-35.
-

“Busa sa dihang si Jesus nakakita kaniya nga naghilak, ug ang mga Judeo usab nga naghilak nga miuban kaniya, Siya miagulo sa espiritu, ug nasamok.’ Iyang nabasa ang mga kasingkasing sa tanan nga nagtigom. Nakita niya kana sa kadaghanan, kung unsa ang gipakita ingon nga usa ka demonstrasyon sa kasubo maoy pagpakaaron-ingnon lamang. Siya nahibalo nga ang pipila sa pundok, nga karon nagpakita ug salingkapaw nga kasubo, sa dili madugay magplano sa kamatayon, dili lamang sa gamhanang magbubuhat sa milagro, apan sa usa nga pagabanhawon gikan sa mga patay. Mahimo ni Cristo huboon gikan kanila ang ilang kupo sa pagpakaaron-ingnon nga kasubo. Apan gipugngan Niya ang iyang matarung nga kasuko. Ang mga pulong nga Iyang masulti sa tanang kamatuoran, wala Niya isulti, tungod sa hinigugma nga nagluhod sa Iyang tiilan sa kasubo, nga sa tinuod mituo Kaniya.

“Diin ninyo siya ibutang?” Siya nangutana, ‘Sila miingon ngadto Kaniya, Ginoo, umari ka ug tan-awa.’ Magkauban sila ngadto sa lubnganan. Usa kadto ka makapasubo nga talan-awon. Si Lazaru gihigugma pag-ayo, ug ang iyang mga igsoong babaye mihilak alang kaniya uban sa masulub-on nga mga kasingkasing, samtang sila nga iyang mga higala misagol sa ilang mga luha uban sa mga igsoon nga mga babaye. Tungod niining tawhanong kagul-anan, ug sa kamatuoran nga ang nag-antus nga mga higala mahimong magbangotan tungod sa mga patay samtang ang Manluluwas sa kalibutan nagbarug - ‘si Jesus mihilak.’ Bisan tuod Siya Anak sa Dios, apan Iyang gikuha ang tawhanong kinaiya diha Kaniya, ug Siya natandog pinaagi sa tawhanong kasub-anan. Ang Iyang malumo, maloloy-on nga kasingkasing kanunay nga napukaw sa pagsimpatiya pinaagi sa pag-antus. Siya mihilak uban sa mga naghilak, ug nagmaya uban niadtong nangalipay.”—*The Desire of Ages*, p. 533.

- c. Sa unsang paagi kining higayona sa kinabuhi ni Jesus mahimong usa ka panig-ingnan alang kanato? Roma 12:15.
-

“Ang kahibulongan nga panig-ingnan ni Cristo, ang dili hitupngan nga kalumo diin Siya misulod ngadto sa mga pagbati sa uban, naghilak uban niadtong naghilak, nagmaya uban kanila nga nalipay, kinahanglan nga adunay usa ka halalum nga inpluwensya diha sa kinaiya sa tanan nga misunod Kaniya sa kinasingkasing. Pinaagi sa maloloy-on nga mga pulong ug mga buhat ilang sulayan sa paghimo ang dalan nga sayon alang sa gikapoy nga mga tiil.”—*The Ministry of Healing*, pp. 157, 158.

- a. Unsang sugo ang gihatag ni Jesus ngadto niadtong nagpalibut kaniya? Juan 11:39 (unang bahin). Giunsa ni Marta sa pag-aksyon ug unsa ang gisulti ni Jesus ngadto kaniya? Juan 11:39 (katapusang bahin).

“Sa diha nga ang Ginoo mobuhat na ug usa ka buhat, si Satanas mopalihok sa usa ka tawo sa pagsupak. ‘Kuhaa ninyo ang bato,’ miingon si Cristo. Kutob sa mahimo, andama ang dalan para sa Akong bulohaton. Apan ang positibo ug ambisyoso nga kinaiya ni Marta mipahayag sa iyang kaugalingon. Siya dili gusto nga ang nadugta nga lawas kinahanglan nga makita. Ang kasingkasing sa tawo mahinay sa pagsabot sa mga pulong ni Cristo, ug ang pagtuo ni Marta wala nakasabot sa tinuod nga kahulogan sa Iyang saad.

“Gibadlong ni Cristo si Marta, apan ang Iyang mga pulong gisulti sa hilabihan nga kalumo. ‘Wala Ako mag-ingon kanimo, nga, kon motuo ka, makakita ka sa himaya sa Dios?’ Nganong magduhaduha ka mahitungod sa Akong gahum? Nganong nagrason ka supak sa Akong mga kinahanglanon? Anaa kanimo ang Akong pulong. Kung motuo ka, ikaw makakita sa himaya sa Dios. Ang natural nga mga imposibilidad dili makapugong sa buhat sa Usa nga Makagagahum sa tanan. Ang pagduhaduha ug pagkawalay pagtuo dili pagpaubos. Bug-os nga pagtuo diha sa pulong ni Cristo mao ang tinuod nga pagpaubos, matuod nga pagtugyan sa kaugalingon.

“‘Kuhaa ninyo ang bato.’ Si Cristo makasugo unta sa bato sa pagkawagtang, ug kini motuman unta sa Iyang tingog. Mahimo niyang mandoan ang mga manulonda nga duol sa Iyang kiliran sa pagbuhat niini. Sa Iyang pagsugo, ang dili makita nga mga kamot makahimo sa pagkuha sa bato. Apan kini gikuha sa mga kamot sa tawo. Sa ingon si Cristo nagpakita nga ang tawo kinahanglan makipagtimbayayong uban sa pagkadiosnon. Unsa ang mahimo sa gahum sa tawo diin ang diosnon nga gahum wala ipatawag nga mobuhat. Ang Dios wala magsalikway sa tabang sa tawo. Siya nagpalig-on kaniya, nagakooperar uban kaniya maingon sa iyang paggamit sa mga gahum ug mga katakus nga gihatag kaniya.”—*The Desire of Ages*, p. 535.

- b. Unsang mga pulong ni Cristo sa malumo nagbadlong sa atong pagkawalay pagtuo karon? Juan 11:40.

“Daghan ang walay buhi nga pagtuo. Mao kini ang hinungdan nga dili nila makita ang labaw pa sa gahum sa Dios. Ang ilang kahuyang maoy resulta sa ilang pagkawalay pagtuo. . . . Nagplano sila ug magplano, apan ang pag-ampo gamay, ug adunay gamay nga tinuod nga pagsalig sa Dios. Nagtuo sila nga adunay pagtuo, apan kini mao lamang ang kadasig sa panahon. Napakyas sa pagsuta sa ilang kaugalingong panginahanglan, o ang kaandam sa Dios sa paghatag, wala sila molahutay sa pagtipig sa ilang mga hangyo atubangan sa Ginoo.”—*Christ’s Object Lessons*, pp. 145, 146.

- a. Unsang pag-ampo ang gihimo ni Jesus sa kiliran sa lubnganan? Juan 11:41, 42.

“Ang mando gituman. Ang bato giligid. Ang tanan nahimo sa dayag ug sa tinuyo. Ang tanan nahatagan ug kahigayonan sa pagtan-aw aron nga walay limbong ang mahimo. Didto naghigda ang lawas ni Lazaru diha sa iyang lubnganan nga bato, bugnaw ug hilom diha sa kamatayon. Ang hilak sa mga nagbalata nahunong. Nahibulong ug nagpaabot, ang panon nagbarug palibut sa lubnganan, naghulat aron sa pag-tan-aw unsay mahitabo.

...

“Dinhi si Cristo miangkon sa Dios ingon nga Iyang Amahan, ug uban sa hingpit nga pagsalig nagpahayag nga Siya mao ang Anak sa Dios.”—*The Desire of Ages*, pp. 535, 536.

- b. Uban sa unsang mga pulong si Jesus nagbanhaw kang Lazaru? Juan 11:43. Unsa man dayon ang nahitabo? Juan 11:44.

“Ang tingog [ni Cristo], tin-aw ug nagadulot, milapos sa igdulongog sa patay. Samtang Siya nagasulti, ang pagka-Dios mokidlap diha sa tawhanon. Diha sa Iyang nawong, nga gilamdagan pinaagi sa himaya sa Dios, ang mga tawo nakakita sa kasigurohan sa Iyang gahum. Ang matag mata natumong diha sa pultahan sa langob. Ang matag dalunggan gikiling aron makadakop sa pinakagamay nga dahunog. Uban sa mainiton ug masakit nga tinguha ang tanan naghulat alang sa pagsulay sa pagkadios ni Cristo, ang ebidensya nga magpamatuod sa Iyang pag-angkon ingon nga mao ang Anak sa Dios, o pagwala sa paglaum hangtud sa kahangtoran.


“Adunay kaukyab diha sa hilom nga lubnganan, ug siya nga namatay mibarog diha sa pultahan sa lubnganan. . . . Ang tawhanon mao ang magabuhat alang sa tawhanon. Si Lazaru gipagawas, ug mibarug sa atubangan sa panon, dili ingon sa usa nga naluya tungod sa sakit, ug uban sa mahuyang, nagkurog nga mga bukton, kon dili ingon sa usa ka tawo nga anaa sa pinakataas sa kinabuhi, ug sa kalagsik sa usa ka halangdon nga pagkatawo. Ang iyang mga mata nagasidlak uban sa salabutan ug sa gugma alang sa iyang Manluluwas. Iyang gipahalona ang iyang kaugalingon sa pagsimba diha sa tiilan ni Jesus.”—*Ibid.*, p. 536.

PERSONAL SUBLI NGA MGA PANGUTANA

Biernes, Hunyo 27

1. Ihulagway ang pagsalig nga anaa sa mga igsoong babaye ni Lazaru diha kang Jesus.
2. Unsa ang gisaad ni Jesus kang Marta, kang Maria, ug sa tanang magtutuo?
3. Ngano nga si Jesus mihilak?
4. Giunsa sa tawhanon pagkooperar uban sa diosnon dinhi niini nga milagro?
5. Ihulagway ang mga lihok ni Lazaru diha sa pagtawag ni Jesus.

Halad Sa Unang Sabado



Sabado, Abril 5

Alang sa pagtukod pag-usab sa simbahan sa Prokhorovka, Russia

Himoa nga kabahin ka sa nagauswag nga bulohaton diha sa pinakadako nga nasud sa kalibutan! (tan-awa ang pahina 4).



Sabado, Mayo 3

Alang sa Mga Misyon sa Kalibutan

Adunay daghan pa kaayo nga bag-ong mga lugar nga pagaadtoon, mao nga atong suportahan ang pagtapos niining balaan nga bulohaton! (tan-awa ang pahina 25).



Sabado, Hunyo 7

Alang sa Duha ka Kapilya sa Tamil Nadu, India

Ang South India nanginahanglan kaayo sa ebanghelyo; karon na ang atong kahigayonan sa pagtabang sa paghimo ug kalainan (tan-awa ang pahina 51).